

Kulə'gi lə njekawkulə'gi Ta ki də kulə'gi lə njekawkulə'gi

Makitu kin elta tɔj̊i'n ke tokɪ nan bann ə Burəbe awi'n dəran'ti, adi'n tɔgi njendo'gi lə'ne ki gorow lə Ndil Luwə kadi to təli rɔ'de go mbərkikində'ti li'ə ki dəboy'ti (1.8). Be ə, njekawkulə'gi manyinajɪ Jerujalem'ti ɔjido kində ki Jeju ində taa lo koy'ti aw dəran'ti. Kibo'gi lə Juwipi'gi adi kon njekawkulə'gi. Kadi nan kon kin ra adi njendo'gi tei iləi mbər Poyta ki maji dənangɪ Jude'ti pəti ki Samari biti par ki manga, tei Antiyosi'ti. Dann nya'gi'ti ki rai nya kin, in Piyər, Jaki, Jan, ki Jaki ki ngonn kon Jeju ə Ndil un'de ra'n kulə ngayn nan ki utə nje'gi kin, in Pol. J'oo kulə'gi ki Pol ra'de ki gorow kaw mbah'gi tado kiləmbər Poyta ki maji ki low'ə'ti non ə, ində'n ginn Njekawnan'gi ki dənangɪ Aji'ti ki Du, dənangɪ Giresi'ti ki kaw lo kurkadi'ti. Makitu kin tolta'ne ki poyta lə Pol ki uwəi'ə dangay'ti Rəm'ti, nan tɔj̊i tokɪ de a ra tɔgi kuwə Ta lə Ndil Luwə dangay'ti el.

Kon ta'gi ki me'ti: Kində kaw dəran'ti biti te'n buki Ndil də njendo'gi'ti 1-2. Mannajɪ ki kadi nan kon Jerujalem'ti 3-7. Poyta ki maji te Samari'ti 8. Kunme lə Pol 9. Njekunme'gi ki in Juwipi'gi el ki dəkete dann Njekawnan'gi'ti 10-11. Tol Jaki, te Piyər dangay'ti 12. Kaw mbah kiləmbər Poyta

ki maji ki dökete lə Pol 13-14. Kawnan kibo lə njekawkulə'gi lə Jeju Jerujalem'ti 15. Kaw mbah kiləmbər Poyta ki maji ki nja joo lə Pol 16-18. Kaw mbah kiləmbər Poyta ki maji ki nja mutə lə Pol 19-21. Uwəi Pol dangay'ti 22-26. Pol in Rom'ti 27-28.

Kaw Jeju doran'ti

¹ Tewopil, me makitu'ti lə'm ki dökete*, m'ndangi ta'gi ki ojido nya'gi ki Jeju ulə ngirə ra ge, ndo de'gi ge.

² Nya'gi ki ra biti te'n me ndɔ'ti ki Luwə un'ə'n'ə aw si'e doran'ti. Ningə kete bay ta kadi aw doran'ti, Jeju mbəti njekawkulə'gi lə'ne, adi'de mbərkikində'gi lə'ne ki gorow lə Ndil Luwə.

³ Go koy'o'ti, Jeju oji rɔ'ne njekawkulə'gi lə'ne. Oji'de ki row'gi ki dangi dangi kadi gəri tokı n'ra ki dɔ'ne taa. Ndɔ dɔso go'ti ningə, te bus ki rɔ'de'ti el'de ta do Konbe'ti lə Luwə.

⁴ Ndɔ kare ki isi sɔ nya se'de, Jeju el'de kadi tei gidi bebo Jerujalem'ti el. Nan kadi nginəi biti kadi Baw'ne adi'de kadikare ki un ndu'ne dɔ'ti kadi n'a n'adi kin bay taa[†]. Ningə el'de ene: «In kadikare ki m'inbe m'el'se ta'a kete nga.

⁵ Jan ra de'gi batəm me mann'ti, nan ingi, me ndɔ'gi'ti ki ngayn el ne ə, a rai'se batəm me Ndil Luwə'ti.»

⁶ *Njekawkulə'gi lə Jeju ki kawinan rɔ'a'ti dəji'ə eyina: «Burəbe, in dəkagilo'ti ki ngosine inbe kin ə a taa konbe adi *Isirayel wa?»

* **1:1 1.1** Luk 1.1-4 † **1:4 1.4** Luk 24.49

7 Θ el'de ene: «In ta lə'se kadi in gəri də kad'a eke də gangi lo'gi ki Bai ɔjì kigo lo təgi'ti lə'ne el.»

8 Nan a ingəi təgi loki Ndil Luwə a re də'se'ti. A təli nje mannajı lə'm me bebo Jerujalem'ti num, dənangi Jude'ti ba pəti num, Samari'ti num, ratata dəboy dənangi'ti.

9 Lokı Jeju el'de ta'gi kin ginn'ə gangi ningə, oyi'ə isi aw ki taa me nə'l'ti. Ningə kilndi re uti kum'de adı oyi'ə el.

10 Kum'de nanyi ki taa dəran'ti, lo koo go Jeju lo kaw'a'ti, ningə, dingəm'gi joo ki uləi ku'gi ki nda bal bal tei bus ki rə'de'ti, ningə eli'de eyina:

11 «De'gi ki Galile'ti, tado ri ə rai ra gonyi lo ki taa dəran'ti be wa? Darə Jeju inbe ki uni'ə ta dann'se'ti awi si'ə dəran'ti kin ə, a təl re tokı oyi go'ə lo kaw'a dəran'ti kin be tə.»

Kuti lə njekawkulə'gi

12 Be ə njekawkulə'gi lə Jeju təli də mbal kagi Buni'ti awi Jerujalem'ti gogi. Mbal kagi Buni kin in ndəkba ki bebo Jerujalem.

13 Lokı rei tei Jerujalem'ti ningə, ali awi me koy'ti kare ki in də mad'a'ti taa, lokı rai to lo kisi'de kete kete. Adi in Piyər num, Jan num, Jakı in ki Andire num, Pilipi in ki Tomasi num, Batilemi in ki Matiye num, Jakı ki ngonn lə Alpe num, Simon ki nje rə tado ta kingədə lə be lə'ne num taa Judi ki ngonn lə Jakı num tə.

14 Ingi pəti, ki me'de ki kareba, kawinan nəm nəm kadi elita ki Luwə ta ta, nan'ti ki dene'gi madı. Mari ki kon Jeju in dann'de'ti num taa ngannkon Jeju num tə.

Matiyasi ɔr tor Judasi

15 Me ndɔ'gi'ti kin, njekunme'gi kawinan asi bu ki dɔ joo. Ningə Piyər ində taa dann ngannkon'ne'gi'ti el ene:

16 «Ngannkon'm'gi, maji kadi nya ki Ndil Luwə elta'a me Makitu'ti lə Luwə tɔlta'ne. Tadɔ Ndil Luwə, elta kete ki ta *Dabidi, oji'n dɔ Judasi ki ɔr non de'gi ki rei uwəi Jeju.

17 Judasi in ki kare dann'je'ti, ningə aw ki kulə lə'ne ki sɔw dɔ'ne kadi ra dann'je'ti tɔ.

18 Ki nar ki adi'ə tadɔ kugə'n goji kulə ki majel ki ra kin ə, Judasi aw ndogi'n lo ndɔɔ. Me ndɔɔ'ti ki ndogi kakin ə, ində taa osi, dɔ'a sur ki nanga, me'ə ndu rusi adi ti'ə ala mban dɔnangi'ti.

19 De'gi pəti ki dɔnangi Jerujalem'ti oyi ta kin. Be ə bari lo ndɔɔ kakin ki ta be lə'de eyina: "Akeldama", kɔr me ta kin nan: "Lo ndɔɔ mosi".

20 Ndangi me makitu Pa'gi'ti eyina:

"Kadi kəy li'ə in ki k'inyə kɔ num,

Kadi de kare ka isi me'ti el num‡,"

Taa ndangi bay eyina:

"Kadi de ki rangi ɔr tor'o."

21 «Be ə, maji kadi ji mbəti de kare mbunə de'gi'ti infe ki njiyəi se'je nan'ti ki ndɔ'gi pəti ki Burəbe Jeju awi'n se'je num təl'n se'je num infe kin.

22 Ulə ngirə dɔ batəm'ti lə Jan, ratata te'n dɔ ndɔ'ti ki Luwə un'n Jeju ta dann'je'ti awi'n si'ə dɔran'ti. Kadi de kare dann'de'ti, in nje mannajì, nan'ti se'je tokì Jeju ində lo koy'ti.»

‡ **1:20 1.20** Pa'gi 69.26, 109.8

23 Lo kin'ti, rei ki de'gi joo ɔji'de, ki dokete in Jisepi ki bari'ə nan Barsabasi, ki indei to'a ki rangi nan Jusitusi, ninge ki nja joo in Matiyasi.

24 Ninge eli Burəbe eyina: «Burəbe, in ger ngarme de'gi peti tige, ə ɔji'je ke mbune de'gi'ti ki joo kin, in ki ra ə mbət'ə wa?

25 Mbət'ə kadi un ta kulə lə njekawkulə ki Judasi inye ta'a ə aw lo'ti le'ne ki sow do'a kadi awi'ti kin.»

26 Rai buki buki, ninge buki buki osi do Matiyasi'ti. Adi Matiyasi ore kadi njekawkulə'gi ki dogi gide in kare.

2

Re lə Ndil Luwə

1 Loki ndo nanyi Pantəkoti asi ninge*, njekunme'gi peti kawinan lo kareba.

2 Tanan'ti non, kah nya madi in doran'ti, ə to to nel bo ki ule ki togi'ne kin be. Kah nya kakin taa lo me key'ti ki sii'ti.

3 Oyi nya'gi ki toi to por ə ndonn'o'gi tei bilim bilim be, tei, kanyinan do'de'ti kare kare.

4 Ndil Luwe rosi me'de peti, adi ulei ngire kel ndonnta'gi ki rangi, kigo kinde'ti ki Ndil Luwe nde'n ta de'ti ki ra kadi el.

5 Ninge me ndo'a'gi'ti kin, *Juwipi'gi ki nje bol Luwe, in ki do be'gi ki dangi dangi ki donangi'ti ne peti, rei sii Jerujalem'ti.

6 Loki oyi kah nya kin ninge, anyinan ngodi rei mbonyinan banyinan banyinan, ndil'de te saw,

* **2:1 2.1** Lebitiki 23.15-21; Ndukun ki nja joo 16.9-11

tadɔ nan nan dann'de'ti, oo dɔ ndu njekunme'gi ki sii elita ki ndonnta be lə'ne.

⁷ Nya kin əti'de bol ngayn adi ndil'de anyi ur kaki, oyi kadi in nya ki rɔta'ti el, adi eli eyina: «De'gi ki isi elita kin pəti in de'gi ki in Galile'ti,

⁸ Nga bann be nan nan dann'je'ti, oo ta ki te ta'de'ti ki ndonnta be lə'ne wa?

⁹ J'in de'gi ki Parti'ti, ki Medi'ti, ki Elamiti'ti, ki nje k'in dənangi Mejopotami'ti num, ki Jude'ti num, Kapadosi'ti num, taa Pon'ti ki in ngonnbe ki dənangi Aji'ti num,

¹⁰ Piriji'ti num, Pampili'ti num, Ejipiti, ki dənangi Libi'ti ki in ndəkba ki Sirenn, eke nje k'in dənangi Rəm'ti.

¹¹ J'in pəti j'in Juwipi koji'gi ge ki Juwipi təl'gi ge. J'in Kireti'ti ki Arabi'ti. Be ka, j'oo dɔ ndu'de ki elita ki ndonnta be lə'je, ɔjidɔ nya'gi ki əti bol ki Luwə ra.»

¹² Ing̊i pəti ndil'de anyi ur kaki adi gəri ta inbe ki kadi eli el, ningə elinan mbunə'de'ti eyina: «Kor me nya ki ra nya kin nan ri ə?»

¹³ Nan nje ki nan'gi kogi dɔ nje kel ndonnta'gi'ti ki dangi dangi ki ki ra eli, eyina: «In yiwi kandi nju ə anyinan ngayn ə ra'de.»

Piyər elta bulə de'gi

¹⁴ Piyər indəi rai taa ki ndəgi njekawkulə'gi ki dəgi gidə in kare, ningə un ndu'ne ki taa elta bulə de'gi ene: «Uri mbi'se maji oyi dɔ ta lə'm in Juwipi'gi ki de'gi pəti ki isi Jerujalem'ti ne. Maji kadi gəri nya ki isi ra nya kin to.»

¹⁵ De'gi madi dann'se'ti oyi kadi in yiwi kandi nju ə ra de'gi kam. Nan jagi! Ji ra ki sin non kadi nda'ti bay!

16 Nan ngəsine nya ki ndəki njekeltakita
Luwə'ti Juwəl elta'a ka ə ra nya kin:

17 "Nya'gi ki Luwə elta'a kadi a rai nya me
ndə'gi'ti ki dəboy'ti kaa ə toi kin:
M'a m'ulə ki Ndil'm də de'gi'ti pəti.

Ngann'se'gi ki dingəm ki nje ki dene a təli
njekelta ki ta Luwə'ti,
Basa'gi lə'se a oyi nya'gi me ndil'ti,

Bugə'gi lə'se, a oyi nya'gi ki to lo kiyərə'ti me
ni'ti.

18 Oyo me ndə'gi'ti kin,

M'a m'ulə ki Ndil'm də ngann njekulə'gi'ti lə'm
ki dingəm ki nje ki dene.

A in nje kelta ki ta'm'ti.

19 M'a m'ra nya'gi ki de ası ra el me dəran'ti taa
nu,

Ningə dənangı'ti ne, m'a m'ra nyakojı'gi ki əti
bol,

Adı in: mosı num, por num, sa ki su luy luy num
tɔ,

20 Kete bay ta kadi ndə ki bo ngayn, ki rosı ki pitı
lə Burəbe kin a re,

Loki kada a təl lo ki ndul, ningə nanyi a təl mosı.

21 Ningə me ndə'ti kin, de'gi pəti ki bari tɔ
Burəbe a ingəi kajı†."

22 «In Isirayel'gi, uri mbi'se majı oyi ta ki m'a
m'el'se. In gəri pəti kadi Jeju ki Najareti, dingəm
kin ki Luwə ɔj'ɔ ki taga kadi n'ndig'ə, ə Luwə ra
nya'gi ki de ası ra el ki nyakojı'gi ki əti bol ki
takul'ə dann'se'ti ne.

23 Dingəm kin, uləi'ə ji'se'ti kigo kun ndu'ti
ki Luwə un, num kigo kəjitarə'ti li'ə ki to kete.

† 2:21 2.21 Juwəl 3.1-5

Ningə ingi adi de'gi ki gəri Luwə ki rəta'ti el,
təli'ə ki row bər ki bəri'ə də kagidəsi'ti.

24 Nan Luwə gangi kulə koy rə'a'ti kə ad'a ində
taa lo koy'ti, tədə koy aw ki təgi kadı uwə ginn
təgi'ne'ti be ninn'ti el.

25 Dabidi elta oji'n də'a ene:
"M'oo Burəbe ki dəkagilo'gi pəti non'm'ti,
Tədə in dəjikəl'm'ti kadı m'te m'osi el.

26 In tədə kin ə rənel rosı me'm adi m'osi'n pa
tə.
Be ə, be ninn'ti kaa, darə'm a ərkon ki
kindəmedəti,

27 In Burəbe, a tusi'm inyə'm kə koo el,
A inyə njekuləbər lə'i ki Ar njay ad'a ndum lo ki
koo'ti el tə.

28 In ə ɔjì'm row kadi m'təl m'nji'n ki də'm taa,
Ningə a adi'm rənel me k'in nan'ti sə'm‡."»

29 Piyər təl el bay ene: «Ngannkon'm'gi, adi
m'el'se ta ki rəta'ti: kaw'je Dabidi oy tokı rəta'ti
adi duwi'ə. Dəbad'a to dann'je'ti ne biti bone.

30 In njekeltakita Luwə'ti, ə gər kadi Luwə un
ndu'ne ad'a ki kiwrə kadi n'a n'adi de kare ki
ginn kaw'ti li'ə a onbe tor'o'ti§.

31 Dabidi gər nya ki a ra nya lo ti'ti, adi elta kin
lo koy'ti lə Kirisiti ki in *De ki Luwə mbət'ə kin
kete. In ta li'ə ə Dabidi ene Luwə a inyə lo ki
koo'ti el, taa a inyə darə'a adi ndum be ninn'ti
el tə.

32 Jeju ki m'nji m'elta li'ə kin, Luwə ad'a ində
taa dann njekoy'gi'ti, j'in pəti ji gəri maji.

33 Go'ti ningə, Luwə un'ə aw si'ə dəoran'ti adi
isi dəjikəl'c'ti. Ningə ngəsine Luwə ki Baw ad'a

Ndil'ne tokı un'n ndu'ne. Ndil kin ə, Jeju buki dɔ'je'ti, tokı oyi ngɔsine ki kum'se ge, ki mbi'se ge kin.

³⁴ Tokı rɔta'ti, Dabidi aw dɔran'ti el, nan el ene: "Burəbe el Burəbe lə'm ene: <Re isi dɔjikɔl'm'ti,

³⁵ biti kadi m'təl njeban'gi lə'i nyakində nja'i'ti ginn tɔg'i'ti*."»

³⁶ In be ə, ro Jeju infe ki bəri'ə dɔ kagidəsi'ti kin ə, Luwə ad'a in Burəbe num, Kirisiti ki in De ki Luwə mbət'ə num tɔ. In kin ə in nya ki maji kadi de'gi pəti ki Isirayel'ti gəri maji.»

Nje ki uni me'de adi Kirisiti dɔkete

³⁷ Lokı de'gi oyi ta kin ningə, me'de olo wuti wuti adi dəji Piyər ki ndəgi njekawkulə'gi eyina: «Ngannkon'je'gi, in ri ə kadi ji ra wa?»

³⁸ Piyər təl el'de ene: «Inyəi gorow njiyə'se ki majel ko, ningə kadi de ki ra dann'se'ti adi rai'ə batəm me tɔ Jeju Kirisiti'ti, kadi majel'gi lə'se in ki k'inyə go ko. Ningə a ingəi Ndil Luwə.

³⁹ Tokı rɔta'ti, kunndu lə Luwə in tado lə'se num, tado lə ngann'se'gi num, tado de'gi ki sii sanyi num. Səw dɔ de'gi pəti ki Burəbe Luwə lə'je a bar'de.»

⁴⁰ Piyər el'de ta'gi ki rangi ngayn go'ti bay kadi man'n naji, ningə ulə dingəm me'de'ti ə el'de ene: «Gangi nan ki ginn de'gi ki majel ki bone kin, kadi Luwə ajı'n'se.»

⁴¹ De'gi pəti ki taai ta lə Piyər, rai'de batəm. Ndə'a'ti kakın, de'gi asi dər mutə rei orei kadi njekunme'gi ki kete.

* 2:35 2.35 Pa'gi 110.1

42 Ulə ngirə dəkagilo'ə'ti kin, rei nəm nəm tədə k'oo də nyando lə njekawkulə'gi num, lo ra madi nan'ti num, lo təti mapə'ti num, taa lo kelta'ti ki Luwə num tə.

43 Njekawkulə'gi rai nya'gi ki de ası ra el ki nyakɔji'gi ki əti bol ngayn adi de'gi pətə sii ki bol me'de'ti.

44 Nje kunme'gi indəi rə'de nan'ti kareba ə kawi nyakingə'gi lə'de dənan'ti kareba tə.

45 Ndogi se'de nyakingə'gi ki nya maji'gi lə'de ə lowəi nan nar'a kigo ge'ti lə de ki ra.

46 Ndə kare kare pətə, ki me ki kareba, ingəi nan Kəy'ti lə Luwə. Lowəi nan mapə me kəy'gi'ti lə'de, soi nya'gi lə'de ki rənel num, ki me ki səl ləm ləm num tə.

47 Osi pa'gi uləi tɔjì də Luwə'ti, ningə de'gi pətə ndigi ta lə'de tə. Ndə kare kare pətə, Burəbe adi kör de'gi ki aji'de, re də mad'a'ti par par.

3

Piyər adi lapiya de ki nja'a oy

1 Ndə kare Piyər ingi ki Jan isi awi Kəy'ti lə Luwə tədə kelta ki Luwə də kadi'ti ki mutə ki losɔl'ɔ.

2 Dəkagilo'ə'ti kin ə de'gi ai ki de ki nja'a oy lo koj'o'ti nu, indəi'ə ta Kəy'ti lə Luwə. De kakin, ndə kare kare pətə, a indəi'ə ta Kəy'ti lə Luwə ki bari'ə nan: «Ta Kəy ki Ndolo». Indəi'ə kadi koy nya de'gi ki isi uri me natı Kəy'ti lə Luwə.

3 Loki oo Piyər ki Jan ki isi uri ki me Kəy'ti ningə, koy'de nya.

4 Piyər ki Jan uri kum'de ki də'a'ti, ningə Piyər el'ə ene: «Gon'je ne!»

5 Nje nja koy gon'de, ɔji me'ne'ti kadı n'a ningə nya madi ji'de'ti.

6 Nan Piyər el'ə ene: «M'aw ki nar el num, ki ɔr el num kadı m'ad'i. Nan nya ki m'aw'n ji'm'ti in təgi Jeju Kirisiti. Be ə kadı me tə Jeju Kirisiti ki Najareti'ti, ində taa ə njiyə!»

7 Piyər uwə ji kəl'ɔ, ə un'ə ki taa. Tanan'ti non par ə nja'a'gi ki gul nja'a'gi təli toi maji kare.

8 In bal ra taa ə ulə ngirə njiyə. Aw se'de natı Kəy'ti lə Luwə. Tur jagira ki rənel num ulə təjə də Luwə'ti num tə.

9 De'gi pəti oyı'ə lo njiyə'ti num, lo kulə təjì də Luwə'ti num tə.

10 De'gi gəri'ə maji kadı in nje mote ki kete in nje kisi ta Kəy'ti lə Luwə ki bari'ə nan: «Ta Kəy ki Ndolo», isi koy nya inbe ka am. Lokı de'gi oyı nya ki te də'a'ti kin ningə, ndil'de anyi ur kaki adi bol ra'de ngayn.

Piyər elta bulə de'gi

11 Nje nja koy kakin inyə go Piyər ki Jan el. Nya kin ra adi ndil de'gi pəti anyi ur kaki. Be ə, de'gi pəti anyinan ngodi kawinan ki də'de'ti də'de'ti takəy'ti ki bari'ə nan: «Tabiti lə Salomon».

12 Lokı Piyər oo nya kin ningə, el bulə de'gi ene: «Ngann Isirayel'gi, bann ə nya ki ra nya kin əti'se bol kədi be wa? Bann ə uri kum'se ki də'je'ti to nya ki in j'inbe ki təgi'je, eke in ki takul kaw ki j'aw ki bol Luwə me'je'ti ə j'adi'n dingəm kam njiyə'n be wa?

13 Jagi, in Luwə lə *Abiraham, lə *Isaki, lə *Jakobi, Luwə lə kaw'je'gi in ə ulə təjì də bər'ti lə'ne Jeju, ki ulə'ə ji Pilati'ti, *Pilati un ndu'ne kadı n'ilə taa, nan ingi mbəti.

14 Oyo, ingi manji ta gər nya kar njay ki njera nya ki dana. Ningə dəji kadi ji ra maji sese ə j'ilə de ki nya tol de'gi taa tor'o'ti.

15 In be ə, adi tol'i in ki in nya kadi de'gi sii ki də'de taa. Nan Luwə ad'a ində taa dann njekoy'gi'ti, j'in pəti ji gər maji.

16 In tado kun ki j'un me'je j'adi Jeju kin ə, tɔgi ki to me tɔ'a'ti, adi tɔgi dingəm ki oyi'ə, taa gəri'ə kin, kadi ində ra'n taa. Oyo, kunme ki tɔg'ɔ to ki takul Jeju, adi dingəm kin lapiya ki rōta'ti, in nya ki ra nya takum'se'ti pəti adi oyi.

17 Ngɔsine ngannkon'm'gi, m'gər maji ngayn kadi nya ki rai kin, in kigo gər'ə'ti el, ingi ki njekornon'se'gi pəti.

18 Nan, in ki row kin ə, Luwə tol'n ta nya ki iləmbər'ə kete ki takul njekeltakita'a'ti pəti ene: Kirisiti ki in De ki Luwə mbət'ə, ki n'un ndu'ne kadi n'a n'ulə, a ingə kon.

19 Ngɔsine, inyəi gorow njiyə'se'gi ki majel ko, ə teli rei ro Luwə'ti kadi inyə'n go majel'gi lə'se ko.

20 Ningə Burəbe a adi'se dəkagilo kɔrkon, a ulə ki in ki ində də'a nan'ti kete to Kirisiti, ki in De ki Luwə mbət'ə, adi in Jeju, adi'se.

21 Nan ngɔsine kin, maji kadi Jeju isi dəran'ti, biti kadi Luwə tol nya'gi pəti ki dənangi'ti ki sigi gogi, tok iilə'n mbər'ə me bal'gi'ti ki dər, ki takul de'gi ki njekeltakita'a'ti ki ari njay ki mayinu.

22 Be ə, *Moji ene: "Burəbe Luwə lə'se a adi njekeltakita'a'ti, ki to to m'in be, a in dann ngannkon'se'gi'ti, tado lə'se, a oyi də ta'gi pəti ki a el'se.

23 De ki mbəti tol ro'ne go ta'ti ki njekeltakita

Luwə'ti kin a el ningə, Luwə a tuj'ə kə dann de'gi'ti lə'ne ki koy*.”

²⁴ De'gi ki njekeltakita Luwə'ti pəti, ulə ngirə də Samiyel'ti nu ki nje re go'ə'ti, elita də dəkagilo'ti ki ji isi me'ti bone kin kete.

²⁵ Ingı, ə in de'gi ki ta ki Luwə el ki ta de'gi ki njekeltakita'a'ti kin sow də'se, taa kunmindi ki Luwə un adı kaw'je'gi loki un ndu'ne adı Abiraham kin sow də'se tə. Luwə un mindi'ne ene: “Ginn koji'gi ki dənangi'ti pəti a in ki njangi də ki takul ginn kaw lə'i†.”

²⁶ In ki tadə lə'se kete, ə Luwə te'n ki njekulə lə'ne, ulə adı'se kadı njangi də'se, ki takul ra ki ra adı nan nan inyə gorow njiyə'gi lə'ne ki majel kə.»

4

Piyər ingi ki Jan rai non njegangita'gi'ti lə Juwipi'gi

¹ Loki Piyər ingi ki Jan isi elita bulə de'gi to kel ba bay ə, njekujənyamosı kadikare'gi ki madı num, kibo ki də Kəy'ti lə Luwə num ta ki de'gi madı ki mbunə kuti'ti lə *Sadusi'gi, tei ki rə'de'ti bus.

² Wongi ra njekörnon Juwipi'gi ngayn tadə oyi Piyər ingi ki Jan isi ndoi nya bulə de'gi, ningə eli'de eyina: «Tokı Jeju ində'n taa lo koy'ti inbe kin ə, njekoy'gi kaa a indəi taa lo koy'ti tə.»

³ Uwəi'de iləi'de kəy dangay'ti ratata lo ti, tadə losol nga, adı lo kadı gangi ta də'de'ti goto.

* 3:23 3.23 Ndukun ki nja joo 18.15, 18, 19 † 3:25 3.25 Lotum 22.18

4 Ningə mbunə nje'gi'ti kí oyi ta lə'de, ngayn'gi dann'de'ti uni me'de. Be ə, ra adi kör dingəm'gi re də məd'a'ti adi asi dər mi kare.

5 Lo ti də'ti ningə, njekörnon Juwipi'gi num, ngatogi'gi num ta njendo ndukun'gi num, kawinan me bebo'ti kí Jerujalem.

6 Lo kawnan'ti kin, Hann kí in kibo lə njekujənyamosi kadikare'gi in'ti non, taa Kayipi num, Jan num, Alegijandir kí ndəgi de'gi pəti kí me kəy'ti lə njekujənyamosi kadikare'ti kibo kakin num kaa in non tə.

7 Adi rei kí Piyər kí Jan non'de'ti kí non Njekawnan'gi'ti, ə dəji'de ta eyina: «Ki təgi kí in ra eke me tə nan'ti ə rai nya kin wa?»

8 Ningə Piyər, Ndil Luwə rosi me'ə, adi el'de ene: «In njekörnon'gi kí ngatogi'gi,

9 dəji'je ta bone ɔjido nya kí maji kí ji ra kí de kí nja'a oy kí kuji nya kí ji ra ə ingə'n lapiya.

10 Maji kadi ingi pəti gəri ar njay taa de'gi pəti kí Isirayel'ti kaa, kadi gəri maji tə: In me tə Jeju Kirisiti kí Najaret'i tə ə ji ra'n nya kin. In kí takul Jeju inbe kí bəri'ə də kagidəsi'ti ə Luwə ad'a ində taa dann njekoy'gi'ti inbe kin ə, dingəm kin ra'n ta non'se'ti, kí lapiya nga kin.

11 In mbal kí njera kəy'gi mbəti'ə, nan in ə təl mbal kí maj'a utə mad'a'gi pəti, in mbal kí nje kadi təgi kəy*.

12 Kají in me tə'a'ti kí kar'ne ba. Tə kí rangi kí Luwə adi de dənangı'ti ne mbunə de'gi'ti kadi j'ingəi kají goto.»

13 Ndəji njegangi ta'gi kí kibo lə Juwipi'gi ngayn loki oyi Piyər ingi kí Jan elita kí kanji bol,

* **4:11 4.11** Pa'gi 118.22

tadɔ gəri'de kadi in de'gi ki kare ki kanji nyando. Nan k'in ə gəri kadi in de'gi ki in nan'ti ki Jeju mayinu.

¹⁴ Nan lokı oyi dingəm ki adi'ə lapiya kakin rataa gədi'de'ti ningə gəri lo ta ki kadi eli'de el.

¹⁵ Be ə uni ndu'de adi Piyər ingi ki Jan, taa dingəm kakin num kadi tei taga, ningə manjinan ta mbunə'de'ti eyina:

¹⁶ «Ri ə j'a rai ki de'gi kam wa? Tadɔ rai nyakojı ki əti bol ki to ndalo'ti ar njay adi de'gi ki Jerujalem oyi poy'o. Lo kadi ji manji goto.

¹⁷ Nan k'in ə kadi poyta kin aw ki kete kete mbunə de'gi'ti el nga. Adi j'uləi ji'je kum'de'ti kadi kaw ki kete non kam, eli'de madi ta me to Jeju'ti el nga.»

¹⁸ Go ta'gi'ti kin, ai ki Piyər ingi ki Jan kəy gogi ə ɔgi'de ki tɔgi'de kadi elita eke ndoi nya me to Jeju'ti el nga.

¹⁹ Nan Piyər ingi ki Jan eli'de eyina: «Eli'je adi j'oo, ke in gorow'ə'ti, takum Luwə'ti, kadi ji təl rɔ'je go ta'ti lə'se yo ə j'inyə ta lə Luwə wa?

²⁰ Ki ɔjidɔ'je, j'in j'asi manji ta dɔ nya'ti ki j'oo ki kum'je num, ki mbi'je num kin el.»

²¹ Lokı uləi ji'de kum'de'ti ki nja joo bay ningə, inyəi'de adi ai. Toki rɔta'ti, ingəi nya madi rɔ'de'ti ki asi kuwə'n'de dangay'ti el, tadɔ de'gi pəti piti Luwə tadɔ nya ki ra nya kin.

²² Bal dingəm ki ingə lapiya ki takul nyakojı ki əti bol kin, utə dəsə.

Nje kunme'gi elita ki Luwə

²³ Go k'inyə de'ti, Piyər ingi ki Jan ai ingəi madi'de'gi ki njekunme'gi, ɔri'de poy nya'gi

pəti ki kibo'gi lə njekujənyamosi kadikare'gi ki ngatəgi'gi eli'de.

²⁴ Lokı madi'de'gi oyi ta lə'de ginn'ə gangı nga ningə, pəti ki me ki kare, elita ki Luwə eyina: «Burəbe, in ə ra dəran ki dənangi, taa ra babo ki nya'gi pəti ki me'ti tə†.

²⁵ In ə adi Ndil Luwə elta ki ta kaw'je Dabidi ki bər lə'i ene: Ginn be'gi ki dangı dangı tonyi rə ki ndangi kare be. Taa kojitara'gi lə'de to rə'de'ti kare!

²⁶ Ngar'gi ki dənangi'ti ne indəi də rə'de dana tadə kaw rə, nje konbe'gi indəi rə'de nan'ti, ɔsi ta Kirisiti ki in De ki Luwə mbət'ə to Ngar.

²⁷ Toki rəta'ti, in me bebo'ti kin ə, *Erodı ingi ki Ponsı Pilati, nan'ti ki ginn de'gi ki dangı dangı ki ngann Isirayel'gi indəi rə'de nan'ti ɔsi ta njekulə lə'i ki ar njay, ki in Jeju ki mbət'ə to Kirisiti‡.

²⁸ Nya'gi lə'de ki rai kin, in təl ə tolita kojitara'gi lə'i pəti ki ɔji kete, ki təgi, me ndig'i ti lə'i.

²⁹ Ngəsine Burəbe, oo ji'de ki isi uləi kum'je'ti kadı indəi'je bol'ti kin! Adi bər'gi lə'i təgi kadı iləi mbər ta lə'i ki me ki tinyi katı.

³⁰ Ningə, kadı ɔji təgi me tə njekulə'ti lə'i ki ar njay Jeju, kadı njemonyi'gi ingəi lapiya num, taa kadı nyakoji'gi ki nya'gi ki de ası ra el rai nya num tə.

³¹ Lokı tai kon ta kelta'ti ki Luwə ningə, dənangi yəki yikiti yikiti ginn nja'de'ti, lo ki ki kawinan'ti. Ningə Ndil Luwə rosı me'de pəti adi iləi mbər ta lə Luwə ki rə ki tinyi katı..»

† **4:24 4.24** Tekitaga 20.11; Pa'gi 146.6 ‡ **4:27 4.27** Luk 23.7-11;
Ejay 61.1

Nje kunme'gi indəi rɔ'de nan'ti

³² Nje kunme'gi pəti indəi rɔ'de nan'ti ki ngarme ki kare ki mərta ki kare. De kare ki ində gu'ne ki nyakingə lə'ne ki sow dɔ'ne goto, nya'gi pəti in dənan'ti kareba.

³³ Ki təgi ki əti bol ngayn ə njekawkulə'gi manyinajı kin lo koy'ti lə Burəbe Jeju. Ningə, kare kare pəti, Luwə njangidɔ'de njangi dɔ ki əti bol ngayn.

³⁴ Be ə de kare dann'de'ti ki nya to rɔ'a goto. Tadɔ nje'gi ki awi ki lo ndɔɔ'gi ki kəy'gi, uni ndogi ə rei ki nar'a,

³⁵ adi njekawkulə'gi. Ningə njekawkulə'gi lowəi nar kakin dann'de'ti pəti, nan nan ingə kigo nya ge'gi'ti li'ə.

³⁶ De madı kare ki tɔ'a nan Jisepi, ki in ginn kojı'ti lə *Lebi, ki dənangı Sipir'ti, ki njekawkulə'gi indəi tɔ'a nan Barnabasi, kör me'ə nan: «De ki njekulə dingəm me de'gi'ti,»

³⁷ in kaa, aw ki lo ndɔɔ, ə un lo ndɔɔ lə'ne kakin ndogi, ə re ki nar'a adi njekawkulə'gi.

5

Ta ki ngom lə Ananiyası in ki Sapira

¹ Dingəm madı kare ki tɔ'a nan Ananiyası in ki dene lə'ne Sapira, ndogi lo lə'de tɔ.

² Ananiyası ingi ki dene lə'ne Sapira indəi ndu'de nan'ti, iyəi nusi nar, ə awi ki ndəgə adi njekawkulə'gi.

³ Piyər el'ə ene: «Ananiyası, ra bann ə inyə *Satan adi ur me'i'ti əti bol be wa? Ər nusi nar lo ndɔɔ lə'i ngəm, ə elta ki ngom Ndil Luwə!»

⁴ Ri ə ɔgi kadı ngəm nyakingə lə'i wa? A re ndogi'n ə binəm kaa, ri ə ɔgi kadı nar ki ingə kin, ra'n nya ki me'i ge wa? Nya ki mər me'i'ti kin in nya ki majel. In de'gi ə el'de ta ki ngom el, nan in Luwə ə el'ə ta ki ngom.»

⁵ Loki Ananiyası oo ta kin par ə, osı nanga, oy. De'gi pəti ki oyi poyta kin, bol ra'de ngayn.

⁶ Basa'gi rei ragi ninn'ə, ə uni'ə, ai duwi'ə.

⁷ Así ngirə kadı mutə go'ti, dene li'ə re ur kəy ki kanji kadı gər nya ki ra nya.

⁸ Piyər dəj'ə ene: «El'm ta adı m'oo, ke kər nar ki ndogi sese lo ndəcə lə'se inbe ənn be?» Ə dene el'ə ene: «Oyo, kər nar ki j'ingə in be infə.»

⁹ Lo kin'ti, Piyər el'ə ene: «Nga ra bann ə indəi ndu'se nan'ti kadı soki Ndil Burəbe wa?» Oo kah nja de'gi ki awi ki ngaw'i duwi'ə ə bar takəy'ti kin, in kaa a ai sə'i tə.

¹⁰ Tanan'ti non par ə Sapira osı nja Piyər'ti nanga, oy. Loki basa'gi ki nje kaw duw ngaw'a uri kəy ningə, ingəi ninn'ə adı uni'ə awi si'ə duwi'ə kadı ngaw'a'ti.

¹¹ Nya ki ra nya kin, ra adı *Njekawnan'gi pəti, bol ra'de ngayn, taa de'gi pəti ki oyi poyta kin kaa, bol ra'de ngayn tə.

Njekawkulə'gi rai nya'gi ki əti bol bol

¹² Njekawkulə'gi rai nya'gi ki əti bol ki nya'gi ki de ási ra el ngayn dann de'gi'ti. Nje kunme'gi pəti, kawinan lo kareba, ginn tabitə'ti lə *Salomon, ta Kəy'ti lə Luwə.

¹³ De'gi ki rangi ki uni me'de adi Luwə el bay boli kadı rei ro'de'ti. Be kaa, piti njekunme'gi ngayn.

¹⁴ Dingəm'gi ki dene'gi ngayn ngayn uni me'de adi Burəbe, adi kör'de ore dō njekunme'gi ki dō'ti dō'ti.

¹⁵ De'gi ai biti oyi njemonyi'gi ki taga kadi row'ti, tiləi'de dō tirə'gi'ti eke dō kagi'ti ki oti'de, kadi re Piyər dər ningə, ndil'ə ur dō in ki ra'ti wa kare dann'de'ti.

¹⁶ De'gi ngayn indəi be'gi'ti ki gidi bebo Jeru-jalem'ti, rei bur bur ki njemonyi'gi ki de'gi ki ndil'gi ki majel yəti dō'de. Ningə pəti ingəi lapiya.

Uwəi njekawkulə'gi dangay'ti

¹⁷ Go nya'gi'ti kin, kibo lə njekujənyamosi kadikare'gi ki de'gi ki go'ə'ti ki in me kuti'ti lə Sadusi'gi, jangi ra'de ngayn dō njekawkulə'gi'ti. Adi uni ndu'de kadi n'a rai nya madi.

¹⁸ Be ə, uwəi njekawkulə'gi iləi'de kəy dangay'ti.

¹⁹ Nan dann lo'ti, malayka lə Burəbe re te takəy dangay, loki adi tei taga ningə, el'de ene:

²⁰ «Awı me Kəy'ti lə Luwə, iləi mbər ta ki nje kadi de təl isi ki dō'ne taa kin adi de'gi pəti oyı!»

²¹ Njekawkulə'gi təli rɔ'de go'ti, adi lo ti ki sin ba par ə, awı Kəy'ti lə Luwə, uləi ngirə kadi ndoi nya de'gi. Kibo lə njekujənyamosi kadikare'gi'ti ki de'gi ki go'ə'ti, bari ngatəgi'gi ki njegangi ta, ki ngatəgi'gi lə ngann Isirayel'gi pəti. Ningə uləi kəy dangay'ti kadi rei ki njekawkulə'gi tɔ.

²² Nan loki njekulə'gi awı ningə, ngəi'de kəy dangay'ti el, adi təli rei ɔri'de poy'o eyina:

²³ «J'ingə takəy dangay in ki kuti mbukı maji num, njengəm takəy'gi ka rai takəy'ti non num

tɔ, nan lokɪ j'ur me køy'ti ningə, j'ingə de madi el.»

²⁴ Lokɪ kibo ki dɔ njengəm ta Køy'ti lə Luwə ingi ki kibo'gi lə njekujənyamosi kadikare'gi oyi ta kin ningə, ndil'de anyi ur kaki, adi dəji nan ta dɔ nya'ti ki a ra nya go nya'ti kin.

²⁵ Ningə de madi re el'de ene: «Dingəm'gi ki adi uwə'i(de dangay'ti kakin, nyi rai Køy'ti lə Luwə non, ra ndoi nya de'gi.»

²⁶ Kibo ki dɔ Køy'ti lə Luwə aw ki de'gi lə'ne uwə'n njekawkul'gi re se'de, nan k'in ə ində tɔgi dɔ'de'ti el tado boli kadi bulə de'gi ki kawinan dɔ nyando'ti lə njekawkul'gi a tiləi'de ki mbal tɔli'de.

²⁷ Lokɪ rei se'de ningə, awi se'de køy gangita'ti kibo. Ə kibo lə njekujənyamosi kadikare'gi el'de ene:

²⁸ «J'ɔgi'se ki tɔgi'je kadi ndoi nya bulə de'gi ki tɔ dingəm kin. Ə in teli rɔ'se go ta'ti lə'je el, asi dɔnangi Jerujalem nakı ki nyando lə'se, ningə gəi kadi mos'o in dɔ'je'ti bay.»

²⁹ Nan Piyər ingi ki ndəgi njekawkul'gi eli'de eyina: «Təl rɔ go ta'ti lə Luwə in sotı utə təl rɔ go ta'ti lə de'gi.»

³⁰ Luwə lə kaw'je'gi adi Jeju ki tɔli'ə ki row bə'r'ə dɔ kagidəsi'ti kin, te lo koy'ti.

³¹ In ə Luwə un'ə, ində ad'a isi taa, dɔjikəl'ne'ti to Ngar ki utə ngar'gi pəti taa to Njekajı de'gi tɔ. Luwə ində kadi ki, tarow li'ə, Isirayel'gi inyəi gorow njiyə'de'gi ki majel kɔ, adi n'inyə'n go majel'gi lə'de kɔ tɔ.

³² J'in nje mannajı dɔ nya'gi'ti ki rai nya kin, nan'ti ki Ndil Luwə ki Luwə adi nje'gi ki teli

rɔ'de go ta'ti li'ə.»

33 Loki njegangi ta'gi oyi ta kin ningə, wongi ra'de ngayn dɔ njekawkulə'gi'ti, adi ndigi tɔli'de.

34 Nan in ki kare ki mbunə'de'ti ki tɔ'a nan Gamaliyel ɔsi nangi ində taa. In Parisi ki njendo de'gi ndukun, in de ki de'gi pəti gei ta li'ə ngayn. Loki ində taa dann'de'ti ningə, dəjì kadi adi njekawkulə'gi ujəi rɔ'de dow kare jo.

35 Ningə go'ti, el'de ene: «Isirayel'gi, indəi manji nya ki gei kadi rai ki de'gi kam maji taa.

36 Dɔkagilo ngayn el ne bay ə, de madi ki tɔ'a nan Teda tɔjì rɔ'ne kadi n'in de ki tuwəl. Or de'gi asi bu so go'ne'ti. Nan de'gi rei tɔli'ə adi de'gi ki go'ə'ti kakın sananyinan. De oo ta li'ə el bone.

37 Go'ə'ti ningə, Judasi ki Galile'ti, te dɔkagilo ndangitɔ de'gi me makitu'ti, buki de'gi ngayn go'ne'ti ra'n wongi. Nan inbe kaa de'gi tɔli'ə tɔ, adi de'gi ki go'ə'ti sananyinan tɔ.

38 Ngɔsine, ta lə'm ə to kin: Ononyi'se kadi rai nya madi ki de'gi kam, inyəi'de adi awi lo lə'de. Nya ki kadi in gəri ə to kin, re kɔjitara'gi lə'de ki kulə ra'de'gi in rɔ de'gi'ti ə, ginn nya'gi kin a gangi to yan ndəgə'gi be tɔ.

39 Nan re nya'gi kin in rɔ Luwə'ti ə, lo kadi ingi a ɔgi'de dɔ goto. Ononyi'se kadi ai rɔ dɔ Luwə.»

Lo kin'ti, njegangi ta'gi ndigi go'ə'ti.

40 Be ə, təli bari njekawkulə'gi kəy gogi, ə, adi tindəi'de, ə ɔgi'de ki tɔgi kadi elita me tɔ Jeju, ningə inyəi'de adi awi.

41 Njekawkulə'gi tei lo gangi ta'ti ki rɔnel tado k'oo ki Luwə oo'de adi asi gaki kadi ingei kon tado lə Jeju.

42 Ningə kī ndō kare kare pəti, me Kəy'ti lə Luwə eke me kəy'gi'ti madi, njekawkulə'gi nanyi kī lo ndo nya de'gi'ti num, kī lo kiləmbər Poyta'ti kī maji, tokı Jeju in Kirisiti kī in De kī Luwə mbət'ə.

6

Kində nje k'oo go nyamaji'gi lə njekawnan'gi

1 Dəkagilo'ə'ti kin, kör njendo'gi in kī dō mad'a'ti kī kete kete. Be ə Juwipi'gi kī nje kelte Gireki barita dō Juwipi'gi'ti kī nje kelte Ebirə. Nje kel ta Gireki barita tado njengawkoy'gi lə'de ingəi nyakuso kī de'gi isi lowəi kī ndō kare kare pəti kin, to ndəgə'gi el.

2 Be ə, njekawkulə'gi kī dəgi gidə in joo kawi njendo'gi kī nan'ti, eli'de eyina: «A in nya kī go'ti el kadi j'inyə ta kelte lə Luwə, ə ji təl ji nanyi ta nya lowə'ti.

3 Tado in kin ə, ngannkon'gi, maji kadi mbəti de'gi siri dann'se'ti, kī de'gi manyinajı lə'de maji num, Ndil Luwə rosi me'de num, taa ai ki kumkədi num tə, kadi j'uləi kulə kin ji'de'ti.

4 Be kadi j'uni'n rə'je j'ində ta dangi tado kelte kī Luwə kī ndo nya de'gi.»

5 Ta kəjij'gi kin nəl njendo'gi pəti. Be ə, mbəti Etiyenn kī in de kī rosi kī kunme num, kī Ndil Luwə num tə. Ta mbəti Pilipi num, Pirokər num, Nikanər num, Timon num, Parmenasi num, taa Nikola kī in de kī Antiyosı'ti, kī təl Juwipi num tə.

6 Rei se'de oji'de njekawkulə'gi, adi elita kī Luwə tado lə'de num, indəi ji'de də'de'ti, njangidə'de num tə.

7 Ta lə Luwə aw kī kete par par. Kør njendo'gi in dɔ̄ mad'a'ti ngayn me bebo'ti kī Jerujalem. Taa njekujənyamosi kadikare'gi inbe ngayn kaa uni me'de adi Jeju tɔ̄.

Awi ki Etiyenn lo gangi ta'ti

8 Etiyenn in de kī rosı kī memajı num, kī tɔgi lə Luwə num, taa ra nya'gi kī dum ra kī nyakɔjı'gi kī ətì bol bol dann de'gi'ti num tɔ̄.

9 Ningə de'gi madi uləi ngirə kadi manjinan ta'ti kī Etiyenn. De'gi kin in nje kī me køykawnan'ti lə Juwipi'gi. In nje'gi kī bari rɔ'de: «De'gi kī taa k'inyə taa.» Adi in Juwipi'gi kī in Sirenn'ti num, Alegijandiri'ti num, kī nje kī in Silisi'ti num taa kī dɔ̄nangi Aji'ti num tɔ̄,

10 nan tɔgi ta kel'de osi go yan Etiyenn'ti el, tado Etiyenn elta kī kumkədi kī Ndil Luwə ad'a.

11 Lo kin'ti, awi ndogi de'gi kī nar kī ji'de'ti kadi eli eyina: «J'inbe j'oo kī mbi'je kadi Etiyenn elta kī mal dɔ̄ ndukun'ti lə Moji num, dɔ̄ Luwə num tɔ̄.»

12 Be ə, suləi bulə de'gi num, ngatɔgi'gi num, taa njendo ndukun'gi num adi rei uwəi Etiyenn dɔ̄ ji'ə'ti, awi si'ə lo gangi ta'ti kibo.

13 Indəi nje mannajı'gi kī ngom adi təti ta dɔ̄a'ti, eli eyina: «Dingəm kam ta kon ta kelta kī mal dɔ̄ Køy'ti lə Luwə kī in lo kī ar njay kin el num, taa dɔ̄ ndukun'ti lə Moji el num tɔ̄.»

14 Toki rɔta'ti, j'inbe j'oo ndu'ə kī el'n kadi Jeju kī Najareti'ti a tujı køy kin, ə a yəti nya kagi be'gi kī Moji adi'je.

15 De'gi pəti ki sii lo gangi ta'ti kibo, turi kum'de pəti ki dō Etiyenn'ti, ningə oyi kadi takum'ə to to yan malayka be.

7

Etiyenn elta non njegangita'gi'ti

1 *Kibo lə njekujənyamosi kadikare'gi dəji ta Etiyenn ene: «Ta'gi ki de'gi eli dɔ'i'ti kin, in ki rɔ'a'ti inbe wa?»

2 Etiyenn ilə'ti ene: «In baw'm'gi ki ngannkon'm'gi, uri mbi'se oyi dɔ ta ki m'a m'el'se kam maji. Me ndɔ'gi'ti ki kete, Luwə ki nje pitı ojı rɔ'ne adi kaw'je Abiraham, dɔkagilo'ti ki si'n me be'ti ki Mejopotami'ti bay, kete bay ta kadi aw uwə lo kisi dɔnangi Aram'ti,

3 Luwə el'ə ene: “Ində taa inyə be lə'i ki nje koj'i'gi ə aw me be'ti ki m'a m'oj'i*.”

4 In be ə, Abiraham inyə'n me be ki Kalde ə re uwə lo kisi Aram'ti. Ningə go koy baw'a'ti, Luwə ad'a ində re me be'ti ki isi'ti ngɔsine kin†.

5 Nya nduwə ki Luwə adi Abiraham me be'ti kin goto. Ngonn nusı lo ki ndikiri be kaa ad'a el. Nan un ndu'ne ad'a kadi n'a n'ad'a be kam ba pəti. Taa n'a n'adi ngann kaw'a'gi tor'o'ti tɔ. Dɔkagilo'ti ki Luwə isi elta Abiraham kin, Abiraham ojı ngonn el bay‡.

6 Ta ki Luwə el'ə ə to kin: “Ngannkawi'gi a sii to mbah'gi dɔnangi'ti ki rangi num, de'gi a rai'de bər'ti num, taa de'gi a adi'de kon ası bal bu so num tɔ.”

* **7:3 7.3** Lotum 12.1 † **7:4 7.4** Lotum 11.32, 12.5 ‡ **7:5 7.5**
Lotum 12.7, 13.15, 17.8

7 Go ta'gi'ti kin Luwə el ene: "Ginn de'gi ki rai'de bər'ti kin, m'inbe m'a m'gangi ta də'de'ti. Go'ti ningə, a tei me be mbah'ti ki ra'de bər'ti kin kə, ə a təli rei me be'ti ki indəi'ti ə awi bər'ti kin kadi rei gosi m'in§."

8 Ningə Luwə ad'a nya kunmindi ki in kujə məti. Be ə, loki Abiraham oji Isaki ningə ndə jijoo go'ti, par ə ujə mət'o. Isaki ra be tə tada ngonn'o Jakobi. Jakobi kaa ra be tə tada ngann'a'gi ki in ginn Isirayel'gi ki dəgi gidə in joo*.

9 «Ningə ni ki me ngann'gi'ti lə Jakobi ra adi ndogi ngonnnkon'de Jisepi adi awi si'ə to bər me be'ti ki Ejipiti'ti. Nan Luwə in si'ə nan'ti†.

10 Be ə, ɔr'ɔ me kon'gi'ti pəti. Ningə memajı lə Luwə ki in si'ə, ad'a kumkədi takum Parawon'ti ki in ngar ki Ejipiti'ti. Adi Parawon un'ə ində to nje konbe dənangi ki Ejipiti'ti, də me kəy'ti lə'ne pəti tɔ‡.

11 Dəkagilo'ə'ti kin ə, bo ki bo osi dənangi Ejipiti'ti ba pəti, taa dənangi Kana'ti tɔ. In dəkagilo kumtondoo ki əti bol ngayn. Lo kadi baw'je'gi ingəi nya ndikiri soi goto§.

12 Loki Jakobi oo kadi nyakusə to me be'ti ki Ejipiti'ti ningə, ulə ngann'ne'gi ki in kaw'je'gi adi awi ki dəkete.

13 Loki təl ulə'de ki nja joo ningə, Jisepi ra adi ngannkon'a'gi gəri'ə. Lo kin'ti, Parawon kaa, gər'n ginn koji lə Jisepi tɔ*.

§ **7:7 7.7** Tekitaga 3.12 * **7:8 7.8** Lotum 17.10-14, 21.4 † **7:9**

7.9 Lotum 37.11, 28, 39.2, 21 ‡ **7:10 7.10** Lotum 41.39-41

§ **7:11 7.11** Lotum 41.54-57 * **7:13 7.13** Lotum 45.1-4, 16

14 Go'ti ningə, Jisepi ulə go baw'ne Jakobi'ti ad'a re kī ginn kojī li'ə ba pəti, asi de'gi dəsiri gidə in mi[†].

15 Jakobi aw Ejipiti'ti ningə oy kī kete non. Kaw'je'gi kaa oyi non num tō‡.

16 Təli kī singə'de rei dənangi Kana'ti, me bebo'ti kī tō'a nan Sisem. Duwi'de be ninn'ti ki Abiraham ndogi kī nar ji ngann lə Hamor me be'ti kī Sisem§.

17 «Dəkagilo tōl kon kunndu kī Luwə un adi Abiraham in ndəkba. Ningə kör ngann Isirayel'gi banyi kī dō mad'a'ti dō mad'a'ti dənangi Ejipiti'ti,

18 biti dəkagilo'ti kī ngar kī rangi kī gər Jisepi el on'n be dənangi Ejipiti'ti*.

19 Ngar kakin uwə de'gi lə'je ra'n kulə kī aldə maji num, adi'de kon num, ta indəi təgi dō'de'ti adi inyəi ngann'de'gi kī kası kō, biti kadı oyi†.

20 Dəkagilo'ti kin ə, oji Moji kī memajı lə Luwə in dō'a'ti adi otı'ə me kəy'ti lə baw'a ası nanyi mutə‡.

21 Ningə lokı dum dō'de adi iləi'ə kō, ngonn lə Parawon kī dene te dō'a'ti, ə un'ə ot'o to ngonn'ne inbe be§.

22 Be ə Moji ingə'n nyando kī ɔjidə kumkədi pəti kī dənangi Ejipiti'ti. Adi aw kī təgi me ta kel'ne'ti num, me kulə ra'ne'ti num tō.

23 «Loki bal'a in dəsəo ningə, mərta re dō'a'ti kadı n'aw n'oo ngannkon'ne'gi kī in ngann

† **7:14 7.14** Lotum 45.9-10, 17-18 ‡ **7:15 7.15** Lotum 46.1-7

§ **7:16 7.16** Lotum 23.3-16; Jojuwe 24.32 * **7:18 7.18** Tekitaga 1.7-8 † **7:19 7.19** Tekitaga 1.10-11,22 ‡ **7:20 7.20** Tekitaga 2.2

§ **7:21 7.21** Tekitaga 2.3, 5, 10

Isirayel'gi.

²⁴ Dökagilo'ti kī in'n kī ngannkon'ne'gi ə, oo de kare kī Ejipiti isi tində kī kare dann'de'ti. Be ə, re rō dō ngonnnkon'ne'ti adi ində de kī Ejipiti'ti kakin təl'č.

²⁵ Moji mər kadi ngannkon'a'gi a gəri tokī Luwə ə ulə'n'ə kadi n'ta dɔ'de. Nan ngannkon'a'gi gəri el.

²⁶ Ndə kī go'ti, oo ngannkon'nan'gi joo kī in Isirayel'gi ra rō'i nan. Re ra dann'de'ti kadi ulə'de nojī nan'ti. El'de ene: "In ngannkon nan'gi tō, ə bann ə ra tindəi nan be wa?"

²⁷ Ningə in kī nje tində ngonnnkon'ne kakin əs'č ngərəngi, ə el'ə ene: "Nan ə indəi dɔ'je'ti to kibo lə'je, eke njegangi ta dann'je'ti wa?

²⁸ In ge təl'm tokī tagine təl'n de ki Ejipiti'ti kakin be bay wa?"

²⁹ Lokī Moji oo dō ta kin ningə, bol ra'a, adi aw uwə lo kisi to mbah dənangi Madiyan'ti. Dənangi Madiyan'ti ə Moji ta dene ojī'n ngann'gi joo*.

³⁰ «Bal dəsə go'ti ningə, malayka te bus rō'a'ti diləlo'ti, ndəkba kī dō mbał Sinay, dann ndonn por'ti me ngan'ti kī isi on por.

³¹ Lokī Moji oo nya kin ningə, ndil'ə anyi ur kakī. Moji ge kadi n'oo nya kin maji adi əti re ndəkba si'ə. Low'ə'ti non ə oo'n dō ndu Burəbe ene:

³² "M'in Luwə lə kawi'gi, Luwə lə Abiraham, Luwə lə Isaki, Luwə lə Jakobi." Moji bol dadı par par adi lo kadi un kum'ne kī taa goto.

* ^{7:29} ^{7.29} 23-29; Tekitaga 2.11-15, 21-22, 18.3-4

33 Ḳ Burəbe el'ə ene: "Or sa nja'i'ti tado lo ki ra'ti kam in lo ki ar njay.

34 M'oo kumtondoo lə de'gi lə'm me be'ti ki Ejipiti'ti. M'oo dō tumə ki sii tuməi um um, ə m'ur nanga m're kadi m'taa'de m'ilə'de taa. Ningə ki ngɔsine kin re adi m'uləi Ejipiti gogi‡."

35 «Oyi maji! In Moji ki ngannkon'a'gi ɔsi'ə ngərəngi, ə eli'ə eyina: "Nan indəi də'je'ti to kibo lə'je eke njegangi ta dann'je'ti wa", infe kin ə, Luwə ulə to ngar num, taa nje taa'de ilə'de taa num, ki takul tɔgi lə malayka ki te si'ə bus me ngan'ti, kin num to.

36 In ə te se'de ki takul nyara'gi ki de asi ra el num, ki takul nyakɔjı'gi num, me be'ti ki Ejipiti'ti. Taa dɔkagilo ki isi indəi babo kası gangi num ta dɔkagilo'ti ki rai bal dɔsɔ diləlo'ti kin num to‡.

37 Taa in daro Moji ki kare infe kin bay ə, el ngann Isirayel'gi ene: "Luwə a te ki njekeltakita'ne'ti kare dann'se'ti infe'gi, ki a to to m'in be§."

38 Lokı ngann Isirayel'gi kawinan diləlo'ti kaa, in Moji infe kin ə taa ta ta malayka'ti dō mbal Sinay'ti, el kaw'je'gi. In ə taa ta kajı kin rɔ Luwə'ti, kadi adi'je*.

39 Nan kaw'je'gi mabeti kadi teli rɔ'de go ta'gi'ti li'ə. Ningə ki bo utə, ɔsi'ə ngərəngi. Me'de in dō təl kaw dɔnangi Ejipiti'ti gogi.

40 Dɔkagilo'ti ki Moji nanyi dō mbal Sinay'ti

† **7:34** **7.34** 30-34; Tekitaga 3.1-10 ‡ **7:36** **7.36** 35-36; Tekitaga 2.14, 7.3, 14.21 § **7:37** **7.37** Ndukun ki nja joo 18.15-18 * **7:38**

7.38 Tekitaga 19.1-20.17; Ndukun ki nja joo 5.1-33

bay, rei rō Aron'ti eli'ə eyina: "In ra kagi yo'gi ki kadi ɔri non'je, tado ji gər nya ki ra Mojì ki nje te se'je me be'ti ki Ejipiti'ti kin el."

41 Be ə me ndɔ'gi'ti kin, rai ngonn yo madi ki to to ngonn baw mangi be, ə iləi kadikare adi'ə. Ningə rai rɔnel ngayn ɔsikurə nya ki inbe'gi rai ki ji'de kin[†].

42 Nan Luwə təl gidi'ne adi'de, inyə'de kɔ adi sii ta ra yo'ti, ki kɔsikurə nya'gi ki dɔran'ti to nanyi'gi ki kadi'gi ki mee'gi to kagi yo'gi lə'de, tokɪ ndangi me makitu'ti lə njekeltakita Luwə'ti: "In de'gi ki Isirayel, þal dɔsɔ ki rai diləlo'ti kin ke da'gi ki tɔli'de ki ndəgi kadikare'gi adi, in m'in ə adi m'in wa?

43 Jagi, oti kəy yo lə kagi yo lə'se Moloki yo, ki mee kagi yo lə'se Repan, yo'gi ki inbe'gi rai'de ki ji'se kadi ɔsi məkəs'i'se non'de'ti. Tado in nya ra'se'gi kin ə, m'a m'adi njeban'gi lə'se a uwəi'se, awi sese sanyi to mbah'gi gidi Babilon'ti bay[‡].

44 «Me diləlo'ti, kaw'je'gi rai *kəyku kingə nan ki Luwə. Mojì ra kəyku kakin tokɪ Luwə un'n ndu'ne ad'a. In ra kigo koji'ti ki ɔj'ɔ ad'a oo.

45 Ingəi kəyku kakin uni ginn koji'gi lə'de ki rangi, ki in kaw'je'gi ki rei go'de'ti. Kəyku kin in ji'de'ti, loki Jojuwe ɔrnon'de adi rei tai dɔnangi lə ginn de'gi ki dangi dangi ki Luwə tuwə'de non'de'ti. Kəyku kakin, to biti dɔkagilo'ti lə Dabidi[§].

[†] **7:41 7.41** 39-41; Kɔr Isirayel'gi 14.3; Tekitaga 32.1-6 [‡] **7:43 7.43** 42-43; Amosi 5.25-27 [§] **7:45 7.45** 44-45; Tekitaga 25.9, 40; Jojuwe 3.14-17

46 Memajì lə Luwə ɔsi Dabidi adi dəjì tarow kadi n'ra Køy n'adi Luwə lə Jakobi*.

47 Nan in Salomon yo ə ra køy adi Luwə†.

48 «Nan Luwə ki in nje kisi dɔ nya'gi'ti pəti, a isi me køy'ti ki de ra ki ji'ne el. Toki njekeltakita'a'ti ene:

49 "Dəran in kumbər ngar lə'm, ningə dənangi in nyakində nja'm." Burəbe el bay ene: "Køy ki bann ə, a rai adi m'in wa? Lo ki ra a in lo kuwə rɔ lə'm wa?

50 Ke in m'in el ə, nan to bay ə, ra nya'gi kin pəti wa‡?"

51 «In de'gi ki nje tanrɔ'gi, tei me'se el num, boyi mbi'se num dɔ ta'ti lə Luwə to de'gi ki nje gər Luwə el be. Toi to baw'se'gi inbe be. Nya kin ə ra adi, sii ta rɔ ki Ndil Luwə'ti, ki dəkagilo'gi pəti.

52 *Njekeltakita Luwə'ti ki ra ə baw'se'gi adi'ə kon el wa? Ingı ə tɔli njekiləmbər kete, ki ɔjidə re lə in ki kareba, ki in ki dana. Ningə ngəsine, loki Kirisiti re, ingı uni dɔ'a, ə tɔli'ə to.

53 Oyo, ingəi ndukun lə Luwə ki takul malayka'gi, nan lo kadi təli rɔ'se go'ti goto.»

Tiləi Etiyenn ki mbal tɔli'ə

54 Lokì njegangi ta'gi kibo lə Juwipi'gi oyi dɔ ta ki Etiyenn el ningə, wongı ra'de ngayn adi ngori ngangi'de mur mur dɔ'a'ti.

55 Nan Etiyenn ki rosı ki Ndil Luwə, un kum'ne ta ki dəran'ti ningə oo pitı lə Luwə num, taa oo Jeju ki ra taa dəjikəl Luwə'ti num to.

* **7:46 7.46** 2 Samiyel 7.1-16; 1Poyta'gi 17.1-14 † **7:47 7.47** 1 Ngar'gi 6.1-38; 2Poyta'gi 3.1-17 ‡ **7:50 7.50** 49-50; Ejay 66.1-2

56 El ene: «Oyi, m'oo dəran til, ningə m'oo Ngonn De ra taa dəjikol Luwə'ti.»

57 Lokı oyi də ta kin ningə, uri kəl kə ndu'de kə bo ə uti mbi'de də ta'ti li'ə, ə buki nan də'a'ti.

58 Ndəri'ə ai si'ə taga gidi ūbebo'ti, tiləi'ə kə gajı mbal təli'ə. De'gi kakin inyəi ku'gi lə'de rə ngonn kə basa'ti kə tə'a nan Sol.

59 Dəkagilo'ti kə isi tiləi'ə kə gajı mbal, Etiyenn elta kə Luwə ene: «Burəbe Jeju, taa ndil'm kə rə'i'ti.»

60 Go'ti ningə ɔsi məkəsi'ne nanga, ə elta kə ndu'ne kibo ene: «Inyə go majel kin ko adi'de!» Go ta'gi'ti kin, ningə Etiyenn oy.

8

Kindəkumndoo kə ra Njekawnan'gi

1 Sol in mbunə de'gi'ti kə ndigi kadi toli Etiyenn. Me ndə'a'ti kin kindəkumndoo kibo ngayn te də Njekawnan'gi'ti kə Jerujalem. Adi njekunme'gi pətə sananyinan kigo lo'gi. Awi kə Jude'gi'ti kə Samari'gi'ti. Njekawkulə'gi infe par ə nanyinan Jerujalem'ti.

2 De'gi kə nje bol Luwə duwi Etiyenn, nonyi'ə kə kuwendoo kə ngayn.

3 Nan Sol, or Njekawnan'gi njan. Aw kə takəy takəy uwə dingəm'gi kə dene'gi buki'de dangay'ti.

4 Nje kə sananyinan kakin awi kə lo lo iləi mbər Poyta kə maji.

Pilipi me ūe'ti kə Samari

⁵ In be ə, Pilipi ki aw me bebo'ti ki *Samari, ilə de'gi mbər Poyta ki maji lə Kirisiti ki in De ki Luwə mbət'ə.

⁶ Bulə de'gi ba pəti, loki oyи ta'gi ki Pilipi el ge ki nyakojı'gi ki ra adi oyи ki kum'de ningə, uri mbi'de ki dɔ ta'ti li'ə.

⁷ Tado ndil'gi ki majel tei me njemonyi'gi'ti ngayn ki non ki boi ta'de'ti. Taa, de'gi ki rɔ'de oy ki nje mote'gi ngayn ingəi lapiya tɔ.

⁸ Rənel ki bo ngayn to me bebo'ti kin.

⁹ Kete taa kadi Pilipi re, dingəm madi ki tɔ'a nan Simon isi me bebo'ti kin non. In njera mboli, adi ɔr ndil de'gi ki me be'ti ki Samari ngayn. Nga ra rɔ'ne kadi n'in de madi ki eti bol ngayn.

¹⁰ Adi de'gi pəti: in dɔ ngann'gi'ti ki du, biti ki dɔ de'gi'ti ki tɔgi'ti, hangal'de in ki dɔ'a'ti. Eli eyina dingəm kam aw ki tɔgi lə Luwə ki in tɔgi ki eti bol ngayn.

¹¹ Hangal de'gi in ki dɔ'a'ti, tado in mayinu ə isi ɔr ndil'de ki mboli ki ra lə'ne.

¹² Nan loki de'gi uni me'de Pilipi ki ilə'de mbər Poyta ki maji ki ɔjidə Konfə lə Luwə num, ki Jeju Kirisiti num tɔ ningə, dingəm'gi ki dene'gi adi Pilipi ra'de batəm.

¹³ Simon inbe ki dɔ'ne kaa un me'ne tɔ. Loki Pilipi ra'a batəm ningə, inyə go Pilipi el. Loki oo nyakojı'gi ki nya'gi ki eti bol ngayn kakin ningə, inbe təl re et'ə bol ngayn bay.

Piyər ingi ki Jan me be'ti ki Samari

¹⁴ Loki njekawkulə'gi ki sii Jerujalem'ti oyи kadi de'gi ki Samari'ti taai ta lə Luwə ningə, uləi Piyər ingi ki Jan rɔ'de'ti.

15 Lokì rei tei Samari'ti ningə, elita ki Luwə kadi njekunme'gi ingəi Ndil Luwə.

16 Tadɔ Ndil re dɔ de madi'ti kare dann'de'ti el bay. In batəm par ə rai'de me tɔ Burəbe Jeju'ti.

17 In be ə, Piyər ingi ki Jan indəi ji'de dɔ'de'ti kadi ingəi Ndil Luwə.

18 Lokì Simon oo kadi in ki gorow lə ji ki kində dɔ'ti lə njekawkulə'gi ə Ndil Luwə re'n dɔ nje kunme'gi'ti ningə, adi Piyər ingi ki Jan nar,

19 ə el'de ene: «M'in kaa adi'm'in tɔgi kin to kadi to de ki m'a m'ində ji'm dɔ'a'ti ə, ingə Ndil Luwə tɔ.»

20 Ə Piyər el'e ene: «Kadi nar lə'i kin tuji nan'ti ki darɔ'i. Tadɔ ində me'i'ti kadi a ndogi kadikare lə Luwə ki nar.

21 Nya ki bar tɔ'i, eke nya ki sɔw dɔ'i goto me nya'ti ki ji ra'n kam, tadɔ me'i in dana non Luwə'ti el.

22 Maji kadi tɔr ndu'i dɔ majel'ti lə'i, ə elta ki Burəbe adi re to bann ə, inyə go kɔjitar'a'gi ki me'i'ti kin kɔ.

23 Tadɔ m'oo kadi me'i ati kangı, taa nya ki gorow'ə'ti el doloi dolo tɔ.»

24 Nga a, Simon el Piyər ingi ki Jan ene: «Kadi inbe'gi elita ki Burəbe tadɔ lə'm, kadi nya madi kare me nya'gi'ti ki elita'a kin te dɔ'm'ti el.»

25 Lokì Piyər ingi ki Jan manyinaji, ə ndoi ta lə Burəbe tɔ ningə, teli ki Jerujalem'ti gogi. Iləi mbər Poyta ki maji me ngann be'gi'ti ki Samari ngayn ki gorow gorow.

*Ta lə Pilipi ingi ki kuji dingəm ki in de ki boi
ki Etiyopi'ti*

26 Ndə kare malayka lə Burəbe el Pilipi ene: «Ində taa aw kī holo be, dō row'ti kī in Jerujalem aw kī Gaja'ti, kī in row kī diləlo'ti kin.»

27 Pilipi ində taa kalangi aw ningə, ingə dingəm kare kī dənangı Etiyopi, kī in kī boi, kī njengəm nya maji'gi lə ngar kī dene kī Etiyopi'ti, kī tō'a nan Kandası. Dingəm kin aw Jerujalem'ti ɔsi dō'ne nanga non Luwə'ti ə isi təl kī be gogi.

28 Isi me pusı'ti lə'ne, isi tudə makitu lə njekeltakita Luwə'ti Ejay.

29 Lo kin'ti, Ndil Luwə el Pilipi ene: «Otì aw ndəkba kī rō pusı'ti kin.»

30 Pilipi anyi ngodi aw ningə, oo ndu dingəm kī Etiyopi'ti kakin isi tudə makitu lə njekeltakita Luwə'ti Ejay. Pilipi dəj'ə ene: «In gər me ta kī isi tudə kin maji infe wa?»

31 Dingəm kakin el'ə ene: «Re nje kör me'ə kadi'm goto ə m'a m'gər me'ə bann wa?» Ningə dəj'i Pilipi ad'a ala taa go'ə'ti, isi gəd'ə'ti me pusı'ti.

32 Ta kī isi tudə ə to kin:
«Ori'ə to batı kī de isi aw si'ə kadi tol'ə be;
To ngonn batı kī ra ta'ne mbo non nje kujə bin'ne'ti be.

In be ə, te'n ta'ne el.

33 Uləi rəsəl də'a'ti, gangi ta li'ə kī gorow kī dana el.

Nan a ɔr ginn kojı li'ə wa?

Tadə indəi ngangi ndə kisikidətaa li'ə*.»

34 Ningə, kuji dingəm un ta el Pilipi ene: «M'dəj'i kadi el'm adı m'oo, nan ə njekeltakita

* **8:33 8.33** 32-33; Ejay 53.7-8

Luwə'ti isi elta li'ə be wa? Si elta ki də rə'ne'ti
inbe eke isi elta də de madi'ti ki rangi wa?»

³⁵ Lo kin'ti nga a, Pilipi ingə row adi un ta
ta'ne'ti, ningə ki row lə makitu lə njekeltakita
Luwə'ti Ejay kin, ilə'n mbər Poyta ki maji lə Jeju.

³⁶ Loki njiyəi isi awi ningə, tei ta mann'ti, ə
kuji dingəm kakin el ene: «Mann ə ra'm, nga ri
ə ɔgi kadı m'ra batəm wa?»

³⁷ [Pilipi el'ə ene: «Re un me'i adi Luwə tokı
rəta'ti ə, nya ki ɔgi ra batəm goto.» Kuji dingəm
ene: «M'un me'm tokı Jeju Kirisiti in Ngonn
Luwə.】

³⁸ Lo kin'ti, adi pusı ra lokati, ningə ingi ki
Pilipi joo pəti, uri me mann'ti adi Pilipi ra'a
batəm.

³⁹ Loki tei me mann'ti ki taga ningə, Ndil
Burəbe un Pilipi aw si'ə adi kuji dingəm oo'ə el.
Nan in ulə row lə'ne ki rənel aw.

⁴⁰ Pilipi aw te me be'ti ki Ajoti, iləmbər Poyta ki
majı me ʃebo'gi'ti pəti ki te'ti, biti te'n Sejare'ti.

9

Sol un me'ne adi Burəbe Jeju (KNK 22.6-16, 26.12-18)

¹ Dəkagilo'ə'ti kin, mərta ki də kadı kon
njendo'gi'ti lə Burəbe ki də təl de'ti to də Sol'ti
bay. Be ə, aw rə kibo'ti lə njekujənyamosi
kadikare'gi,

² dəj'ə makitu kadı n'aw'n kəykawnan'gi'ti lə
Juwipi'gi ki me be'ti ki Damasi, kadı re n'ingə
dingəm'gi ki dene'gi ki nje ndolo go nyando ki
sigi kin ə n'uwa'de n're se'de Jerujalem'ti.

3 Lokì Pol in dɔ row'ti, ində dɔ be kì Damasi ndækba ningə, kunji madi te bus, in kì doran'ti, unji gugi dɔ'a.

4 Te osi nanga ningə, oo dɔ ndu ta madi el'e ene: «Sol, Sol, tado ri ə isi adi'm kon be wa?»

5 Sol dəj'ə ene: «In nan Burəbe?» Ningə, Burəbe el'e ene: «In m'in Jeju kì isi adi'm kon.»

6 Ində taa aw me bebo'ti ə, a eli'nu nya kì kadi a ra.

7 Nje kì isi ai kì Pol teli rai lokati. Bol tɔl'de adi lo kadi elita goto. Oyi dɔ ndu ta, nan oyi de madi el.

8 Sol ində taa, te kum'ne maji, nan oo lo el, adi mad'a'gi uwəi ji'ə, ndəri'ə to ndər, ə awi si'ə Damasi.

9 Si low'ə'ti non ndɔ mutə kì kanji kadi oo lo. So nya el num, anyi mann el num tɔ.

10 Ningə njendo lə Jeju kare isi Damasi'ti non, tɔ'a nan Ananiyasi. Burəbe bar'a me nya koo me ndil'ti ene: «Ananiyasi», ningə Ananiyasi ndigi ene: «M'in ne Burəbe.»

11 Burəbe təl un taa el'e ene: «Aw un row ki bari'ə row ki kɔl'ti, ə dəj'i me kəy'ti lə Judasi, de ki tɔ'a nan Sol ki Tarsi'ti, isi non isi elta ki Luwə.

12 Oo de madi ki tɔ'a nan Ananiyasi me nya koo me ndil'ti, ur kəy go'ə'ti ningə, ində ji'ne dɔ'a'ti kad'a oo lo gogi.»

13 Ə Ananiyasi el ene: «Burəbe, m'oo ta lə de kin ta de'gi'ti ngayn, ɔjidə kon'gi pəti ki adi de'gi lə'i ki me be'ti ki Jerujalem.

14 Ningə, ki ne kin, re ki tɔgi ki ingə rɔ kibo'gi lə njekujənyamosi kadikare'gi, kadi uwə de'gi ki isi eli sə'i ta, dɔɔ'de.»

15 Nan Burəbe el'e ene: «Aw, tado dingəm kin

in nyara kulə ki m'mbət'ə kadi elta lə'm non
ginn de'gi'ti ki dənangi'ti, ki non ngar'gi'ti, ki
non Isirayel'gi'ti.

¹⁶ M'inbe m'a m'oj'ɔ kon'gi pəti ki a te dɔ'a'ti
tadɔ lə'm.»

¹⁷ Ananiyası aw, ur kəy ində ji'ne dɔ'a'ti, ningə
el'ə ene: «Ngonnnkon'm Sol, in Burəbe ə ulə'm,
in Jeju ka ki te ingəi dɔ row'ti ki isi re'n kakin ə
ulə'm kadi m'ad'i oo lo. Ningə kadi Ndil Luwə
rosi tɔ.»

¹⁸ Tanan'ti non, nya'gi ki toi to ngoy kanji'gi be
tei kum Sol'ti tosi, adi təl oo lo gogi, ningə ində
taa adi rai'ə batəm.

¹⁹ Go'ti, sɔ nya ə, təl ingə tɔgi'ne gogi. Sol təl isi
ki njendo'gi lə Jeju ki me be'ti ki Daması ndɔ'gi
jɔ bay.

Sol ndo ta lə Luwə Daması'ti

²⁰ Tanan'ti non, Sol aw iləmbər me
kəykawnan'gi'ti lə Juwipi'gi ene: «Jeju in Ngonn
lə Luwə.»

²¹ De'gi pəti ki oyi dɔ ta kin ta Sol'ti, ndɔji'de
ngayn adi eli eyina: «In kam el ə in nje kadi kon
de'gi ki Jerujalem'ti ki nje bari tɔ kin wa? Re ra
un girə kadi uwə'de, dɔɔ'de aw se'de rɔ kibo'gi
lə njekujənyamosı kadikare'gi el biti wa?»

²² Nan Sol uwə rɔ'ne ngan adi kum'ə in kete
me kunme'ti li'ə. Juwipi'gi ki Daması'ti gəri lo
ta ki kadi eli'ə el, loki tɔji'de kadi Jeju in Kirisiti
De ki Luwə mbət'ə.

²³ Nga ndɔ'gi go'ti ngayn el ə, Juwipi'gi ojinan
ta kadi n'tɔli'ə

²⁴ Nan ta kojì lə'de te mbi Sol'ti. Ngəmi tarow
kada ge kondɔ ge kadi n'tɔli'ə.

25 Be ə, me kondɔ'ti madi, njendo'gi lə Sol, uni'ə me kara'ti, tuyi'ə adi osi gidi ndogi bɔr'ti.

Sol me be'ti ki Jerujalem

26 Go'ti, Sol aw te me be'ti ki Jerujalem ə, sangi kadı n'ində rɔ'ne nan'ti ki njendo'gi, nan pəti boli'ə, tado de ki un me'ne ad'a kadı in njendo ki rɔta'ti goto.

27 Be ə, Barnabasi un'ə me ji'ne'ti, aw si'ə rɔ njekawkulə'gi'ti, ɔr'de go kingə ki Jeju ingə Sol dɔ row'ti, ki k'oo ki oo Jeju el'ə ta, ki ta ki el ki taga wangı Damasi'ti me tɔ Jeju'ti.

28 Dokagilo'ə'ti gangı low'ə'ti non, Sol aw se'de ge, təl se'de ge nan'ti me be'ti ki Jerujalem. Elta ki kunme me tɔ Burəbe'ti.

29 Elta ki Juwipi'gi ki nje kelta Gireki, manjinan se'de ta'ti. Nan sangi row kadı n'tɔli'ə.

30 Lokı ngannkon'gi oyi ta'a ningə, ɔri'ə awi si'ə Sejare'ti. Ningə adi'ə aw me be'ti ki Tarsi.

31 Njekawnan'gi pəti ki dɔnangi Jude'ti, ki dɔnangi Galile'ti, ki dɔnangi Samari'ti, sii ki lapiya. Ingəi tɔgi, njiyəi me bol Burəbe'ti, taa kɔr'de in ki dɔ mad'a'ti dɔ mad'a'ti ki takul tɔgi lə Ndil Luwə tɔ.

Piyər aji Ene

32 Toki Piyər a njiyə'n ki lo'gi pəti oo'n de'gi lə Luwə, ndɔ kare aw te rɔ nje'gi'ti ki me be'ti ki Lida.

33 Lo kin'ti, ingə dingəm kare ki tɔ'a nan Ene, ki to dɔ tirə monyi'ti ra bal jijoo. Tado rɔ'a oy.

34 Piyər el'ə ene: «Ene, Jeju Kirisiti adi lapiya, ində taa, kaw nya toi.» Ningə Ene ində taa tanan'ti non.

35 De'gi pəti ki me be'ti ki Lida ki Saron oyi'ə, ə uni me'de adi Burəbe.

Piyər ndəl Dorkasi lo koy'ti

36 Dene madi in dann njendo'gi'ti ki me bebo'ti ki Jope non, tə'a nan Tabita. Tə kin ki ta Gireki nan Dorkasi. In dene ki nje ra kulə'gi ki maji maji ngayn, taa in njera ki njendoo'gi ki nya ki me ji'ne'ti tə.

37 Monyi ra'a dəkagilo'ə'ti kin adi oy. Lokı ndogi'ə mann ningə, ai iləi'ə me kəy'ti ki kare taa.

38 Be ki Lida in ndəkba ki Jope. Be ə, lokı njendo'gi oyi kadi Piyər in me be'ti ki Lida non ningə, uləi dingəm'gi joo rə'a'ti kadi re kalangi ingə'de.

39 Piyər ində taa aw se'de. Lokı re te rə'de'ti ningə, ori'ə awi si'ə me kəy'ti ki taa. Njengawko'ygi pəti iləi nan gugi də'a ki non, ningə təji ku'gi ki dangi dangi ki kojı tanan'ti ki Dorkasi ojı dəkagilo'ti ki si'n se'de ki də'ne taa bay.

40 Piyər adi de'gi pəti tei taga, ə əsi məkəsi'ne nanga elta ki Luwə, ningə yəti rə'ne ki rə ninn'ti el ene: «Tabita ində taa.» Lokı te kum'ne oo Piyər ningə, ndu rə'ne, ində isi taa.

41 Piyər ulə ji'ne un'ə'n'ə ki taa, ə, bar de'gi lə Luwə ki njengawko'ygi, əjii'de Tabita ki də'a taa.

42 Poy nya kin sanan ki dənangı ki Jope ba pəti, adi de'gi ngayn uni me'de adi Burəbe.

43 Piyər ra ndə ası tatı me be'ti ki Jope, me kəy'ti lə nje kər gidi ngirə ki tə'a nan Simon.

10

Körney ki in de ki Röm'ti oo nya me ndil

¹ Dingəm madi isi me be'ti ki Sejare non, tɔ'a nan Körney. In ki boi dɔ kuti njero'gi'ti ki bu kare, ki bari'ə «kuti ki Itali'ti.»

² In de ki njera nya kigo ndu Luwə'ti, taa, nan'ti ki de'gi pəti ki me køy'ti li'ə, in nje kosi məkəsi'de nanga non Luwə'ti tɔ. Nga ra maji ki njendoo'gi ngayn, taa elta ki Luwə taa taa tɔ.

³ Ndɔ kare, ki kadı ki mutə ki losol'ɔ, oo malayka lə Luwə me nya koo me ndil'ti ur me køy'ti li'ə, ningə bar'a ene: «Körney.»

⁴ Körney ur ki kum'ne dɔ'a'ti ki bol, ningə el'ə ene: «In ri ə Burəbe?» Nga a malayka el'ə ene: «Kelta ki Luwə lə'i ki maji ki isi ra ki njendoo'gi kin te rɔ Luwə'ti, ə Luwə ra maji ɔji'n dɔ'i.

⁵ Ningə ki ngɔsine kin, ulə dingəm'gi me be'ti ki Jope adi bari Simon ki bari'ə nan Piyər ad'a re.

⁶ Isi me køy'ti lə Simon ki nje kør gidi ngirə ki køy li'ə in kadı batı.

⁷ Lokı malayka ki el'ə ta kin ɔti ningə, Körney ulə ngann nje kulə'gi lə'ne joo ki nje rɔ lə'ne kare ki nje bol Luwə mbunə nje ki in nan'ti si'ə ki dɔkagilo'gi pəti adi'de rei.

⁸ Rei adi ɔr'de go nya'gi pəti ki ra nya adi'de oyi ningə, ulə'de adi ai Jope'ti.»

Piyər oo nya me ndil'ti me be'ti ki Jope

⁹ Lo ti go'ti, loki in dɔ row'ti isi awi, indəi dɔ bebo ndəkba ningə, Piyər ala dɔ køy'ti ki taa ki kadı ki dann be'ti tadɔ kelta ki Luwə.

10 Bo ra'a adi ge kuso nya. Ningə lokı isi rai nyakuso kadi so ə, oo nya me ndil'ti.

11 Oo doran ra tagira, ningə oo nya madi ki to to ta ku ki tati ki de uwə silə'gi ki so be ə in ki taa isi re ki nanga.

12 Me nya'ti kin non, da'gi ki dangi dangi in səm'ti: da'gi ki nja'de in so ge ki nje kagi nanga ge ki yəl'gi.

13 Ningə, ndu ta madi te el'ə ene: «Piyər, ində taa təl so.»

14 Nan Piyər ene: «Jagi Burəbe, m'in m'njə nya ki majel əd'ə, eke nya ki to njen nja kare el*.»

15 Ndu ta təl re el Piyər kel ki nja joo bay ene: «Nya ki Luwə təl'ə ki kar njay'ti, kadi in oo'ə to in nya ki to njen el.»

16 Nya kin ra nya be nja mutə, ningə tanan'ti non teli ndori'ə ki doran'ti gogi.

17 Piyər gər me nya ki oo me ndil'ti kin el, adi isi dəjì rə'ne ta də'ti, ningə nyi dingəm'gi ki Körney ulə'de ki ra sangi kəy lə Simon rei rai ta kəy'ti.

18 Ningə dəji ta ki ndu'de ki boi eyina: «In me kəy kin ə Simon ki bari'ə nan Piyər isi səm'ti wa?»

19 Piyər isi mərta də nya'ti ki oo me ndil'ti kin ba bay ningə, Ndil Luwə el'ə ene: «Oo dingəm'gi mutə ra sangi'nu.

20 Ində taa, ur nanga, ə aw se'de ki kanji kadi me'i təsi, tədo in m'in ə m'ulə'de.»

21 Piyər re rə dingəm'gi'ti kakın el'de ene: «In m'in ə m'in de ki isi sangi'ə, eke in ri ə isi sangi

* **10:14 10.14** Lebitiki 11.1-47; Ejəkel 4.14

m'in tə wa?»

²² Eli'ə eyina: «In Körney ki in ki boi dō kuti njero'gi'ti ki bu, ki in de ki dana, taa in nje bol Luwə tə kin ə ulə'je. In de ki Juwipi'gi pəti elita li'ə maji. Malayka ki ar njay re te ki dō ta rɔ'a'ti el'ə kadi ulə go'i'ti kadi re me køy'ti li'ə kadi oo dō ta ki ta'i'ti.»

²³ Piyər aw se'de ra'de mbah, adi'de lo toi'ti. Lokı lo ti go'ti ningə, ində taa aw se'de. Ngannkon'gi madi ki me be'ti ki Jope dani'ə.

²⁴ Lo ti ki rangi ningə tei Sejare'ti. Körney bar noji'ne'gi ki madi'ne'gi isi nginə'n'de kete.

²⁵ Lokı Piyər ur me køy'ti ningə, Körney ində taa tilə kum'ə, ə osi nanga nja'a'ti, ulə dō'ne nanga.

²⁶ Nan Piyər el'ə ene: «Ində taa, tado m'in ka m'in de tə.» Ningə ɔsi koy'č un'n'ə ki taa.

²⁷ Wali nan taa uri ki køy ningə, Piyər oo bulə de'gi ngayn kawinan sii.

²⁸ Lo kin'ti Piyər el'de ene: «Ingı, in gəri majı toki ndukun lə'je ɔgi kadi de ki in Juwipi ində rɔ'ne nan'ti ki de ki in Juwipi el, eke kadi ur me køy'ti li'ə. Nan Luwə el'm kadi m'oo de madi to nya ki majel, eke nya ki to njen el.

²⁹ Tado kin ə, m'mbəti'n bar lə'se el, m're ki kanji kelte madi ki rangi. Ningə toki bari'm'in, m'dəj'i'se m'oo ke in ri ə uləi go'm'ti wa?»

³⁰ Körney ene: «Ası ndə sə bone, ki dō kadi ki toki mad'a inbe kin be, adi in kadi ki mutə ki losol'č, ə m'nji m'elta ki Luwə me køy'ti lə'm, ningə dingəm madi ki ulə ku ki nda bal bal te ra non'm'ti, el'm ene:

³¹ "Körney, Luwə oo dō ta ki isi el si'ə, taa ɔjidə

maji'ti kì isi ra kì njendoo'gi kin tɔ.

³² Ó kadì ulə de madi Jope'ti, bar Simon kì bari'ə nan Piyər adi re. Si me køy'ti lə Simon kì nje ra kulə ngirə, kì isi kadì ba'ti ndəkba."

³³ Be ə, tanan'ti non par, m'ulə de rɔ'i'ti, ə nyi ra maji adi in re tɔ kin. Ningə kì ngosine kin, j'in pətì j'isi non Luwə'ti ne kadì j'oo dɔ ta'gi pətì kì Burəbe ində ta'i'ti kadì el'je.»

Piyər elta lə Luwə me køy'ti lə Körney

³⁴ Lo kin'ti, Piyər un ta ta'ne'ti el ene: «To kì rɔta'ti, m'gər kadì kɔr kum'de dana goto rɔ Luwə'ti.

³⁵ De kì ra ra, dann ginn de'gi'ti kì dangi dangi, kì in nje bol ndil'ə, kì njera nya kì dana ə, uwə kì rɔ'ne'ti.

³⁶ Ulə kì ta lə'ne kì rɔ ngann Isirayel'gi'ti, ilə'n'de mbər Poyta kì maji kì ɔjidɔ lapiya kì takul Jeju Kirisiti kì in Burəbe lə de'gi pətì.

³⁷ Toki in gəri, in nya kì ulə ngirə'ne Galile'ti, go batəm'ti kì Jan iləmbər'ə ə ra nya dənangi Jude'ti ba pətì.

³⁸ In gəri kadì Luwə adi Jeju kì Najareti'ti Ndil Luwə kì tɔgi kin maji. Jeju aw kì lo lo, ra maji kì de'gi, taa aji de'gi pətì kì sii ginn tɔgi'ti lə Su tɔ. Tado Luwə in si'ə nan'ti.

³⁹ J'in nje mannajì dɔ nya'gi'ti pətì kì ra dənangi'ti lə Juwipi'gi kì Jerujalem'ti. Bəri'ə dɔ kagidəsi'ti, tɔli'ə.

⁴⁰ Nan Luwə ad'a ində taa lo koy'ti ndɔ kì nja mutə lə ndɔ koy'o. Ad'a tarow adi tɔjì rɔ'ne taga,

41 ki rō de'gi pəti el, nan ki rō nje mannaji'gi'ti ki Luwə mbəti'de kete. Adi in j'in ki j'usoi si'ə ge, j'anyi si'ə ge go te'ə dann njekoy'gi'ti[†].

42 Jeju un ndu'ne adi'je kadi j'ilə mbər ki rō ginn de'gi'ti, ə kadi ji tɔjì tokì in n'in anyi Luwə ində'ne to njegangi ta dō nje kisikidɔ'de ta'a'ti ki njekoy'gi.

43 De'gi ki njekeltakita Luwə'ti pəti manyinajı dɔ'a'ti eli eyina: "De ki ra ki un me'ne ad'a ə, Luwə a inyə go majel'gi li'ə kɔ me tɔ'a'ti‡."»

44 Loki Piyər isi el ta'gi kin ba bay ningə, Ndil Luwə ur ki dō de'gi'ti ki isi oyi dō ta li'ə.

45 Nya kin əti bol nje kunme'de kadi Luwə ki in Juwipi'gi ki dani Piyər, loki oyi kadi Luwə buki Ndil'ne dō ginn de'gi'ti ki in Juwipi'gi el tɔ.

46 Tadō oyi ndu'de isi elita ki ta be'gi ki dangi dangi uləi tɔjì dō Luwə'ti.

47 Ningə Piyər el ene: «Tokì ingəi Ndil Luwə to j'in be tɔ kin, nya ki ɔgi'de dō ra batəm goto.»

48 Be ə Piyər un ndu'ne adi rai'de batəm me tɔ Jeju Kirisiti'ti, ə go'ti, dəji Piyər kadi isi se'de nan'ti ndo'gi nden bay taa kadi to təl.

11

Jerujalem'ti, Piyər ɔji nya'gi ki rai nya

1 Njekawkulə'gi ki ngannkon'gi ki sii Jude'ti oyi kadi de'gi ki in Juwipi'gi el ka oyi ta lə Luwə tɔ.

2 Loki Piyər aw Jerujalem'ti, njekunme'de kadi Luwə, ki in nje kujə mɔti'de'gi gaki'ə ngayn,

† **10:41 10.41** Luk 24.30, 42 ‡ **10:43 10.43** Ejay 53.5-6; Jeremi 31.34

³ eyina: «Aw rɔ de'gi'ti ki ujəi mɔti'de el, aw sɔ se'de nya!»

⁴ Lo kin'ti, Piyər ilə rɔ'ne ɔr'de go nya'gi ki rai nya ki go'ə go'ə adi'de oyi.

⁵ Piyər el ene: «M'in me bebo'ti ki Jope, ningə lokı m'nji m'elta ki Luwə, m'oo nya me ndil'ti. In nya madi ki to to ta ku ki tati ki de uwə silə'gi ki sɔ be ə in dɔran'ti, risi biti re non'm'ti.

⁶ M'ur kum ki dɔ ta ku'ti kakın m'nji m'gon, ningə m'oo da'gi ki nja'de in sɔ, ki nje kagi nanga, ki da'gi ki mu'ti ki yəl'gi ki nje nal kadi dɔran'ti.

⁷ Ningə m'oo ndu ta madi el'm ene: "Piyər, ində taa, tɔl ə sɔ."

⁸ Ə m'el m'ene: "Jagi Burəße, nya ki to njen ɔdi ta'm nja kare el."

⁹ Nja joo, ndu ta təl te dɔran'ti bay ene: "Nya ki Luwə təl'ə ki kar njay'ti ə, kadi oo'ə to nya ki to njen el."

¹⁰ Nya kin ra nya be asi nja mutə, ningə teli tuyi'ə dɔran'ti.

¹¹ Ningə tanan'ti non, dingəm'gi mutə ki ulə'i'de me be'ti ki Sejare'ti, ki rɔ'm'ti rei rai takəy'ti ki m'nji'ti.

¹² Ndil Luwə el'm kadi m'aw se'de um m'mbəti el. In be ə ngannkon'm'gi ki mehen kam dani'm'in, ə j'uri'n me kəy'ti lə Körney.

¹³ Körney oji'je gorow ki n'oo'n malayka ki te ki rɔ'ne'ti, me kəy'ti lə'ne, el ene: "Ulə de madi me be'ti ki Jope kadi el Simon ki ʃari'ə Piyər kadi re.

¹⁴ A eli nya'gi ki a rai sə'i kadi ingə'n kajı nan'ti ki nje ki me kəy'ti lə'i."

15 Lokì m'a m'elta ba bay ningə, Ndil Luwə risi re dō'de'ti tokì ndɔki re'n dō'je'ti lo kulə ngirə'ti kakin be.

16 Nga ra adi me'm olo dō ta'ti lə Burəbe ki ene: "Jan ra batəm me mann'ti, nan ingi, a rai'se batəm me Ndil Luwə'ti*."

17 Eke, tokì Luwə adi'n(de kadikare ki kare inbe tokì adi'n'je, j'in ki j'uni me'je j'adi Burəbe Jeju Kirisiti kin, kadi m'in m'tanrɔ Luwə wa?»

18 Lokì oyi dō ta kin ningə, hangal'de osi nanga adi uləi tɔjì dō Luwə'ti eyina: «Ginn de'gi ki dɔnangi'ti kaa Luwə adi'de kajì ki gorow k'inyə go majel kɔ.»

Kində ginn Njekawnan'gi me be'ti ki Antiyosi

19 Kindəkumndoo ki te dō Etiyenn'ti ra adi njendo'gi sananyinan[†], ai biti tei me be'ti ki Penesi, ki Sipir, ki Antiyosi. Lokì ai, elita lə Luwə Juwipi'gi par um de ki rangi el.

20 De'gi madi'gi dann'de'ti non, ki in njekunme'gi ki in ginn koji'ti ki Sipir, ki Sirenn ki awi Antiyosi'ti, eli Poyta ki maji lə Burəbe Jeju ginn de'gi ki in Juwipi'gi el ki fari'de Gireki'gi tɔ.

21 Tɔgi Burəbe in se'de nan'ti adi de'gi ngayn teli ki rɔ Burəbe'ti uni me'de adi'ə.

22 Poy nya'gi ki ra nya kin te rɔ Njekawnan'gi'ti ki sii Jerujalem, adi uləi Barnabasi adi'ə aw Antiyosi'ti.

23 Lokì aw te rɔ'de'ti, ə oo memajì lə Luwə ki ra kulə ningə, rɔ'a nəl'ə ngayn adi ulə dingəm me'de'ti pəti kadi rai dō nja'de me kində rɔ nan'ti ki Burəbe.

* **11:16 11.16 1.5** † **11:19 11.19 8.1-4**

²⁴ Barnabasi in de ki dana, Ndil Luwə ros'o, taa aw ki kunme tō, adi bulə de'gi ngayn rei ki rō Burəbe'ti.

²⁵ Barnabasi aw me be'ti ki Tarsi kadi n'sangi Sol.

²⁶ Lokı ingə ningə, aw si'ə Antiyosi'ti, rai bal kare səm'ti. Kawinan ki Njekawnan'gi, ndoi ta lə Luwə bulə de'gi ngayn. In me be'ti ki Antiyosi'ti ə nyi de'gi uləi ngirə bar njendo'gi de'gi lə Kirisiti'ti.

²⁷ Dəkagilo'ə'ti non, de'gi ki njekeltakita Luwə'ti in Jerujalem'ti ai biti ki Antiyosi'ti.

²⁸ In ki kare dann'de'ti, tō'a nan Agabusi‡, ində taa ningə elta ki takul Ndil Luwə tokı bo ki bo ngayn a on dənangi'ti ki ta'a ba. Ningə nya kakin ra nya dəkagilo'ti lə nje konbe kibo ki bari'ə nan Kildi tō.

²⁹ *Njendo'gi uni ndu'de kadi n'uləi ki nya ki ji'de'ti, nan nan kigo təg'ɔ'ti kadi n'ɔsi ginn ngannkon'de'gi ki sii Jude'ti.

³⁰ Adi nya maji'gi lə'de kakin Barnabasi in ki Sol adi awi adi ngatɔgi'gi.

12

Kindəkumndoo ki ra Njekawnan'gi ki Jerujalem

¹ Dəkagilo'ə'ti inbe kin ə ngar Erodi ulə ngirə kadi kon Njekawnan'gi ki nan'gi.

² Təl Jakı ki ngonnnkon Jan ki kiyərə.

‡ **11:28 11.28 21.10**

3 Nan Lokì oo kadi nəl Juwipi'gi ngayn, ningə təl adi uwəi Piyər bay. In dəkagilo ra nanyi mapa ki hum əd'c el*.

4 Lokì uwə ilə dangay'ti ningə, adi nje rɔ'gi sə sə nja sə ngəmi'ə. Nga ra be kadi to n'te si'ə taga non bulə de'gi'ti go pəti Paki'ti.

5 Piyər to dangay'ti, nan Njekawnan'gi inyəi ta kelta ki Luwə el tado li'ə.

6 Me kondɔ'a'ti ki kadi re lo ti ə, Erodì te si'ə non bulə de'gi'ti kakin ningə, Piyər to bi mbunə njero'gi, dɔi'ə ki kulə gindı joo. Ningə njengəm lo'gi, rai ta kəy'ti, ra ngəmi takəy dangay tɔ.

7 Lo kin'ti, malayka lə Burəbe kare te pati, adi kunjə taa lo me kəy dangay'ti, lo ki Piyər to'ti. Malayka ində Piyər kad'a'ti ndəl'n'ə ene: «Ində taa kalangi!» Ningə kulə gindı'gi ki ji'ə'ti tei tosi.

8 Malayka el'ə ene: «Dəc ndar ki bəd'i'ti, ə tulə sa nja'i'ti.» Ningə Piyər ra toki el'n'ə. Malayka el'ə bay ene: «Ulə ku lə'i rɔ'i'ti ə un go'm.»

9 Piyər te go'ə'ti, nan gər toki in malayka ə re te si'ə toki rɔta'ti, el. Oo toki in nya ki oo me ndil'ti.

10 Lokì indəi njengəm lo ki dəkete, ki ki nja joo dəri ningə, rei tei ta tarow gindı'ti ki aw ki bebo'ti, tarow inbe te dərɔ'ne par non'de'ti, adi tei taga awi də row'ti. Lokì tei də row'ti ningə, tanan'ti non, malayka inyə ə aw.

11 Lokì hangal'a re rɔ'a'ti ningə el ene: «M'oo toki rɔta'ti kadi in Burəbe ə ulə malayka lə'ne adi re te sə'm ji Erodì'ti, ki ta nya'gi'ti ki majel pəti ki bulə Juwipi'gi oji kadi rai sə'm.»

* **12:3 12.3** Tekitaga 12.1-27

12 Lokì ojì ta be ningə, ilə dō'ne aw be lə Mari ki kon Jan ki bari'ə nan Marki. De'gi ngayn kawinan me køy'ti non isi elita ki Luwə.

13 Lokì ində takøy ningə, ngonn njekulə ki dene ki tɔ'a nan Rodi ɔti re kadi n'oo.

14 Gər ndu Piyər adi tarow kaa te el bai par ə, rɔ'a nəl'ə ngayn adi təl ki ngodi aw el'de ene Piyər ra takøy'ti non.

15 Eli'ə eyina: «In nje woy.» Nan ra dō ndu'ne'ti toki in ta ki rɔta'ti. Nga a təli eli eyina: «In malayka li'ə.»

16 Low'ə'ti kin, Piyər ra ta kində takøy'ti par par. Ə lokì rei tei takøy ningə, in Piyər inbe, adi gəri lo ta ki kadi eli el.

17 El'de ta ki ji'ne kadi elita el, ningə ɔr'de go te ki Burəbe te sə'ne dangay'ti adi gəri. Go'ti, el'de ene: «Awi eli Jaki ki ndəgi ngannkon'je'gi adi oyi.» Ningə te aw lo ki rangi'ti.

18 Lokì lo ti ningə, dō njero'gi isi dana el. Dəji nan ke ri dana ə Piyər təl wa?

19 Ngar Erodı sang'a ngayn nan ingə el. Go'ti, dəjì ta njero'gi, ə un ndu'ne kadi təli'de kə. Piyər inyə dənangi Jude ə in aw Sejare'ti, aw isi səm'ti nu.

Koy lə ngar Erodı

20 Erodı aw ki ta ki de'gi ki Tir'ti, ki Sidon. Ə de'gi ki Tir ki Sidon indəi ndu'de nan'ti rei ingəi'ə. Lokì ndogi me Bilasitusi ki nje k'oo go ta lə ngar Erodı taai ningə, dəji kadi lapiya to dann'de'ti. Kadi lapiya to tədə nya maji'gi ki dənangi'ti lə'de ngirə in me be'ti lə ngar Erodı.

21 Lokî te me ndɔ'ti kî ɔji ningə, Erodi ulə ku konbe lə'ne rɔ'ne'ti, isi dɔ kumbər ngar'ti lə'ne, el bulə de'gi ta kongi kongi.

22 Bulə de'gi uləi tɔjî dɔ'a'ti eyina: «In ndu luwə madi um in ndu de el.»

23 Low'ə'ti non malayka lə Burəbe ində ɔj'ɔ tado adi kɔsikurə Luwə el. Go'ti kode'gi ində'i'ə nyəngi nyəngi adi oy.

24 Nan ta lə Luwə taa lo aw kî kete kete, adi kɔr njendo'gi re kî dɔ mad'a'ti.

25 Lokî Barnabasi in kî Sol tɔli konn kulə lə'de kî awi kadi rai ningə, inyəi bebo kî Jerujalem ə awi. Uni Jan kî bari'ə Marki nan'ti se'de ə teli awi me be'ti kî Antiyosi gogi.

13

Njekawnan'gi indəi Barnabasi in kî Sol ta dangi tado kulə lə Burəbe

1 De'gi kî njekeltakita Luwə'ti kî njendo de'gi nya lə Luwə sii dann Njekawnan'gi'ti kî Antiyosi'ti non. Adi in: Barnabasi kî Simeyon kî bari'ə Nijer, kî Lisiyusi kî be li'ə in Sirenn'ti, kî Manaye kî oti'de nan'ti kî Erodi kî isi dɔ dɔnangi'ti kî Galile*, kî Sol tɔ.

2 Ndɔ kare be ɔsi məkəsi'de nanga non Luwə'ti ə elita si'ə kî kɔgi rɔ nyakusɔ tɔ. Ningə Ndil Luwə el'de ene: «Kadi ɔri Barnabasi ingi kî Sol ində'i'de ta dangi tado kulə kî m'bari'de kadi rai.»

3 Nga a, lokî ɔgi rɔ'de nyakusɔ ə elita kî Luwə ningə, indəi ji'de dɔ'de'ti ə inyəi'de adi awi,

* **13:1 13.1** Erodi Antipasi; Luk 3.1

Kulə'gi lə njekawkulə'gi 13:4 li Kulə'gi lə njekawkulə'gi 13:12

4 tokì Ndil Luwə el'n'de. In be ə, Barnabasi in ki Sol awi me be'ti ki Seləsi. Ningə rai non gangi awi Sipir'ti.

5 Lokì tei Salaminn'ti, elita lə Luwə me kəykawnan'gi'ti lə Juwipi'gi. Jan in kadi'de'ti to njera se'de tɔ.

6 Lokì indəi dɔ dor'gi ki be'ti ki Sipir'ti gangi ningə, ai tei me be'ti ki Paposi. Low'ə'ti non, ingəi Juwipi kare be ki tɔ'a nan Bar-Jeu ki in njera mboli, ki bar rɔ'ne njekeltakita Luwə'ti.

7 Isi nan'ti ki de ki boi ki tɔ'a nan Serjiyusi Polusi ki in nje nyagər. Serjiyusi Polusi ə Barnabasi in ki Sol ɔji'de adi gəri tokì n'aw ki bo k'oo ta lə Luwə ta'de'ti.

8 Nan Elimasi ki kɔr ginn tɔ'a nan nje mboli tan'de rɔ. Ge kadi de ki boi kin un me'ne adi Kirisiti el.

9 Be ə, Sol ki bari'ə Pol, Ndil Luwə ros'o adi ur kum'ne ki dɔ'a'ti,

10 el'ə ene: «In ngonn lə Su, to de ki nje bal de'gi, in rosi ki mendul. In nje kɔsi ta nya ra'gi ki dana pəti. A inyə taa mbir row'gi ki dana lə Burəbe el wa?»

11 Ki ngosine kin, Burəbe a indəi ɔji, kum'i a oo lo el, ningə a oo kum kadi el biti dɔkagilo madi. Ningə tanan'ti non par ə kum'ə ndul kururu adi oo lo el, ra mam lo. Sangi de ki kadi ɔr'ɔ tarow.

12 Lokì de ki boi oo nya ki ra nya kin ningə, un me'ne ad'a, tadɔ nyando ki dɔ Burəbe'ti ki adi'ə, əti bol ngayn.

Pol elta Lə Luwə me be'ti ki Antiyosi ki Pisidi

Kulə'gi lə njekawkulə'gi 13:13 lii Kulə'gi lə njekawkulə'gi 13:22

13 Pol in ki madi'ne'gi ali me to'ti me be'ti ki Paposi, awi me be'ti ki Perji ki Pampili'ti, ningə Jan Marki[†] inyə'de ə təl aw Jerujalem'ti gogi.

14 Loki ɔti me be'ti ki Perji ningə, awi tei me be'ti ki Antiyosi ki Pisidi'ti, ai me kəykawnan'ti lə Juwipi'gi ki ndə körkon, sii nanga.

15 Loki nje tudə makitu'gi, tudəi makitu ndukun ki makitu lə njekeltakita Luwə'ti ningə, ki boi ki də njengəm kəykawnan'ti lə Juwipi'gi uləi eli'de eyina: «Ngannkon'je'gi, kin ə awi ki ta kadi eli uləi dingəm me de'gi, ə kadi eli.»

16 Ə Pol ində taa, yəki ji'ne ta'de'ti kadi sii keke, ningə el'de ene: «In Isirayel'gi ki de'gi ki nje bol Luwə, kadi oyi də ta lə'm.

17 Luwə lə'je, j'in bulə Isirayel'gi, mbəti baw'je'gi, ningə ra se'de adi oji nan ki kete kete, loki sii me be'ti ki Ejipiti. Or'de te se'de ki taga ki takul tog'ɔ ki ngayn.

18 Asi ʃal dəsə ki adi'de nya sɔi diləlo'ti‡.

19 Loki təko ginn de'gi siri ki dənangi'ti ki Kana non'de'ti ningə, təl ki dənangi kakin adi'de to nya nduwə§.

20 Nya'gi pəti ki rai nya kin, a ra bal asi ʃu sɔ ki dəmi. Go'ti ningə, adi'de njegangi ta'gi biti te'n də njekeltakita Luwə'ti Samiyel.

21 Ningə, dəji ngar adi Luwə adi'de Sol ki ngonn lə Kisə, ki in ginn kaw'ti lə Benjamen, adi onbe də'de'ti ʃal dəsə.

22 Loki or'ɔ ko ningə, ində Dabidi ngar'ti

† **13:13 13.13** Jan Marki; 12.12,25, 13.5 ‡ **13:18 13.18** 17-18; Tekitaga 1.7, 12.51; Kör Isirayel'gi 14.34; Ndukun ki nja joo 1.31

§ **13:19 13.19** Ndukun ki nja joo 7.1; Jojuwe 14.1

tor'o'ti. Dabidi ki Luwə mannajı li'ə ene: "M'ingə Dabidi ki in ngonn lə Jese, ki in de kigo me ndigi'ti lə'm. A tōl kon nya'gi pəti ki me'm ndigi*."

²³ In ginn kaw'ti li'ə ə, Luwə adi Jeju ki Njekaji Isirayel te'ti, kigo ndukun'ti li'ə.

²⁴ Kete non re Jeju'ti, Jan iləmbər kadi de'gi tɔri ndu'de, ningə kadi rai batəm. Iləmbər kin ki rɔ bulə Isirayel'gi'ti ba pəti.

²⁵ Loki Jan aw kadi tɔlta kulə lə'ne ningə, el ene: "M'in de ki isi mərīta dɔ'a'ti kin el. Nan in a re go'm'ti non ki kulə sa ki nja'a'ti ka m'in m'asi tuti el[†]."

²⁶ «Ngannkon'm'gi ki ginn kaw'ti lə Abiram, ki nje bol Luwə ki dann'se'ti, in j'ingi ə Luwə ulə ki ta kajı kin rɔ'je'ti.

²⁷ De'gi ki nje kisi Jerujalem'ti ingi kibo'gi lə'de gəri de ki in Jeju kin el, taa gəri me ta'gi lə de'gi ki njekeltakita ki ta Luwə'ti, ki isi tudəi ki ndɔ kɔrkon'gi pəti kin el tə. Be ə loki gangi ta dɔ Jeju'ti, tɔlita ta'gi ki njekeltakita Luwə'ti ndangi.

²⁸ Ingəi nya madi kare ki asi kadi tɔli'ə el, nan dəji Pilati kadi tɔl'o par.

²⁹ Loki tɔli kon nya'gi pəti ki ndangi me makitu'ti ojido'a ningə, adi risi'ə dɔ kagidəsi'ti nanga, il'ə me be ninn'ti[‡].

³⁰ Nan Luwə ad'a ində taa dann njekoy'gi'ti.

³¹ Asi ndɔ ngayn ki te ki rɔ de'gi'ti ki in si'ə dɔnangi Galile'ti nu, ə rei si'ə biti Jerujalem'ti,

* **13:22 13.22** 21-22; 1 Samiyel 8.5, 19, 10.21, 13.14, 16.12

† **13:25 13.25** Jan 1.20,27; Mat 3.11; Mrk 1.7; Luk 3.16 ‡ **13:29**

13.29 28-29; Mat 27.22-23, 57-61; Mrk 15.13-14,42-47; Luk 23.21-23, 50-56; Jan 19.15, 38, 42

Kulə'gi lə njekawkulə'gi 13:32 liv Kulə'gi lə njekawkulə'gi 13:40

ingi kin ə in nje mannaji li'ə ki non bulə de'gi'ti§.

³² J'in kaa j'isi j'ilə'se mbər Poyta ki maji kin tə. Poyta ki maji ki in ta kun mindi ki Luwə un ndu'ne dō'ti adi baw'je'gi.

³³ Luwə təlta kun mindi kin ki rəta'ti j'in ngann de'gi ki gorow te ki adi Jeju te lo koy'ti toki ndangi me makitu Pa'gi'ti eyina:

"In Ngonn'm,
ki m'oj'i bone*."

³⁴ «Luwə ad'a ində taa lo koy'ti um ad'a ndum me be ninn'ti el, toki el'n ene:

"M'a m'adi'se nya,
Ki m'un mindi'm dō'ti m'adi Dabidi,
Ki in nya ki asi kadi awi ki kunme dō'ti†."

³⁵ «In tadə kin ə, el'n me makitu'ti lo madi'ti bay ene: "A inyə njekulə lə'i ki ar njay kadi ndum be ninn'ti el‡."

³⁶ Nan Dabidi, loki ra kulə dəkagilo'ti lə'ne kigo kəjitarə'ti lə Luwə ningə, oy adi duwi'ə gədi kaw'a'gi'ti, ningə ndum me be ninn'ti.

³⁷ Nan in ki Luwə ad'a ində taa lo koy'ti ndum me be ninn'ti el.

³⁸ «Kadi gəri maji ngannkon'm'gi, toki in ki takul'ə ə isi iləi'se mbər ki ɔjido k'inyə go majel kə, ki təl de ki dana takum Luwə'ti ki asi kadi ingəi me ndukun'ti lə Moji el.

³⁹ In ki takul'ə tə ə, re de ki un me'ne ningə, Luwə təl'ə de ki dana takum'ne'ti.

⁴⁰ Tadə in kin ə, kadi oyi go rɔ'se maji nan to ta ki de'gi ki njekeltakita Luwə'ti eli kin ta'a təl dō'se'ti:

§ 13:31 13.31 1.3 * 13:33 13.33 Pa'gi 2.7 † 13:34 13.34 Ejay
55.3 ‡ 13:35 13.35 Pa'gi 16.10

Kulə'gi lə njekawkulə'gi 13:41 lv Kulə'gi lə njekawkulə'gi 13:47

41 De'gi kī njekeltakita Luwə'ti eli eyina:
"In nje kɔjì rɔ'se,
Kadi oyi go rɔ'se maji,
A oyi nya kī a əti'se bol biti kadi a gotoi kɔ.
Tado dɔkagilo'ti lə'se, m'a m'ra nya madi.
Nya kī re de ɔr'se poy'o ka, a uni me'se dɔ'ti
el§."»

42 Lokì Pol in kī Barnabasi isi tei taga ningə, dəji'de kadi ndɔ kɔrkon kī gogi ə kadi təli rei ndoi'de ta kin bay.

43 Lokì bulə Njekawnan'gi sananyinan ningə, Juwipi'gi kī de'gi kī təli Juwipi'gi kī nje bol Luwə, dani Pol kī Barnabasi, a wali nan ta se'de. Ningə Pol kī Barnabasi uləi dingəm me'de'ti kadi uwəi rɔ'de ba me memajì'ti lə Luwə kin.

*Pol kī Barnabasi yəti rɔ'de kī rɔ ginn de'gi'ti
ki in Juwipi'gi*

44 Ndɔ kɔrkon'ti kī gogi ningə, bulə de'gi ngayn kī me bebo'ti kawinan kī nan'ti kadi n'oyi dɔ ta lə Burəbe.

45 Lokì Juwipi'gi oyi bulə de'gi ningə, ni ra'de adi taji Pol, ə eli ta'gi kī majel ndɔri ta li'ə.

46 Pol kī Barnabasi eli'de ki me kī tinyi katı eyina: «In ingi ə kadi j'ilə'se mbər ta lə Luwə kin kete, nan tokì mbəti ə oyi tokì ingi asi ta kajì kī biti kī non'ti el, j'a jì təl jì yəti rɔ'je kī rɔ ginn de'gi'ti kī in Juwipi'gi el'ti.

47 Tado Burəbe lə'je un ndu'ne adi'je ene:
"M'indəi kadi in kunjì tado ginn de'gi kī dɔnangi'ti,
Kī kadi aw kī ta kajì biti kī dɔboy dɔnangi'ti*."»

48 Lokì ginn de'gi kì in Juwipi'gi el oyi dō ta kin ningə, rai rōnel ngayn dō'ti, adi uləi tɔjì dō ta'ti lə Burəbe, adi de'gi pətì kì Luwə mbəti'de tadə kajì kì biti kì non'ti, uni me'de.

49 Ta lə Burəbe sanan kì dənangì kì Antiyosi'ti kì ta'a ba.

50 Nan Juwipi'gi suləi dene'gi kì in dene'gi kì njetəbar kì me be'ti, kì nje kəsikurə Luwə, kì de'gi kì boi kì me be'ti adi indəi kum Pol kì Barnabasi ndoo, ningə tuwəi'de me be'ti lə'de ko.

51 Pol kì Barnabasi indəi bu kì nja'de'ti kì dō be'ti lə'de ningə, ɔti ai me be'ti kì Ikoniyom†.

52 Kì rō njendo'gi'ti lə Jeju ə, rō'de nəl'de ngayn, taa Ndil Luwə kaa rosi me'de tɔ.

14

Pol kì Barnabasi me be'ti kì Ikoniyom

1 Lokì Pol kì Barnabasi awi Ikoniyom'ti, awi me kəykawnan'ti lə Juwipi'gi kì Ikoniyom'ti tɔ. Awı eli de'gi ta lə Luwə kì ra adi de'gi ngayn kì in Juwipi'gi kì nje kì in Gireki'gi uni me'de adi Luwə.

2 Nan Juwipi'gi madi kì nje me ngan, indəi taa kì majel me de'gi'ti kì in Juwipi'gi el, suləi'de dō ngannkon'gi'ti.

3 Be kaa, Pol kì Barnabasi sii Ikoniyom'ti ndə banyi banyi. Eli ta lə Luwə kì me kì tinyi katì, indəi tɔgi'de dō Burəbe'ti kì mannajì dō memajì'ti li'ə kì isi iləi mbər'ə, adi'de tɔgi adi rai nyakɔjì'gi kì nya'gi kì əti bol.

† 13:51 13.51 Mark 6.11

4 Lo kin'ti, de'gi ki me bebo'ti gangi nan lo joo, nje ki madi'gi in go Juwipi'gi'ti, nje ki nungi in go njekawkulə'gi'ti tɔ.

5 Nje ki in Juwipi'gi el, ki nje ki in Juwipi'gi ki kibo'gi lə'de indəi dɔ rɔ'de dana kadi n'adi kon Pol in ki Barnabasi, kadi n'tiləi'de ki mbal n'tɔli'de.

6 Nan Pol ki Barnabasi oyi ta kin, adi anyinan awi iyəi rɔ'de bebo'gi'ti ki Likawoni, ki Lisitir, ki Dərbəi, ki ngann lo'gi ki gidi'ti.

7 Lo'gi'ti kin kaa, iləi mbər Poyta ki maji səm'ti tɔ.

Pol ki Barnabasi me be'ti ki Lisitir

8 Me be'ti ki Lisitir, dingəm kare ki nja'a oy ta ginn'ə'ti isi non. Nja'a oy lo koj'o'ti nu, adi njiyə nja kare el.

9 Ə ndɔ kare, ur mbi'ne isi oo'n ta ki Pol ra el. Ningə, Pol uwə kum'ne ki dɔ'a'ti oo'ə'n ba, ningə oo kadi aw ki kunme ki kadi ingə'n kajı.

10 Lo kin'ti, Pol el'e ta ki tɔgi'ne ene: «In, ra taa dɔ nja'i'ti!» Ningə Dingəm uwə nangi ra ta, ra njiyə.

11 Lo ki bulə de'gi oyi nya ki Pol ra kin ningə, uni ndu'de ki taa, elita ki ta Likawoni eyina: «Oyi, luwə'gi təli rɔ'de de'gi'ti, rei uri nanga dann'je'ti.»

12 Be ə, bari Barnabasi «Jəsi», ə bari Pol «Ermesi» tɔ, tado Pol ə in njekelta.

13 Njekujənyamosi kadikare lə Jəsi, ki isi ta lo'ti taga gidi bebo'ti, re ki baw mangi'gi ki doi nya'gi ki ndolo rɔ'de'ti. Re se'de, ningə, ndu'de in nan'ti ki bulə de'gi, kadi n'iləi mosi n'adi Pol ki Barnabasi.

Kulə'gi lə njekawkulə'gi 14:14 lviii Kulə'gi lə njekawkulə'gi 14:22

14 Nan loki, njekawkulə'gi, Pol in ki Barnabasi
oyi poyta kin, gangi ku rɔ'de'ti, ə anyinan ki rɔ
bulə de'gi'ti, uni ndu'de ki taa, eli'de eyina:

15 «Madi'je'gi, ra bann ə ra rai nya be wa?
J'in kaa j'in de'gi to ingi be tɔ, ningə, re j'ilə'se
mbər Poyta ki maji ningə, in kadi inyəi kagi yo'gi
ki nda'de goto ki isi rai'de, ə kadi təli rɔ'se go
Luwə'ti ki nje kisi kumngayira, Luwə ki njera
doran ki dənangi ki nya'gi pəti ki me'ti*.

16 Dəkagilo'gi'ti ki dər kete, Luwə inyə de'gi
pəti adi uni row ki me'de ndigi.

17 Be kin kaa inyə ta tɔjı memajı lə'ne el: Ulə
ki mann ndi doran'ti adi'se ge, adi'se dəkagilo ki
majı adi ingəi kandi nya ge, adi'se nyakuso ki to
mbar ge, adi rɔnel rosi me'se ge.»

18 Ta'gi ki eli kin kaa, ngan se'de ngayn kadi
ɔgi bulə de'gi kilə mosi nanga kadi'de.

19 Lo kin'ti, Juwipi'gi ki in Antiyosi ki Pisidi'ti,
ki Ikoniyom, rei, suləi bulə de'gi kakin, ʃuki'de
go'de'ti, adi tiləi Pol ki mbal kadi n'tɔli'ə, ə
ndɔri'ə, awi si'ə, iləi'ə gidi be'ti, oyi eyina oy.

20 Nan loki njendo'gi kawinan ki dɔ'a'ti, ində
taa, təl aw me bebo'ti gogi. Ningə lo ti go'ti, in
ki Barnabasi awi ki Dərbi'ti.

Pol ki Barnabasi təli gogi ki Antiyosi'ti ki Siri

21 Lokı Pol ki Barnabasi iləi mbər Poyta ki maji
Dərbi'ti, de'gi ngayn təli njendo'gi lə Kirisiti.
Ningə ingi, təli uni dɔ nja'de, tei Lisitir ki
Ikoniyom, ki Antiyosi ki Pisidi'ti.

22 Uləi dingəm me njendo'gi'ti, adi'de ta kojı
kadi uwəi tɔgi'de ba me kunme'ti lə'de. Ningə,

* **14:15 14.15** Tekitaga 20.11; Pa'gi 146.6

rai dō'ti non eli'de eyina: «In kī kon kī ngayn ə j'a j'oo'n Konbe lə Luwə.»

²³ Pol kī Barnabasi indəi ngatogi'gi dō Njekawnan'gi'ti pəti kī tei dann'de'ti. Ogi rō'de nyakuso, elita kī Luwə, ə go'ti, inyəi'de ji Burəbe'ti kī uni me'de adi'ə.

²⁴ In non, indəi me be kī Pisidi gangi, awi tei Pampili'ti[†].

²⁵ Iləi mbər poyta lə Luwə me be'ti kī Perji, ə awi tei ta ba'ti kī Atali.

²⁶ Lo kin'ti non, uni tokibo kaw Antiyosi'ti. Antiyosi kī in be kī ndəki njekornon Njekawnan'gi kī me'ti, inyəi'de ji Luwə'ti. Inyəi'de ji Luwə'ti kadi memajı li'ə in dō'de'ti tado kulə kī in lo ra'a'ti kin.

²⁷ Loki tei Antiyosi'ti, kawi Njekawnan'gi, eli'de nya'gi pəti kī Luwə un'de ra'n. Oji'de te kī Luwə te tarow kunme adi de'gi kī in Juwipi'gi el.

²⁸ Sii kī njendo'gi dōkagilo ngayn Antiyosi'ti.

15

Kingə nan kī Jerujalem dō ta kujə məti'ti

¹ De'gi kī nan'gi in Jude'ti rei Antiyosi'ti ndoi ngannkon'je'gi nya eyina: «Kin ə re adi ujəi məti kī kigo ndu'ti lə Moji el ə, a ingəi kajı el*.»

² Nyando kin re ki ta kasi nan el, ki gaki nan kibo ngayn mbunə njendo'ə'ti kī Pol kī Barnabasi. Lo kin'ti non be, uni ta'de kadi Pol kī Barnabasi, nan'ti kī ngannkon'gi madi, awi

† **14:24 14.24 13.14** * **15:1 15.1** Lebitiki 12.3

Jerujalem'ti ingəi njekawkulə'gi kī ngatəgi'gi lə Njekawnan'gi tado ta kin.

³ Njekawnan'gi kī Antiyosi adi'de nya kī kadi ra se'de də row'ti. Uni row, tei Penesi'ti in kī Samari, eli de'gi kigo'ə go'ə, gorow kī de'gi kī in Juwipi'gi el təli uni me'de adi Kirisiti. Ta kin adi ronel ngannkon'gi pəti.

⁴ Loki rei tei Jerujalem'ti, Njekawnan'gi kī njekawkulə'gi, kī ngatəgi'gi lə Njekawnan'gi uwəi'de kī rɔ'de'ti. Pol kī Barnabasi eli poy nya kī Luwə ra se'de adi'de oyi.

⁵ Nan de'gi kī nan'gi, kī uni me'de dann Parisi'gi'ti uni ta eli eyina: «Majı kadi de'gi kī in Juwipi'gi el, adi'de ujəi mɔt'i'de ə ngəmi go ndukun'gi lə Mojı bay tə taa.»

⁶ Lo kin'ti, njekawkulə'gi kī ngatəgi'gi lə Njekawnan'gi kawinan kadi indəi manji ta kin.

⁷ Loki manjinan ta adi ndan'de ngal, ə Piyər osi nangi ində taa el'de ene: «Ngannkon'm'gi, tokı in gəri, in mayinu ə Luwə mbəti'm dann'se'ti kadi m'ilə mbər Poyta'ti kī majı rɔ de'gi'ti kī in Juwipi'gi el, kadi oyi ə uni me'de.

⁸ Luwə kī gər me de'gi, mannaji lə'de maji ki gorow Ndil Luwə kī adi'de tokı adi'n'je be tɔ[†].

⁹ Ingı ə j'in tə, Luwə or kum'de dana el, tado in kī takul kunme lə de ə Luwə adi ngarme de ari'n njay.

¹⁰ Ningə kī ngəsine kin, tado ri ə isi sangi ta Luwə kī jugı kī iləi mindi njekunme'gi'ti wa? Nya kī j'inbe eke baw'je'gi ka j'awi kī təgi kadi j'oti el.

† 15:8 15.8 7-8, 10.44, 11.15

11 Nya ki j'uni me'je dɔ'ti ə to kin: In ki takul memajɪ lə Burəbe Jeju ə nyi j'ingəi kajɪ, j'in ki j'in Juwipi'gi, kah'a'ti lə'de in Juwipi'gi el kakin tɔ.»

12 Ningə, de'gi pətɪ uti ta'de, uri mbi'de kadi oyi dɔ ta lə Barnabasi ingi ki Pol ki ra eli'de ɔjido poy nyakojɪ'gi ki nya'gi ki əti bol'gi ki Luwə ra'de ki takul Pol ingi ki Barnabasi dann de'gi'ti ki in Juwipi'gi el.

13 Lokɪ iləi ta nanga ningə, Jakɪ un ta el ene: «Ngannkon'm'gi, uri mbi'se oyi ta lə'm ngosine‡.

14 Simon ində taa el'je ne, adi j'oyi row ki lo tumginn'ə'ti inbe nu, Luwə ində'n kum'ne go'ti majɪ, kadi or de'gi ki nan'gi dann de'gi'ti ki in Juwipi'gi el, ində'de dangi to de'gi lə'ne.

15 Ta'gi lə de'gi ki njekeltakita Luwə'ti osi go nan'ti lo kareba ki ta kin. Tado ndangi me makitu'ti lə Luwə eyina:

16 “Go nya'gi'ti kin, m'a m're kadi m'ra kəy lə Dabidi ki budı kin rangi.

M'a m'ra in ki sigi gogi, m'a m'ra tor'o'ti gogi tɔ,
M'a m'ində taa gogi.

17 Tado kadi ndəgi de'gi sangi Burəbe,
Adi in ginn de'gi pətɪ ki uni tɔ'm dɔ'de'ti.
Burəbe elta kin be.

18 Burəbe ki nje te ki ginn nya ki ində dɔ'a nan'ti mayinu adi de'gi gəri§.”

19 «In tado kin ə, m'in m'oo majɪ ngayn kadi j'iləi kagi non de'gi'ti ki in Juwipi'gi el el, ki uni me'de adi Luwə.

‡ **15:13 15.13 12.17** § **15:18 15.18 16-18;** Amosi 9.11-12

20 Adi ji ndangi makitu par j'adi'de kadi njenyi ki rɔ'de lo kuso da ki de ilə kadikare'ti adi yo'gi el, kadi sangi nan lo kaya'ti el, kadi soi da ki de mbir m'ində el, kadi soi mosi da el tɔ*.

21 Nga ningə, ulə ngirə mayinu biti bone, de'gi ki njendo madi'de'gi ndukun lə Mojì in me bebo'gi'ti kare kare, num ndə kare kare ki in ndə korkon lə Juwipi'gi, de'gi a tudəi ndukun kin me køykawnan'gi'ti lə Juwipi'gi tɔ.»

Makitu tadə kulə'n kadi njekawnan'gi ki Antiyosi

22 Be ə, ngatogi'gi lə Njekawnan'gi, ki njekawkulə'gi ki Njekawnan'gi, ndigi kadi n'mbəti de'gi ki nan'gi dann'de'ti kadi ɔri tor'de dani Pol ingi ki Barnabasi awi se'de Antiyosi'ti. Mbəti Judasi ki bari'ə nan Barsabasi in ki Silasi. In joo pəti, ngannkon'de'gi tai me'de maji.

23 Ta ki ndangi Makitu'ti adi'de ə to kin:

«J'in njekawkulə'gi ki ngatogi'gi lə Njekawnan'gi, ji ndangi makitu kin j'adi'se in ngannkon'je'gi ki sii bebo Antiyosi'ti ki dɔnangi'gi ki Siri'ti ki Silisi ki in ginn koji lə Juwipi'gi el, ji ra'se lapiya.

24 J'oo poy de'gi madi in dann'je'ti ne awi rɔ'se'ti tuji me'se, təli sese gogi ki ta'gi lə'de, ningə in ingi ə j'ulə'de el.

25 Be ə, j'oyi maji kadi j'ində ta'gi nan'ti kareba ji mbəti de'gi j'ulə'de ki rɔ'se'ti, nan'ti ki Barnabasi ki Pol ki in njendigi'gi lə'je.

* **15:20 15.20** Tekitaga 34.15-16; Lebitiki 17.10-16; Lebitiki 18.6-23

26 In ki iləi rɔ'de kɔ tado tɔ Burəbe lə'je Jeju Kirisiti.

27 In kin ə, j'ulə'n Judasi ki Silasi. De'gi ki joo kin a eli'se nya'gi kin ki ta'de.

28 Tado in Ndil Luwə num, j'inbe num, j'uni ndu'je kadi de ində nya ki rangi gidi nya'ti ki in nya ki nda'a to'ti kin, dɔ'se'ti ki tɔgi el nga.

29 Ningə nya ki kadi rai ə to kin: kadi sɔi da ki de ilə kadikare'ti adi yo'gi el, sɔi mosi da el, sɔi da ki de mbir m'ində el, sangi nan lo kaya'ti el. Pəti toi be ningə, a rai nya ki maji. Tai lapiya lə'je j'in ngannkon'se'gi.»

30 Inyəi nje ki mbəti'de adi awi Antiyosi'ti. Loki awi tei Antiyosi'ti, kawi njekunme'gi ki nan'ti, ə uləi makitu kakin ji'de'ti.

31 Loki tudəi makitu kakin ningə, rɔ'de nəl'de ngayn tado ingəi ta'gi ki adi'de tɔgi me'ti.

32 Toki Judasi ki Silasi inbe'gi in njekeltakita Luwə'ti, uni dɔkagilo ngayn uləi dingəm me ngannkon'gi'ti, mbisəi nja'de me kunme'ti.

33 Sii se'de dɔkagilo nden ə, ngannkon'gi uwəi ji'de, indəi'de ta row'ti kadi awi ki lapiya, təli ki rɔ njekulə'de'gi'ti gogi.

34 [Nan Silasi oo maji ngayn kadi n'isi Antiyosi'ti].

35 Pol ki Barnabasi sii Antiyosi'ti, nan'ti ki ndəgi de'gi ki rangi, ndoi de'gi, iləi'de mbər Poyta ki maji lə Burəbe.

Pol ki Barnabasi inyəi nan

36 Nden go'ti, Pol el Barnabasi ene: «Adi ji təli j'uni dɔ nja'je me bebo'gi'ti pəti ki j'elita lə

Burəbe səm'ti kin, ə ji gon ngannkon'je'gi j'oo ke təli toi bann wa?»

³⁷ Lo kin'ti, Barnabasi ndigi kadi Jan Marki aw se'de.

³⁸ Nan Pol oo kadi in low'ə'ti el kadi Jan Marki ki ndəki inyə'de Pampili'ti, um aw se'de lo kaw kulə'ti el kin, kadi aw se'de bone bay[†].

³⁹ Mindi kasinan el ki bo ngayn to dann'de'ti adi inyə'i nan non be. Barnabasi un Jan Marki, ə uni tokibo aw ki Sipir'ti.

⁴⁰ Nga Pol ə un Silasi ə awi. Ngannkon'je'gi inyə'i'de ji Burəbe'ti.

⁴¹ Pol njiyəi dənangi Siri'ti ki dənangi Silisi'ti uləi dingəm me Njekawnan'gi'ti ki lo lo.

16

Pol ingə Timote

¹ Pol re te Dərbi'ti, go'ti aw Lisitir'ti. Lo kin'ti ə, ingə njendo kare ki tə'a nan Timote. Kon'a in njekunme ki in Juwipi, ə baw'a in Gireki tə*.

² Ngannkon'je'gi ki Lisitir ki Ikoniyom elita li'ə maji ngayn.

³ Adi Pol ndigi kuwə ji'ne'ti kaw si'ə. Be ə, aw si'ə ujə mət'ə, tado Juwipi'gi ki rai be lo'gi'ti kin, gəri'ə bəti kadi baw'a in Gireki.

⁴ Bebo'gi pəti ki tei'ti, ɔji ngannkon'de'gi ndukun'gi ki njekawkulə'gi ki ngatogi'gi lə Njekawnan'gi ki Jerujalem'ti uni. Ningə eli'de kadi rai go ndu'gi'ti kakin.

⁵ Njekawnan'gi ingəi təgi me kunme'ti lə'de, ningə kör'de in də mad'a'ti ki ndə'gi ndə'gi.

† 15:38 15.38 13.13 * 16:1 16.1 14.8,21

Pol aw Maseduwann'ti

6 Ndil Luwə ɔgi'de kiləmbər Poyta ki maji ngann be'gi'ti ki Aji. Adi ɔti non, indəi dənangi Piriji ki dənangi Galasi dəri.

7 Lokı rei tei ndəkba ki Misi, sangi row kadi n'awi Bitini'ti, nan Ndil Jeju ɔgi'de row.

8 Be ə, indəi dənangi ki Misi gangi, awi tei ta ba'ti ki Tirowasi.

9 Low'ə'ti kin ə, kondə ə, Pol oo de kare ki Maseduwann'ti me ndil'ti re ra do'a'ti. De kakin el Pol ene: «Nja'i ba, re Maseduwann'ti ra se'je.»

10 Go nya k'oo me ndil'ti lə Pol, tanan'ti non, ji sangi row kadi j'aw Maseduwann'ti, tado ji gər maji tokı Luwə inbe ə bar'je kadi j'aw j'iləmbər Poyta ki maji səm'ti.

11 J'al to Tirowasi'ti non, ə j'ɔsi ji te də dor Samotirasi'ti. Lo ti go'ti ningə, ji te Neyapolisi'ti.

12 J'in low'ə'ti non, j'aw Pilipi'ti, ki in bebo ki dəkete ki dənangi'ti ki Maseduwann, ki in ginn konbe'ti ki Rəm. J'isi non, ji ra ndə'gi asi tatı.

13 Ningə ndə kərkon'ti lə Juwipi'gi, ji te gidi bebo'ti taga, kadi j'aw kadi mbo'ti. J'aw'ti tado ji mərta kadi j'a j'ingə lo kelta ki Luwə səm'ti. Lokı j'aw ningə, j'isi nanga rə dene'gi'ti ki kawinan low'ə'ti, j'el'de ta.

14 Dann dene'gi'ti kakin, in ki kare isi non, tə'a nan Lidi. In dene ki bebo'ti ki Tiyatir. In nje law ta ku ki kər njir njir. Ningə in de ki nje bol Luwə tə. Si oo ta, ə Burəbe te ngarme'ə, adi ində mbi'ne maji go ta'gi'ti ki Pol isi el.

15 Nga a adi ra'a batəm nan'ti ki nje ki me kəy'ti li'ə. Ningə bar'je kadi j'aw be lə'ne ene: «Kin ə re oyi m'in kadi m'in njekunme kadi

Burəbe ə, rei sii be lə'm.» Ra dō ta'ti kin ngan, kadi jì ndigi go'ne'ti.

Uwəi Pol in ki Silasi dangay'ti Pilipi'ti

16 Ndō kare jì isi j'aw ki lo kelta'ti ki Luwə ə, dene ki nje ra kuləbər me kəy'ti kare re ingə'je. Dene kin aw ki ndil ndonte, adi lokı ində gara ə, ingə'n nya ngayn adi be'ne'gi.

17 Un go'je ki Pol ə, elta ki ndu'ne ki boi ene: «De'gi ki rai kam in njekuləbər'gi lə Luwə ki nje kisi dō nya'gi'ti pəti. Rei ra iləi'se mbər row kaji.»

18 Dene ra nya kin be ndō'ne banyi banyi go'je'ti. Be ə, ta təlta'a'ti, wongi ra Pol dō'a'ti, adi təl ta'ne el ndil ki isi me dene'ti kakin ene: «Me tə Jeju Kirisiti'ti, m'un ndu'm kadi te kə me'ə'ti.» Ningə tanan'ti non, ndil te kə me dene'ti.

19 Lokı ʃe'ə'gi oyi kadi nyakingə nya lə'de ki indəi me'de dō'ti, ka ginn'ə gangi ə, uwəi Pol ki Silasi awi se'de tambalo'ti, non nje konbe'gi'ti.

20 Awi se'de non njegangi ta'gi'ti eli'de eyina: «De'gi ki oyi'de kam in Juwipi'gi, ə rei ki ndu ki majel me bebo'ti lə'je.

21 Rei ki nya jibəlbe'gi ki j'in de'gi ki Rəm'ti, sow dō'je el, kadi to jì taa, jì ra'n kulə.»

22 Bulə de'gi indəi, buki nan dō Pol'ti ki Silasi. Ningə, njegangi ta'gi, adi nginyəi ku rə'de'ti, tindəi'de ki gəl.

23 Lokı indəi'de maji ə, awi buki'de dangay'ti, ningə adi ndu njengəm dangay'gi kadi ngəmi'de maji.

24 Lokı njengəm dangay'gi ingə ndu kin be ə, aw se'de kəy dangay'ti ki duni nu, taa ulə kangila nja'de'ti.

25 Kondə dann lo'ti, Pol ki Silasi elita ki Luwə, osi pa uləi təjì də Luwə'ti, ə ndəgi dangay'gi oyi ndu'de.

26 Ningə, ki kum ki kində jipi, dənangı yəki ki təgi'ne ngayn. Yəki yəki ki ra adı ngirə kəy dangay kaa in baki baki. Ningə tanan'ti non, takəy'gi tei num, kulə gindi'gi ki dəi dangay'gi pəti kaa tuti num tə.

27 Lo kin'ti non, njengəm dangay'gi ində də bi'ti. Lokı ində taa də bi'ti ə oo takəy'gi rai tagira, oo ene dangay'gi anyinan wa, adı ɔr kiyərə lə'ne kadi to n'təl'n rə'ne ko.

28 Ə Pol un ndu'ne ki taa ngayn el'ə ene: «Tuji rə'i el, nan j'isi ne pəti.»

29 Lo kin'ti, njengəm dangay'gi dəjə por, ə nagı rə'ne ur kəy, osi non Pol'ti ki Silasi ki rə dadı.

30 Go'ti, adı'de tei taga, ningə dəjə de ene: «Be'm'gi, in ri ə kadi m'ra ə m'a m'ingə'n kajı wa?»

31 Ə eli'ə eyina: «Un me'i adi Burəbbe Jeju, ə a ingə kajı in ki nje ki me kəy'ti lə'i.»

32 Lo kin'ti, iləi'ə mbər ta lə Burəbbe, nan'ti ki nje ki me kəy'ti li'ə.

33 Dann kondə'ti inbe kin non, njengəm dangay'gi aw ki Pol in ki Silasi, togı do'gi lə'de, ə kalangi ba go'ti, adı rai'ə batəm nan'ti ki de'gi ki me kəy'ti li'ə.

34 Go'ti, təl aw se'de me kəy'ti lə'ne, adı'de nyakuso soi, rai rənel me kəy'ti tado kun ki uni me'de adi Luwə.

35 Lokì lo ti ningə, njegangi ta'gi uləi paja'gi lə'de kì rɔ njengəm dangay'gi'ti eyina: «Inyə de'gi kin adi awi.»

36 Θ njengəm dangay'gi re el Pol ta kin ene: «Njegangi ta'gi eyina kadi m'inyə'se madi awi, ene tei awi lo lə'se kì lapiya.»

37 Nan Pol el paja'gi ene: «J'in de'gi kì Røm'ti tɔ†, ø adi de'gi indəi'je takum bulə de'gi'ti, kì kanji gangi ta dɔ'je'ti. Θ go'ti, buki'je dangay'ti be par tɔ. Ningə ngosine, inyəi'je taa kidi kuwə be par wa? A in be el! Adi inbe'gi rei kì rɔ'de inyəi'je taa!»

38 Θ paja'gi təli ki ta kin awi rɔ njegangita'gi'ti, adi bol ra njegangi ta'gi ngayn. Bol ra'de, lokì oyi kadi Pol in de'gi kì Røm'ti.

39 Be ø, indəi, rei rɔ'de'ti, dəji'de mesɔl, ø inyəi'de kadi awi, ø dəji'de kadi tei me bebo'ti kin kɔ nga.

40 Lokì Pol in kì Silasi tei dangay'ti ø, awi be lə Lidi. Awı oyı ngannkon'gi kì njekunme'gi, uləi dingəm me'de'ti ø awi.

17

Pol ki Silasi me be'ti ki Tesaloniki

1 Pol in kì Silasi indəi Ampipolisi kì Apoloni gangi, ø awi tei Tesaloniki'ti. Ningə Tesaloniki'ti, Juwipi'gi awi kì lo køykawnan lə'de non.

2 Be ø, Pol awi'ti, tokì isi ra'n kì lo'gi pəti. Asì ndɔ kɔrkon mutə go nan'ti, Pol manjinan ta kì Juwipi'gi dɔ ta'gi'ti kì me Makitu'ti lə Luwə.

† **16:37 16.37** 22.25-29, 23.27

3 Ḷr'de ginn ta'gi, tōjī'de adi gəri toki, makitu lə Luwə el kadi Kirisiti ki in De ki Luwə mbət'ə a oy, ə go'ti, a ində taa dann njekoy'gi'ti. Ningə, Pol el'de toki in darə Jeju inbe ki n'isi n'el'de mbər ta li'ə kin ə in Kirisiti.

4 Juwipi'gi ki nan'gi, ta kin ra kulə rō'de'ti, adi indəi rō'de nan'ti ki Pol ki Silasi. Bulə Gireki'gi ki nje kəsikurə Luwə ki dene'gi ngayn ki in dene ki nje təbar'gi kaa indəi rō'de nan'ti se'de tō.

5 Ə lo kin'ti, jangi ra Juwipi'gi, adi kawi de'gi ki ra uləi lo ki gorow kare, adi ɔsi dō de'gi nan'ti, rai ndu ki me be. Awi tei me kəy'ti lə Jason, sangi Pol ki Silasi kadı n'uwe'i'de, n'awi se'de taga, non bulə de'gi'ti.

6 Nan loki ingəi'de el, uwəi Jason ki ngannkon'gi ki madi'gi, awi se'de non njegangi ta'gi'ti. Ningə elita ki ndu'de ki boi eyina: «De'gi ki tuji dənangı ki ta'a ba kaa, rei tei ne.

7 Rei ə, Jason uwə'de rō'ne'ti be lə'ne. De'gi kin pəti, nya ra'de in nyara ki ɔsi ta ndukun'gi lə Nje konbe ki bo Sejar. In eli toki ngar madi ki rangı in non tō'a nan Jeju.»

8 Ta kin adi wongı bulə de'gi ki njegangi ta'gi,

9 adi uwəi Jason ki ndəgi njekunme'gi adi ugəi nar bay taa inyəi'de taa.

Pol ki Silasi me be'ti ki Bere

10 Lokı lo ene n'gonyi par ə, ngannkon'gi adi Pol ki Silasi awi Bere'ti. Lo ki rei tei Bere'ti ə, awi kəykawnan'ti lə Juwipi'gi.

11 Juwipi'gi ki Bere'ti, awi ki mərta ki majı ngayn utə nje ki Tesaloniki'ti. Taai ta lə Luwə ki ndigi ra ki majı ngayn. Ndəri ginn ta lə Luwə

ki ndɔ'gi pəti, kadı n'oyi ke ta'gi ki Pol eli'de kin in ta ki rɔta'ti infe.

¹² Be ə, ngayn'gi dann'de'ti uni me'de, taa dann Gireki'gi'ti, dene'gi ki nje tɔbar, ki dingəm'gi ngayn uni me'de to.

¹³ Nan loki Juwipi'gi ki Tesaloniki'ti, oyi kadı Pol isi iləmbər ta lə Luwə Bere'ti non ningə, təli awi go'de'ti bay, awi suləi bulə de'gi adi rai ndu.

¹⁴ Lo kin'ti ngannkon'gi, sangi row kalangi ba adi Pol aw ki kadı babo'ti. Nga ningə, Silasi ki Timote ə nanyinan Bere'ti.

¹⁵ Nje ki dani Pol, dani'ə biti, awi tei si'ə Atenn'ti. Nga a, loki isi təli, Pol adi'de ndu'ne kadı Silasi ki Timote rei kalangi ingəi'ne.

Pol me be'ti ki Atenn

¹⁶ Lokı Pol isi nginə Silasi ki Timote, Atenn'ti hangal'a tuji tadə yo'gi ki de'gi isi rai'de, rosı me bəbo kin.

¹⁷ Pol manjinan ta'ti ki Juwipi'gi, ki de'gi ki nje kəsikurə Luwə, me kəykawnan'ti lə Juwipi'gi, taa ki ndɔ'gi pəti, tambalo'ti, ki de'gi ki ingə'de.

¹⁸ Nje nyagər'gi ki bari'de Epikir'gi ki Sətoyisi'gi kaa manjinan ta'ti se'de to. Ə nje ki madi'gi eli eyina: «Nje ta'gi kam ta ri ə ra eli indəi ndu be wa?» Ningə nje ki nungi eli eyina: «To to nya ki in nje kelta ki də luwə'gi'ti ki mbah ə am.» Eli be tadə oyi kadı Pol isi iləmbər Poyta ki maji lə Jeju num, isi iləmbər kində taa lo koy'ti num.

¹⁹ Be ə, uwəi Pol, awi si'ə rɔ njegangi ta'gi'ti, ə eli'ə eyina: «To kadı el'je ta də nyando'ti ki sigi ki isi ndo kin adi ji gər wa?

20 Tadɔ in isi el'je ta'gi ki mbi'je oo nja kare el, ə kadi ɔr ginn'ə maji adi j'oo.»

21 Ningə nya kare ki maji kadi in gər, de'gi ki Atenn'ti pəti, ki mbah'gi ki sii dann'de'ti, dɔkagilo lə'de ki ngayn in tadɔ k'el'n ta'gi ki sigi ə k'oo'n ta'gi ki mbah.

22 Lo kin'ti, Pol ində ra taa, dann njegangi ta'gi'ti, ə un ta el ene: «In de'gi ki Atenn'ti, m'oo kadi in de'gi ki, bar yo lə'se əti bol ki dum. Bari yo me nya'gi'ti pəti.

23 Tadɔ, loki m'njiyə me be'ti, m'oo nya'gi ki isi ɔsi məkəsi'se nanga non'de'ti. M'oo lo bar yo madi inbe bay ki indəi nya dɔ'ti eyina in lo lə "luwə ki in gəri'ə el," ningə in ki isi ɔsi məkəsi'se nanga non'a'ti ki kanji gər'ə kakin ə m'nji m'ilə'se mbər ta li'ə.

24 In Luwə ki njera doran ki dɔnangi ki nya'gi pəti ki me'ti, in ki in Be nje doran ki dɔnangi. In nje kisi me kəy'ti ki de ra ki ji'ne el.

25 Taa aw ki ndoo kadi de ra kulə madi ad'a el tɔ, tadɔ in ə in nje kadi de isi kumngayira num, nje kadi de kon ki nya'gi pəti num tɔ*.

26 Ki de ki kareba be ə ində'n de'gi pəti adi taai dɔnangi. Ində dɔkagilo adi'de num, ində gangi lo kisi'de num tɔ.

27 Luwə ində nya'gi kin be kadi de'gi sangi'ə'n'ə. Dɔ maji ə a ingəi'ə me mam lo'ti lə'de. Ki rɔta'ti, Luwə in sanyi el ki de ki ra dann'je'ti.

28 Tadɔ kisikidotaa lə'je in me ji'ə'ti. In ə in nje kadi j'ɔdi rɔ'je, ki nje kadi ji isi kumngayira. In

* **17:25 17.25** 24-25, 7.48; 1Ngar'gi 8.27; Ejay 42.5

tadɔ kin ə njegosita'gi lə'se ki madi'gi eli eyina:
"J'in kaa j'in ngann'a'gi tɔ."

²⁹ Ə re j'in ngann'gi lə Luwə ə, maji kadi j'oo
Luwə kadi in de ki to to yo ɔr'gi, ki yo nar'gi ki
de'gi lenyi'de, eke yo mbal'gi ki de'gi tɔli'de ki
gosı ki dɔ'de'ti kin be el.

³⁰ Luwə inyə go nya ki de'gi rai kete ki go lo
gər'ə'ti el, dɔkagilo'ti ki gəri el bay kin ko, nan
ki ngɔsine kin, Luwə iləmbər kadi de'gi pəti, ki
lo'gi pəti, inyəi gorow njiyə'de ki majel ko.

³¹ Tadɔ ɔr ndɔ kare ində non kadi to a gangi'n
ta dɔ de'gi ki dɔnangi'ti ne pəti ki row ki dana.
A gangi ta kin ki row lə de kare ki mbət'ə tadɔ
kulə kin, in tɔj'ɔ ki taga adi de'gi pəti gəri'ə ki
row kində taa dann njekoy'gi'ti.»

³² Loki Pol elta kində taa lo koy'ti, ə osi
mbi'de'ti ningə, nje ki madi'gi uwəi'ə kogi, ə nje
ki nungi eli eyina: «J'a j'oo ta lə'i kin ndɔ ki
rangı'ti.»

³³ In be ə, Pol te'n dann'de'ti, aw.

³⁴ Nan be kaa, ki madi'gi dann'de'ti nanyinan
go Pol'ti, uni me'de adi Jeju Kirisiti. Dann'de'ti
kin, Denisi ki in ki kare dann njegangita'gi'ti in
se'de non, taa dene ki bari'ə nan Damarisi ki
ndəgi de'gi ki rangı kaa in se'de non tɔ.

18

Pol me þe'ti ki Korenti

¹ Loki Pol in Atenn'ti ningə, aw Korenti'ti.

² Lo kin'ti non, ingə Juwipi kare ki tɔ'a nan
Akilasi, ki ginn'ə in Pon'ti, in Itali'ti ki ne'ne
Pirisil rei ngɔsine bay. Rei tado nje konbe kibo
ki Rəm'ti ki tɔ'a nan Kilodi un ndu'ne kadi

Juwipi'gi pətì tei Rəm'ti kō. Pol aw ingə Akilasi'gi non,

³ ningə tokì kulə ki kadi rai ingəi nya in kulə ki kareba, adi in kulə kojì ku ra kəy, Pol isi se'de, adi rai kulə kin nan'ti.

⁴ Ndɔ korkon'gi pətì, Pol un ta, el me kəykawnan'ti lə Juwipi'gi. El ki kujə ki sangi kadi Juwipi'gi ki Gireki taai to ta ki rəta'ti.

⁵ Nan lokì Silasi ki Timote in Maseduwann'ti rei ingəi'ə*, Pol un dəkagilo lə'ne pətì tado k'elte lə Luwə. Təjì Juwipi'gi kadi gəri tokì Jeju in Kirisiti ki in De ki Luwə mbət'ə.

⁶ Nan Juwipi'gi tanyi'ə rɔ, tajì'ə, adi Pol jəngi bu ku lə'ne ta de'ti, ə el'de ene: «Ta mosi'se in də'se'ti! M'ar njay. Ningə ki ngɔsine kin, de'gi ki in Juwipi'gi el ə m'a m'aw ki rɔ'de'ti nga.»

⁷ Be ə, Pol in non, aw be lə Titusi Jusitusi, ki in de kare ki nje kəsikurə Luwə, ki kəy li'ə ndunə nan ki kəykawnan lə Juwipi'gi.

⁸ Kirisipusi, ki in njekundɔ kəykawnan lə Juwipi'gi in ki de'gi ki me kəy'ti lə'ne ba pətì, uni me'de adi Burəbe. Taa de'gi ki Korenti ngayn, ki oyi ta lə Pol kaa uni me'de tɔ, adi rai'de batəm.

⁹ Ndɔ kare kondɔ, Burəbe el Pol ta me nii'ti ene: «Bol el, elta ki nonyi'ti, um uti ta'i el.

¹⁰ Tado m'in sə'i nan'ti, de madi kare ki a ulə ji'ne kadi ɔdi tokì majel goto. De'gi ki in de'gi lə'm in ngayn me bebo'ti kin ne.»

¹¹ Be ə Pol isi'n Korenti'ti bal kare ki nanyi mehen, ndo'n de'gi ta lə Luwə.

Pol ra non Galiyon'ti

* 18:5 18.5 17.15

12 Dōkagilo'ti kī Galiyon in'n nje konbe ki Akay'ti, Juwipi'gi dōi ta nan'ti dō Pol'ti, adi awi si'ə non njegangi ta'gi'ti,

13 eyina: «De kam isi aw kī de'gi kadi osi dō'de nanga non Luwə'ti, kigo ndukun'ti el.»

14 Pol ra kadi to n'el ta ningə, Galiyon un ta ta'ne'ti kete el Juwipi'gi ene: «Kin ə re in ta lə nya tōl, eke ta lə majel madi kī ngan ngayn ə to be ə, re m'a m'oo ta lə'se, in Juwipi'gi.

15 Nan tokı in ta kī manjinan'ti kī ɔjidə ta'gi, kī tōgi kī ndukun'gi lə'se kī sōw dō'se kin ə, rai dann'se'ti non. M'in m'a m'gangi ta kī be kin el.»

16 Ningə tuwə'de lo gangi ta'ti ko.

17 Ə low'ə'ti non, de'gi pəti uwəi Sositenn ki in njekundo kəykawnan lə Juwipi'gi, tindəi'ə lo gangi ta'ti non, nan usi Galiyon nya kare dō'de'ti el.

Pol təl aw Antiyosi'ti

18 Pol təl isi Korenti'ti non dōkagilo asi ta'ti bay. Ningə go'ti, inyə ngannkon'gi, ə un tokibo kaw kī Siri'ti, nan'ti ki Pirisil kī Akilasi. Pol adi ngisəi dō'a Sankire'ti, tado un mindi'ne adi Luwə†.

19 Awi tei Epeji, Pol inyə Pirisil kī Akilasi ə aw kəykawnan'ti lə Juwipi'gi, manjinan ta'ti se'de.

20 Juwipi'gi kin dəjì Pol kadi isi se'de ndə'gi nden bay, nan Pol ndigi el.

21 Ningə lokı otı isi aw el'de ene: «Ndo kī rangi, ə Luwə ndigi ə, m'a m'təl to m're rō'se'ti bay,» ningə inyə'de Epeji'ti ə in me tokibo'ti ə aw.

† 18:18 18.18 Kör Isirayel'gi 6.5-18

22 Ningə un to Epeji'ti, aw Sejare'ti. Lo ki te Sejare'ti, aw uwə ji Njekawnan'gi, ə un row aw Antiyosi'ti.

23 Pol ra ndɔ'gi non nden, ə təl ilə dɔ'ne gogi. Aw te Galasi'ti ki Piriji'ti, adi tɔgi njendo'gi pəti.

Apolosi me be'ti ki Epeji ki me be'ti ki Korenti

24 Juwipi kare ki tɔ'a nan Apolosi, ki in de ki ginn'ə in Alegijandiri'ti re Epeji'ti. In de ki bal ta to ta'a'ti, taa gər ta lə Luwə maji tɔ.

25 Ndoi'ə row ta lə Burəbbe, adi iləmbər ta lə Jeju ki rənel ki ngayn, ndo de'gi nya ki dɔ Jeju'ti ki gorow'ə'ti. Nan k'in ə, gər batəm lə Jan par.

26 Ilə rɔ'ne, elta lə Luwə kəykawnan'ti lə Juwipi'gi ki me ki tinyi katı. Nan lokı Pirisil ki Akilası oyı'ə lo kelta'ti, bari'ə rɔ'de'ti, ojı'ə gorow lə Luwə ar njay, adi'ə gər.

27 Go'ti, ndigi kaw Akay'ti, ə ngannkon'je'gi ndigi dɔ'ti si'ə, adi rai makitu adi njendo'gi ki Akay'ti kadı uwəi'ə rɔ'de maji. Lokı aw te Akay'ti, kigo memajı'ti lə Luwə, ra ki nje ki uni me'de adi Luwə ngayn.

28 Tadə dum dɔ Juwipi'gi ki tɔgi ta lə'ne, taga wangı takum de'gi'ti. Tɔjı, ki ta lə Luwə ji'ne'ti, tokı Jeju in Kirisitı ki in De ki Luwə mbət'ə.

19

Pol in me be'ti ki Epeji

1 Dəkagilo'ti ki Apolosi in'n Korenti'ti, Pol ində dənangı ki mbał'gi in'ti ki dənangı Aji'ti gangi, ə re te Epeji'ti. Ingə njendo'gi lə Jeju ki nan'gi'ti non. Adi dəjı'de ene:

2 «Loki uni me'se adi Jeju kin, ingəi Ndil Luwə wa?» Ə təli iləi'ə'ti eyina: «Jagi, k'oo ka j'oo kete kadi Ndil Luwə in non el.»

3 Pol təl dəjì'de bay ene: «Batəm ki bann ə ingəi wa?» Eli eyina: «J'ingə batəm lə Jan Batisi.»

4 Be ə, Pol el'de ene: «Oyo, Jan ra batəm Isirayel'gi kadi töri ndu'de də majel'gi'ti lə'de. Ə təl el'de bay kadi to uni me'de adi de ki a re go'ne'ti non, adi de'ə kin in Jeju*.»

5 Loki oyı ta'gi kin ningə, adi rai'de batəm me tə Burəbe Jeju'ti.

6 Be ə, Pol ində ji'ne də'de'ti, ə Ndil Luwə risi də'de'ti. Ningə tumginn kadi elita ki ndonnta'gi ki dangi dangi num, ta elita ki ta Luwə'ti num tə.

7 Dingəm'gi pəti ki rai lo nya'gi'ti kin asi dəgi gidə in joo.

8 Go'ti, asi nanyi mutə go nan'ti, Pol te ə aw kəykawnan'ti lə Juwipi'gi, el'de ta ki me ki tinyi katı kibo. Iləmbər konbe lə Luwə, sangi uwə'de ki ta, kadi oyı to ta ki rəta'ti kadi tai ta kin tə.

9 Nan Juwipi'gi ki nan'gi dann'de'ti me'de ngan, adi mbeti kadi uni me'de. Elita kidi nyando lə Pol ki ojì gorow ta lə Burəbe kin takum bulə de'gi'ti. Be ə, Pol inyə'de ə ɔtə aw ki njendo'gi me kəy ndo nya'ti lə de ki tə'a nan Tiranusi. Ningə ki ndə'gi kare kare pəti, ndo'de nya.

10 Nyando kin, Pol ra kul'ə asi bal joo. Be ə, ra adi Juwipi ki de'gi ki in Juwipi'gi el ki isi dənangi Ajı'ti, oyı ta lə Burəbe.

11 Luwə ra nyakojì'gi ki əti bol ki takul Pol.

* **19:4 19.4** Mat 3.11; Mrk 1.4,7-8

12 Adi, de'gi ḥyi ta ku'gi ki kare ki ta ku ki ji'ə ɔdi, awi ɔdi njemonyi'gi adi ingəi lapiya num, ndil'gi ki majel kaa anyinan ko num tɔ.

13 Juwipi'gi ki nan'gi ki nje njiyə kigo be'gi, kadi n'tuwəi ndil'gi ki majel, ingi kaa gei kadi n'bari tɔ Burəbe Jeju dɔ de'gi'ti ki in ginn tɔgi'ti lə ndil'gi ki majel tɔ. Adi eli eyina: «Me tɔ Jeju'ti ki Pol isi iləmbər ta li'ə, m'dəji'se kadi tei ko.»

14 De'gi ki njera nya be kakin, in siri. In ngann'gi lə Juwipi kare ki tɔ'a nan Seba ki in kibo lə njekujənyamosi kadikare'gi.

15 Ndil ki majel təl ilə'de'ti ene: «M'gər Jeju, taa m'gər de ki in Pol tɔ, nan ingi, in nan'gi wa?»

16 Lo kin'ti, de ki ndil ki majel sii me'ə'ti kakin ində ur dɔ'de'ti uwə'de tɔsɔsɔ. Ningə ində'de kində ki de oo go madi'ne el, adi tei me kəy'ti ki kanyi ki rɔ'de kare, ki ku ki gangi rɔ'de'ti batı batı ki mosi.

17 De'gi pəti ki bebo Epeji'ti, ki Juwipi'gi nan'ti ki de'gi ki in Juwipi'gi el, gəri go nya ki ra nya kin maji. Ingı pəti bol ra'de, adi ɔsikurə Burəbe Jeju.

18 De'gi ngayn ki in njekunme'gi rei tɔrindu'de, ə eli kulə ra'de'gi ki majel ki taga non de'gi'ti.

19 Nje ki nan'gi ngayn dann njera mboli'gi'ti, rei ki makitu ra mboli'gi lə'de, kawi ki dənan'ti ə uləi por takum de'gi'ti. Ndogi se'de makitu'gi lə'de kin ası silə dər dɔ mi[†].

20 In be ə, ki takul tɔgi lə Burəbe, ta lə Luwə sanan ki lo'gi'ti ki kete kete ki tɔgi'ne tɔ.

21 Go nya'gi'ti kin, Ndil Luwə ɔsi Pol adi un ndu'ne kadi n'aw bebo Jerujalem'ti. Dɔ row

† 19:19 19.19 Mrk 6.37

kaw'a'ti, ində dənangi Maseduwann ki Akay gangi. Ningə Pol el ene: «Re m'aw m'te bebo Jerujalem'ti ə, maji kadi m'aw m'oo dənangi Rəm tə.»

²² Pol ulə ki njera si'ə kulə'gi joo, Timote ingi ki Erasi adi'de awi dənangi Maseduwann'ti. Ningə inbe, isi dənangi Aji'ti ba njaba bay.

Nya ki ra nya Epeji'ti

²³ Dəkagilo'ə'ti kin, ta kasi nan el kibo ngayn in də row ta'ti lə Burəbbe me be'ti ki Epeji.

²⁴ De kare ki tə'a nan Demetriyusi, in kədi ki njera ningə kası'gi. In njera ngann kəy yo ki dene ki a bari'ə nan Artemisi. Kulə kin ra adi in sotı ki njekulə'gi li'ə ngayn.

²⁵ Be ə, Demetriyusi kaw kədi'gi ki de'gi pəti ki isi ki də'de taa ki takul kulə kin nan'ti, ə el'de ene: «Madi'm'gi, in gəri kadi in ki takul kulə kin ə, j'isi j'ingəi nya maji.

²⁶ Ingı oyi ki kum'se taa ki mbi'se tə, kadi in Epeji'ti ne par el, nan dənangi Aji'ti ba pəti, ə dingəm ki tə'a nan Pol kam təl də bulə de'gi basi. In el'de ene: "Kagi yo'gi ki de'gi rai ki ji'de in Luwə el."

²⁷ In kulə'gi ki j'isi rai kin par ə de'gi a oyi to nya ki kare el, nan kəy lə luwə ki dene kibo ki in Artemisi kin kaa, de'gi a oyi'ə nya madi'ti el tə. Lo kadi de'gi a eli eyina: "Artemisi in yo ki dene ki bo," goto. Artemisi ki de'gi ki dənangi Aji'ti ki ndəgi dənangi ba pəti ɔsikurə kin.»

²⁸ Lokı kədi'gi oyi ta'gi kin ningə, wongı ra'de ngayn, adi tumginn kadi elita ki ndu'de ki boi eyina: «Artemisi lə Epeji'ti, in kibo.»

29 Kalangi ba go'ti ningə, lo singə səkitə ki ta tat'a ba me bebo'ti. De'gi ndəri Gayusi in ki Arisitarki, de'gi ki Maseduwann'ti, ki in madi mbah lə Pol kum'de'ti, ə ngodi təl'de ki tambalo'ti.

30 Pol ndigi kadi n'toji rɔ'ne bulə de'gi, nan njendo'gi ɔgi'ə.

31 Ningə basa madi Pol madi ki in de kibo ki dənangı Aji'ti, uləi kulə rɔ'a'ti, eli'ə kadi aw tambalo'ti el.

32 Tambalo'ti, nya ki to ar njay də de'gi'ti goto: Ta'gi ki isi te ta de'gi'ti in ta'gi ki dangi dangi. Ningə de'gi ngayn dann madi'de'gi'ti gəri ginn nya ki kawinan el.

33 De'gi ki nan'gi dann bulə de'gi'ti ori ginn nya ki ra nya kin adi Alegijandir ki Juwipi'gi indəi'ə to njekundəde kin ad'a oo. Alegijandir ulə ji'ne taa, dəjì'n de'gi kadi rai keke, tədə ge k'elta, ɔrta də'de'ti.

34 Loki gəri'ə kadi in Juwipi ningə, ingi pəti ulə bilə ki ndu'de kibo ası ngirə kadi joo ge be eyina: «Artemisi lə Epeji'ti, in kibo.»

35 Ta təlta'a'ti ningə, njendo ndukun ki me bebo'ti, re ra adi lo to jiji, bay taa el'de ene: «In de'gi ki Epeji'ti, nan ə gər kadi be ki Epeji'ti, in njengəm kəy lə Artemisi ki in yo ki dene ki in kibo kin el ə, eke nan ə gər kadi in nje ngəm mbal ki in banakum'ə ki in dəran'ti osi el wa?»

36 In kin in nya ki dum manji. Maji kadi uwəi hangal'se indəi nanga, ə in mərita ta rai nya.

37 Ingı ə ori de'gi kam rei se'de ne, nga, nya madi ki majel ki rai ɔsi takəy kin goto, taa elita ki mal də luwə'ti lə'je ki dene Artemisi el tə.

³⁸ Re Demetriyusi in ki de'gi ki nje ra kulə'gi lə'ne, rai ta ki de madi ningə, ndɔ gangi ta'gi to'i non, ə maji kadi awi oyi njegangi ta'gi.

³⁹ Re nya madi ki rangi to non kadi dəji ə, ndɔ ki kadi nje kində manji ta'gi kin ki gorow'ə'ti to non.

⁴⁰ Nya'gi ki rai nya bone kin, asi kadi de'gi iləi ta də'je'ti to nje k'aldo ndu'gi, tado ta madi ki j'a j'eli ə j'a j'ori ta də'je'ti, ki ɔji go kawnan lə de'gi ki bone kin goto. Be ə, go ta'gi'ti ki njendo ndukun el, tuwə de'gi adi sananyinan.

20

Pol aw dənangi Maseduwann'ti

¹ Lokı wongi lə de'gi yokiro ningə, Pol ulə bar njendo'gi, ulə dingəm me'de'ti bay ta ra'de lapiya ə ɔti aw Maseduwann'ti.

² Pol ingə dəkagilo'gi ngayn ulə'n dingəm me njekunme'gi'ti lokı isi ində dənangi kakin gangi. Ningə gangi ki kete non aw Giresi'ti.

³ Pol isi'ti non nanyi mutə. Dəkagilo'ti ki kadi un tokibo kaw ki dənangi Siri'ti ningə, gər kadi Juwipi'gi uləi ta'de nanga kadi n'rai si'ə nya ki majel. Be ə, təl un row ki Maseduwann'ti.

⁴ Mbunə de'gi'ti ki dani'ə a ingə Sopater ki ngonn lə Pirusi ki Bere'ti num, Arisitarki in ki Segondusı ki in de'gi ki Tesaloniki'ti num, Gayusi ki Dərbi'ti num, Timote num, taa Tisiki num in ki Tiropim ki in de'gi ki dənangi Aji'ti num to.

⁵ De'gi kin ɔti kete non'je'ti, awi nginəi'je Tirowasi'ti.

⁶ J'in ə, go ndɔ'gi'ti lə mapa ki ra ki hum ɔd'ɔ el, ə j'al me to'ti me be'ti ki Pilipi j'isi j'aw.

J'aw, ji ra ndɔ mi row'θ, θ j'aw j'ingθ madi'je'gi
Tirowasi'ti, ji ra ndɔ siri.

Pol me be'ti ki Tirowasi

⁷ Ndɔ Domasi, ji kawnan tado kuso mapa, Pol a aw lo ti'ti, adi elta ki njendo'gi. Be θ, elta ratata dann lo dɔ'a'ti.

⁸ Ji kawnan me køy'ti ki in dɔ mad'a'ti taa. Ningθ me køy'ti kakin, lambi'gi ngayn in səm'ti non.

⁹ Lokì Pol isi elta adi ngal, Basa kare ki tɔ'a nan Etikusi isi penetir'ti, to bi kanum, adi bi un'θ, in køy'ti ki nja mutə dɔ mad'a'ti, te osi. Lokì de'gi eyina n'uni'θ θ, basa oy.

¹⁰ Pol ur nanga, dow rɔ'ne dɔ'a'ti θ un'θ ji'ne'ti θ el'de ene: «Adi me'se gangi mann el nan to kum bay!»

¹¹ Go'ti, Pol təl ala taa gogi, gangi mapa so. Un ta ki ta'ne'ti gogi biti taginnlo'ti, θ ɔti aw.

¹² Nga ningθ, de'gi ɔri basa awi si'θ be kumn-gayira, adi de'gi pət̩i me'de osi nanga.

Pol in Tirowasi'ti aw Mile

¹³ J'in j'aw kete ki to me be'ti ki Asosi. Me be'ti kin θ, j'a j'uni Pol nan'ti se'je. Tado kigo kɔjitarat'i li'θ, ge kadi n'un row ki nja'ne.

¹⁴ Lokì re ingθ'je Asosi'ti, j'uni'θ me tokibo'ti nan'ti se'je θ j'awi Mitilene'ti.

¹⁵ Lo ti go'ti ningθ, j'ɔti non me tokibo'ti ka bay, ji re ji te ta lo'ti ki Kiyo. Ndɔ ki go'ti ningθ, ji te Samosi. Ndɔ ki nja so bay ta ji te Mile'ti.

¹⁶ Pol ndigi kadi n'ra lo kat̩ Epeji'ti el nan pa nya ta dɔkagilo dər dɔ'ne'ti dɔnangi Aji'ti. Ge

kadi n'aw kalangi kadi re to'n bann inbe kaa,
ndɔ Pantəkoti osi dɔ'ne'ti Jerujalem.

Pol elta ngatɔgi'gi me ße'ti ki Mile

17 Loki Pol in me ße'ti ki Mile ə, ulə bar ngatɔgi'gi lə Njekawnan'gi ki Epeji'ti.

18 Loki rei tei rɔ'a'ti ningə, el'de ene: «In gəri row panjiyə'm dɔkagilo'gi pəti ki m'in'n sese nan'ti, tumginn'ə dɔ ndɔ ki dɔkete'ti ki m're'n dɔnangi Aji'ti.

19 M'ra kuləbər lə Burəße ki dɔ ki sɔl lɔm lɔm, me mann non'ti ki me nya nan'gi'ti ki m'ingə ki row'gi ki dangi dangi ki gorow kulə ta nanga ki in rɔ Juwipi'gi'ti ki madi.

20 Gəri bəti, m'iyə'se dɔ nya madi kare el. M'ilə'se mbər Poyta ki maji ta m'ndo'se nya'gi pəti ki a ra sese maji tɔ, taga dann bulə de'gi'ti num, me kəy'gi'ti num tɔ.

21 M'iləmbər m'bar'n Juwipi'gi num, Gireki'gi num kadi təli rɔ'de go Luwə'ti ə inyəi gorow njiyə'de'gi ki majel kin kɔ, taa kadi uni me'de adi Burəße lə'je Jeju Kirisiti tɔ.

22 Ki ngɔsine kin, Ndil Luwə ində dɔ'm'ti, adi m'nji m'aw Jerujalem'ti ki kanji kadi m'gər nya ki a ra'm nu.

23 Nya ki m'gər, me ßebo'gi'ti kare kare ki m'te'ti Ndil Luwə el'm ta adi m'gər toki dangay'gi ki kon'gi isi nginəi m'in non.

24 Ki ɔjidɔ'm, kisikidɔtaa lə'm in nya madi takum'ti el. Nya ge lə'm in kadi m'aw ratata m'təlta ngodi lə'm, ə kadi m'ra kuləbər ki m'ingə ji Burəße Jeju'ti kin maji. Adi in kulə kiləmbər Poyta ki maji ki ɔjidɔ memajɪ lə Luwə.

25 Ningə ngɔsine, m'gər kadi ingi pəti ki m'njiyə dann'se'ti ə m'ilə'se mbər Poyta ki maji ki ɔjidə konbe lə Luwə kin, de kare kaa a oo'm el ratata nga.

26 In be ə, m'elta lə'm taga ar njay bone, ta mosi'se pəti goto dɔ'm'ti.

27 Tadə kɔjitarə'gi lə Luwə pəti, m'iləmbər dɔ'ti madi oyi. Nya ki m'iyə dɔ'a rɔ'se'ti goto.

28 Indəi kumkədi dɔ rɔ'se'ti inbe'gi, taa dɔ nyakul'gi'ti ki in Njekawnan ki Ndil Luwə adi'se kadi ngəmi'de kin tɔ. Maji kadi indəi kum'se go Njekawnan'gi'ti lə Luwə ki ndogi'de ki mosi'ne, to njekul nyakul'gi ki maji.

29 M'gər kadi lokı m'a m'goto dann'se'ti, de'gi madi ki a toi to jagum'gi ki nje mendul, a rei uri dann'se'ti ə a rai Njekawnan'gi majel.

30 Ningə mbunə'se'ti inbe'gi kaa, de'gi madi a təli nje rugi ta ki rɔta'ti kadi təli nje kawnan madi'gi njendo'gi'ti lə'de.

31 Maji kadi sii dɔ nja'se'ti, adi me'se olo dɔ'ti, tokı me bal'ti ki mutə ki m'ra dann'se'ti, kondə'ti ki kada, kare kare pəti, m'inyə ta kulə dingəm me'se'ti el, ki mann non ki kum'ti.

32 Ningə ngɔsine, m'ulə'se ji Luwə'ti, taa m'ndəji'se ki ta li'ə kigo memaji'ti li'ə tɔ. Ta kin aw ki tɔgi kadi adi tɔgi me kunme'ti, taa Luwə a adi'se nya maji'gi pəti ki isi ngəm tadə lə de'gi pəti ki ində'de ta dangi.

33 Lo ki m'in dann'se'ti, m'ra kumnda nar, eke or eke ku lə de madi dann'se'ti el.

34 Inbe'gi gəri bəti, kadi ki ɔjidə kisikidətaa lə'm, eke yan madikulə'm'gi, m'ra kulə ki ji'm m'inbe.

35 M'ɔjì'se ki lo'gi pəti, eke ki dəkagilo'gi pəti kadi rai kulə be kadi indəi kum'se go nje yai'gi'ti. Ningə maji kadi me'se olo də ta'ti ki Burəbe Jeju inbe el ki ta'ne ene: "Majikur in ngayn də de'ti ki adi utə de ki isi taa."»

36 Go ta'gi'ti ki Pol el kin ningə, osi məkəsi'ne nanga, ə elta ki Luwə nan'ti se'de pəti.

37 Ningə go'ti, ingi pəti, buki nan ki non'ti, ə osi mindi Pol'ti uwəi'ə, ə orei'ə ki ro'de'ti.

38 Ta li'ə ki el'de ene: «A oyi kum gogi el,» kin ɔr təgi'de ngayn. Ningə dani'ə biti awi si'ə ta to'ti.

21

Kaw Pol ki Jerujalem'ti

1 Go k'inyə nan'ti ki ngatəgi'gi lə Njekawnan'gi ki Epeji'ti, j'al me to'ti, ə j'aw njururu də dor'ti ki tə'a nan Bulə de'gi. Lo ti go'ti ningə, ji te me bebo'ti ki Rodi. J'oti Rodi'ti ə j'aw bebo'ti ki Patara.

2 J'ingə tokibo isi aw Penesi'ti adi j'al me'ti j'aw si'ə.

3 Loki j'oo də dor Sipir ki kum'je be ningə, j'inyə ki holo be ə j'or taa ki dənangı Siri'ti. J'awi j'ur nanga Tir. Lo kin'ti non ki a ɔri nya'gi ki me to'ti nanga.

4 J'ingə njendo'gi me be'ti kakin non, adi j'isi se'de asi ndə siri. Njendo'gi kakin, Ndil Luwə osi'de adi eli Pol kadi aw Jerujalem'ti el.

5 Nan lokı dəkagilo lə'je asi ningə, j'ində taa, j'un tarow lə'je. Njendo'gi pəti, ki ne'de'gi ki ngann'de'gi dani'je biti tei se'je gidi bebo'ti.

Kulə'gi lə njekawkulə'gi 21:6 lxxxv Kulə'gi lə njekawkulə'gi 21:13

Low'ə'ti non, j'ɔsi məkəsi'je nanga ta ba'ti, j'elta ki Luwə.

⁶ Go'ti, loki j'el nan ta'gi ki dəboy'ti ki kadi j'inyə'n nan, ə j'ala me to'ti ə ingi təli ki be'gi lə'de tə.

⁷ J'ində ngangi kaw mbah lə'je ki tokibo, loki j'in Tir'ti ji re ji te Tolemayisi'ti. Me bebo'ti kin non, j'uwə ji ngannkon'je'gi, ə j'isi se'de ndə kare.

⁸ Lo ti də'ti ningə, ji re ji te Sejare'ti. J'aw me kəy'ti lə Pilipi ki in nje kiləmbər Poyta ki maji, ki in mbunə de'gi'ti ki siri ki nje kində kum'de go nya maji'gi'ti lə Njekawnan'gi ki Jerujalem'ti*. J'isi rɔ'a'ti non.

⁹ Me kəy'ti li'ə, ngann dene'gi so ki gəri dingəm el bay, ki in njekelta ki ta Luwə'ti sii səm'ti non.

¹⁰ J'isi me kəy'ti lə Pilipi kakin ji ra ndə ngayn nga a kadi njekeltakita Luwə'ti ki tə'a nan Agabusi in Jude'ti re ingə'je non†.

¹¹ Njekeltakita Luwə'ti kakin un ndar də bədi lə Pol də'n ji'ne'gi ki nja'ne'gi, ningə el ene: «Ndil Luwə ene, me bebo'ti ki Jerujalem, Juwipi'gi a də'i'ə to ndar də bədi kin be. Ningə a ilə'i'ə ji de'gi'ti ki in Juwipi'gi el.»

¹² Lokı j'oo ta kin ningə j'in ki ngannkon'je'gi ki Sejare'ti j'uwə nja Pol, ji dəj'ə kadi aw Jerujalem'ti el.

¹³ Nan Pol ilə'je'ti ene: «Ononyi'se kadi nonyi adi me'm gangi mann. M'in Pol m'in ndəkba kadi de'gi dəi m'in par el, nan re ɔjidə koy kaa, m'in ndəkba kadi m'oy tado tə Burəbe Jeju

* **21:8 21.8** 6.5, 8.5 † **21:10 21.10** 11.28

Jerujalem'ti.»

¹⁴ Loki j'oo kadi Pol təl rō'ne go ta'gi'ti ki j'el'ə el, j'in kaa ji təl ji ta kon tō, ə ji təl ji dəji kadi Luwə ra ndigi lə'ne par.

¹⁵ Go ndo'gi'ti ki ji ra dənangi Sejare'ti, ji ra go rō'je ə j'otì j'aw Jerujalem'ti.

¹⁶ Njendo'gi kī madi kī Sejare'ti awi se'je nan'ti Jerujalem'ti. Loki ji te Jerujalem'ti ningə dani'je me kəy'ti kī de madi kī tō'a nan Minason, adi j'isi'ti. In de kī Sipir'ti. In kī kare mbunə njendo'gi'ti kī dökete.

¹⁷ Loki ji re ji te Jerujalem'ti, ngannkon'gi uwə'i'je rō'de'ti kī rənel kī ətì bol.

¹⁸ Lo ti də'ti, Pol aw se'je me kəy'ti lə Jaki. Lo kin'ti ə, j'ingə ngatəgi'gi lə njekawnan'gi pəti, səm'ti non.

¹⁹ Go kuwə ji'ti kī Pol uwə ji'de ningə, ɔr'de poy nya'gi kī Luwə ra tədə ginn de'gi kī in Juwipi'gi el, kī takul kulə li'ə kin, bere bere adi'de oyi.

²⁰ Go nya'gi'ti kī Pol ɔr'de poy'o kin ningə, uləi təjì də Luwə'ti, ə eli Pol eyina: «Ngonnnkon'je, ində kum'i oo, Juwipi'gi dər banyi banyi ə uni me'de adi Jeju, nan pəti uwə'i go ndukun lə Mojì ngan.

²¹ Ningə kī ngosine kin oyi ta də'i'ti tokı isi ndo Juwipi'gi pəti kī sii to mbah'gi dənangi'gi'ti kī rangi kadi inyəi go ndukun'gi lə Mojì kō num, el'de kadi ujəi məti ngann de'gi el num, taa nya jibəlbe'gi lə Juwipi'gi ka kadi uni go'ə el num tō.

²² Adi ji mər də nya'ti kadi ji ra, tədə a oyi poy'i kadi in re ka par am!

²³ Be ə, maji kadi ra nya'gi kī j'a j'eli kam. J'aw

Kulə'gi lə njekawkulə'gi 21:24 lxxxvii Kulə'gi lə njekawkulə'gi 21:28

kì de'gi so mbunə'je'ti ne kì uni mindi'de kadi n'indəi rɔ'de ta dangi tado lə Luwə.

24 Maji kadi or de'gi kin go'i'ti, ə ra se'de nyajibəlbe kar rɔ dɔ majel'ti, ə ugə dɔ'de kadi ngisəi dɔ'de‡. Ningə de'gi pəti a gəri kadi poy ta'gi pəti kì oyi ɔjidɔ'i in ta'gi ki ngom. Tado inbe kì dɔ'i, təl rɔ'i go ndukun'gi'ti lə Moji.

25 Kì ɔjidɔ de'gi kì in Juwipi'gi el kì uni me'de, ndukun'gi kì jì ndangi j'ulə'n j'adi'de, in kadi soi da kì iləi kadikare'ti bari'n yo el num, kadi soi mosi el num, da kì de mbir m'ində el, ə kadi sangi nan kigo lo kaya'ti kaa, kadi goto dann'de'ti tɔ§.»

26 In be ə, lo ti go'ti ningə, Pol aw kì de'gi ki so kakin, ar rɔ'ne se'de, ningə go'ti ur natı Køy'ti lə Luwə, ojì ndɔ kì ginn kar rɔ lə'de a gangi'n, ə kadi de kì ra dann'je'ti a re'n kì kadikare, kadi adi Luwə.

De'gi uwəi Pol

27 Loki nanyi ndəkba kadi ginn ndɔ kì siri gangi, Juwipi'gi madi kì in dənangi Aji'ti, oyi Pol Køy'ti lə Luwə kakin. Suləi bulə de'gi dɔ'a'ti ə osi si'ə uwəi'ə,

28 ningə elita kì ndu'de kì bo eyina: «In de'gi kì Isirayel, rei ɔsi ginn'je! De kam ə, in njendo de'gi kì lo'gi pəti kadi ɔsi ta de'gi lə'je num, ndukun'gi lə'je num taa køykawnan kin num tɔ. Ningə kì rangi bay, re ur kì de'gi kì ujəi məti'de el natı Køy'ti lə Luwə kadi təl'n lo kì ar njay kin, lo kì to njen'ti.»

‡ 21:24 21.24 18.18 § 21:25 21.25 15.20

Kulə'gi lə njekawkulə'gi 21:29 lxxxviii Kulə'gi lə njekawkulə'gi 21:36

29 Elita kin be, tado kete oyi Tiropim, de ki bebo Epeji'ti si'ə me bebo Jerujalem'ti, adi məri me'de'ti tokı Pol re ur si'ə Kəy'ti lə Luwə.

30 De'gi rai njir dənan'ti me bebo'ti ki Jerujalem'ti ba pəti. Ningə de'gi tei ki lo njon njon isi rei bur bur. Rei uwəi Pol tei si'ə Kəy'ti lə Luwə ki taga. Ningə tanan'ti non uwəi takəy'gi uti.

31 De'gi sangi kadi n'toli Pol. Ningə kete bay taa kadi toli'ə, poyta osi mbi ki boi'ti ki də njero'gi'ti ki Rəm'ti kadi bebo Jerujalem ba pəti ra ki nja'ne taa.

32 Tanan'ti non par ə, indəi taa buki njero'gi kibo'gi ki də kuti njero'gi'ti ki bu, ə anyi ngodi ki rə bulə de'gi'ti. Lokı bulə de'gi kakin oyi kibo ki də njero'gi'ti ki njero'gi ningə, tai kon ta kində Pol'ti.

33 Lokı re te rə bulə de'gi'ti, kibo ki də njero'gi'ti kakin ɔti ndəkba ki rə Pol'ti, un ndu'ne adi uwəi'ə, ə adi dəi'ə ki kulə gindi joo. Ningə təl dəjə ta ene: «Nan in dingəm kam wa? Ə ri ə ra wa?»

34 Ningə ta ki yəti to dangi dangi dann bulə de'gi'ti, ta lə'de un go nan el. Adi lo kadi kibo ki də njero'gi'ti kakin oo ta ki rəta'ti goto. Be ə un ndu'ne kadi ai ki Pol me ndogi bər'ti ki ngal, lo kisi njero'gi'ti

35 Lokı Pol re te rigi lo njiyə'gi'ti kin ningə, lowə goto adi njero'gi uni'ə, tado bulə de'gi bətirəi'ə ki wongi ngayn.

36 Bulə de'gi ki sii njiyəi go'ə'ti muki muki eli ki ndu'de ki boi eyina: «Kadi təli'ə!»

Pol elta ngannkon'ne Juwipi'gi

37 Kete bay taa kadi njero'gi awi si'ə me ndogi bør'ti ki ngal ki lo kisi'de'ti, Pol dəjɪ ta kibo ki dɔ njero'gi'ti ene: «A adi'm tarow kadi m'a m'elta kare wa?» Kibo ki dɔ njero'gi'ti kakin dəj'ə ene: «In gər kelta Gireki bəti wa?

38 M'gər el adi m'ɔjɪ m'ene in de ki Ejipiti ki ndɔki me ndɔ'gi'ti ki gogɪ ne kin, sulə de'gi adi rai wongɪ, ə ɔr'de asi de'gi dər sɔ ki nyakati'gi ji'de'ti, ə ur'n mu kin.»

39 Ə Pol ene: «Jagi, m'in Juwipi ki bebo'ti ki Tarsı ki dɔnangi Silisi'ti, m'in de ki me bebo'ti ki tɔ'a bar, ə nja'i ba inyə'm taa adi m'el de'gi ta.»

40 Be ə, kibo ki dɔ njero'gi'ti ad'a tarow. Pol ində ra taa dɔ rigɪ lo njiyə'ti, buki ji'ne dəjɪ'n bulə de'gi kadi uri mbi'de. Loki lo to jijiji ningə, el'de ta ki ta Ebirə.

22

1 Pol el ene: «Ngannkon'm'gi ki bai'gi, uri mbi'se maji kadi oyi ta ki m'aw to m'el'se ngɔsine kadi m'manjɪ'n ta dɔ rɔ'm'ti kin.»

2 Loki oyi kadi Pol el'de ta ki ta Ebirə ningə, təli adi lo to jijiji inbe bay kadi n'oyi ta li'ə.

3 Be ə Pol el'de ene: «M'in Juwipi ki oji'm'in Tarsı'ti, ki dɔnangi Silisi'ti. Nan otı'm'in Jerujalem'ti ne. Gamaliyel* ə in njendo'm ndukun lə kaw'je'gi kadi m'gər maji maji. Kete m'tingə bil tado lə Luwə tokı rai ngɔsine kin be tɔ.

4 M'adi kon de'gi ki nje kun go nyando ki m'nji m'ndo kin kadi ki asi ta koy'de. M'uwe'de: dene'gi ki dingəm'gi, m'tɔ'de m'tilə'de dangay'ti.

* 22:3 22.3 5.34

⁵ Kibo lə njekujənyamosi kadikare'gi ki ngatɔgi'gi pəti asi kadi a manyinaji lə'm dɔ ta'ti kin. Inbe'gi ə m'taa makitu ji'de'ti kadi m'aw m'uwa'n ngannkon'gi ki Damasi'ti ki nje kun go nyando kin. M'uwa'de kadi m're se'de Jerujalem'ti ne m'buki'de dangay'ti†.

⁶ Lokì m'in dɔ row'ti, m're ndækba ki Damasi'ti, ningə ki kadi ki in ndækba ki jam dɔ be ə, tanan'ti non par ə, kunji kibo ngayn in doran'ti re unji gugì dɔ'm.

⁷ M'osi ki takum nanga, ningə m'oo ndu ta madi el'm ene: "Sol, Sol, tadɔ ri ə isi adi'm kon be wa?"

⁸ Ə m'ilə'ti m'ene: "In nan ə Burəbe?" Ningə təl el'm ene: "In m'in Jeju ki Najareti'ti ki isi ad'a kon."

⁹ Nje ki in sə'm oyi kunji kakin maji, nan oyi ndu'de ki isi el'm ta el.

¹⁰ Lo kin'ti, m'dej'ə m'ene: "Burəbe, in ri ə kadi m'ra wa?" Nga a Burəbe el'm ene: "Ində taa aw Damasi'ti non, ə a eli'nu nya'gi pəti ki kadi ra."

¹¹ Kunji ki eti bol ngayn kakin ra adi kum oo lo el, adi de'gi ki in sə'm ndəri m'in to ndər ə ai sə'm Damasi'ti.

¹² Ningə Damasi'ti, dingəm kare ki bari'ə nan Ananiyasi isi non. In de ki njera go ndukun'ti, adi Juwipi'gi pəti ki Damasi'ti ndigi ta li'ə ngayn.

¹³ In ə aw rɔ'm'ti el'm ene: "Ngonkon'm Sol, kadi kum'i oo lo." Ningə tanan'ti non par ə kum oo lo adi m'oo'ə.

¹⁴ Ningə el'm ene: "Luwə lə kaw'je'gi mbəti kete nu kadi in gər ndigi li'ə, ə kadi oo Nje ki ra

† 22:5 22.5 4-5, 8.3, 9.1-2

dana, taa kadi oo ta ki ta'a'ti to.

¹⁵ Tadə a in nje mannajì li'ə də nya'gi'ti ki oo ki kum'i num, oo ki mbi num, ki rə de'gi'ti pəti.

¹⁶ Ningə ki ngosine kin, nya ki nanyi kadi de ra goto nga. Ə ində taa, bar to Luwə, ə ra'a batəm, adi majel'gi lə'i in ki togı ko."»

Pol elta də kulə'ti ki ingə

¹⁷ «Loki m'təl m're Jerujalem'ti, m'nji m'elta ki Luwə me Kəy'ti lə Luwə ningə, m'oo nya me ndil'ti.

¹⁸ M'oo Burəbe el'm ene: "In taa kalangi kadi te ko Jerujalem'ti, tadə a taai naji lə'i ki a man də'm'ti el."

¹⁹ Lo kin'ti, m'el'ə m'ene: "Burəbe, de'gi kin gəri maji kadi in m'in ə kete m'in nje kaw ki lo kəykawnan'ti lə Juwipi'gi, m'uwe nje ki uni me'de adi'nu, m'tində de'gi m'tilə'de dangay'gi'ti.

²⁰ Taa lokı ndəki isi toli nje mannajì lə'i Etiyenn kin ka, m'in low'ə'ti non to. Adi ndu'm in nan'ti ki nje tol'o'gi, m'inbe m'nji ta ku'gi'ti lə'de m'ngəm‡."

²¹ Nan Burəbe el'm ene: "Aw, tadə m'a m'uləi sanyi rə de'gi'ti ki in Juwipi'gi el."»

Pol el toki n'in de ki Rom'ti

²² Loki uri mbi'de oyi ta lə Pol biti tei də ta'ti kin ə, uni ndu'de ki taa eli eyina: «De ki be kin in de ki kadi goto ko dənangı'ti. In de ki kadi isi ki də'ne taa el.»

²³ Uri kol ningə, təri ku'gi lə'de tiləi ko, ə kəri bu sananyi ki taa.

‡ 22:20 22.20 7.58, 8.1

24 Lo kin'ti, njekundō njero'gi un ndu'ne kadi awi ki Pol me ndogi bør'ti ki ngal kadi dəji'ə ta ki ndəy kadi el nya ki ra nya ə adi de'gi isi ungi bilə dɔ'a'ti kin.

25 Nan, loki dɔi Pol kadi indəi'ə ə, Pol el kibo lə njero'gi kare ki ra non ene: «Adi ai ki tɔgi kadi indəi de ki Rɔm'ti ki ta kaa de gangi dɔ'a'ti el wa\$?»

26 Lokı kibo lə njero'gi oo ta kin ningə, aw el kibo ki dɔ'de'ti ene: «Ra nya ki aw to ra kin el, de kam in de ki Rɔm'ti.»

27 Lo kin'ti, kibo ki dɔ njero'gi'ti re rɔ Pol'ti dəj'ə ene: «El'm adi m'oo, in de ki Rɔm'ti wa?» Ə Pol el'ə ene: «Oyo, m'in de ki Rɔm'ti.»

28 Ə kibo ki dɔ njero'gi'ti el Pol ene: «M'in m'adi nar ngayn bay taa kadi m'təl'n de ki Rɔm'ti.» Nan Pol el'ə ene: «Yan'm m'in, oji m'in to kojì.»

29 Par ə, tanan'ti non, de'gi ki kete kadi indəi Pol, dəji'ə'n'ə ta kakin tɔri rɔ'de gogi. Kibo ki dɔ njero'gi'ti inbe kaa bol ra'a tɔ, loki oo kadi Pol in de ki Rɔm'ti, ə n'adi dɔi'ə ki kulə gindi.

Pol ra non njegangita'gi'ti lə Juwipi'gi

30 Kibo ki dɔ njero'gi'ti sangi kadi n'gər nya inbe ki Juwipi'gi səki Pol kin ar njay. Be ə, lo ti dɔ'ti ningə, adi tuti Pol, ə adi ndu'ne kadi kibo'gi lə njekujənyamosi kadikare'gi ki njegangi ta'gi lə Juwipi'gi kawinan, ə aw ki Pol non'de'ti.

23

1 Pol gon njegangi ta'gi lə Juwipi'gi ba, ə el'de ene: «Ngannkon'm'gi, me'm uwə'm ki ta nden

el, dɔ kɪ ra'm'ti kɪ m'ra non Luwə'ti biti bone.»

² Ningə kibo lə njekujənyamosi kadikare'gi ki bari'ə nan Ananiyasi adi ndu'ne de'gi kɪ rai kadi Pol'ti kadi indəi ta'a.

³ Ə Pol el'ə ene: «In in ə Luwə a indəi, in bɔr kɪ koy pon gidi'ti kadi nda kare. Si ne kadi gangi ta dɔ'm'ti kigo ndukun'ti, ningə təl aldɔ ndukun, adi ndu'i kadi indəi m'in bay.»

⁴ Nje kɪ rai kadi Pol'ti ndəkba eli'ə eyina: «Tajı kibo lə njekujənyamosi kadikare'gi lə Luwə wa?»

⁵ Pol el'de ene: «Ngannkon'm'gi, m'gər kadi in kibo lə njekujənyamosi kadikare'gi lə Luwə el. Tadɔ ndangi me makitu'ti lə Luwə eyina: "A elta kɪ majel dɔ ngar'ti lə de'gi lə'i el*."»

⁶ Lokɪ Pol gər kadi de'gi kɪ kawinan kin, nje kɪ nan'gi in Sadusi'gi, ə nje kɪ nungı in *Parisi'gi ningə, un ndu'ne kɪ taa dann njegangita'gi'ti ene: «Ngannkon'm'gi, m'in Parisi, nje koji'm in Parisi[†]. Ningə in tadɔ kində kɪ m'ində me'm dɔ kində taa lo koy'ti lə njekoy'gi kin ə rei sə'm lo gangi ta'ti.»

⁷ Lokɪ Pol elta kin ə, ta kɪ manjinan'ti in dann Parisi'gi'ti ki Sadusi'gi, adi de'gi gangi nan.

⁸ Tadɔ Sadusi'gi eli eyina de'gi a indəi taa lo koy'ti el, taa malayka'gi, kɪ ndil'gi kaa gotoi to. Nan Parisi'gi eli tokɪ nya'gi kin toi non[‡].

⁹ Lo singə səkitə, ə njendangi ndukun'gi ki me kuti'ti lə Parisi'gi indəi taa elita kɪ tɔgi'de eli eyina: «J'in j'oo nya madi kare kɪ majel rɔ dingəm'ti kin el. Dəmajı ə in ndil eke malayka

* 23:5 23.5 Tekitaga 22.27 † 23:6 23.6 26.5; Plp 3.5 ‡ 23:8

23.8 Mat 22.23; Mrk 12.18; Luk 20.27

inbe ə el'ə ta.»

¹⁰ Lokı takasinan el aw ki kete kete, kibo lə njero'gi bol kadi de'gi kin in uwəi Pol. Be ə, un ndu'ne adi njero'gi kadi rei ɔri Pol awi si'ə me ndogi bɔr'ti ki ngal gogi.

¹¹ Kondo go'ti ə, Burəbe te bus rɔ Pol'ti el'ə ene: «Uwə togi ba. Toki mannajì lə'm Jerujalem'ti, maji kadi mannajì kin Rɔm'ti tɔ.»

De'gi dɔi ta nan'ti kadi n'tɔli Pol

¹² Lokı lo ti, Juwipi'gi uni mindi'de kadi n'usɔi nya el num, n'anyi nan mann el num, biti kadi n'tɔli Pol binəm taa.

¹³ Nje ki dɔi ta nan'ti kin ali dɔ dɔsɔ kare.

¹⁴ Ningə ai eli kibo'gi lə njekujənyamosi kadikare'gi, ki ngatɔgi'gi eyina: «J'un mindi'je ki ngan ngayn kadi j'uso nya el num, j'anyi mann el num, biti kadi ji tɔl Pol binəm taa.»

¹⁵ Ningə ki ngɔsine kin, ingi kadi ndu'se in nan'ti ki njegangi ta'gi, ə kadi awi ingəi kibo lə njero'gi, eli'ə tokı gəi kadi re ki Pol non'se'ti kadi indəi manjì ta li'ə maji maji oyi. Nga a, lokı Pol a re ə, te rɔ'se'ti el bay ə j'in j'a ji tɔl'ɔ.

¹⁶ Ngonn lə konnann Pol kare oo ta kin, adi aw go Pol'ti me ndogi bɔr'ti ki ngal el'ə.

¹⁷ Be ə, Pol bar njekundo kuti njero'gi ki bu kare el'ə ene: «Aw ki ngonn kin rɔ kibo'ti lə njero'gi. Aw ki ta kare non kadi el'ə.»

¹⁸ Njekundo njero'gi ki bu aw ki ngonn kakin rɔ kibo'ti ə el'ə ene: «Dangay ki bari'ə Pol ə bari'm, ene m're ki ngonn kin rɔ'i'ti, tokı aw ki ta kare non kadi el'i.»

19 Kibo lə njero'gi, uwə ngonn kakin ji'ne'ti, ɔr'ɔ aw si'ə dow kare, ə dəj'ə ene: «Ta ri ə awi'n kadi el'm wa?»

20 Ngonn kakin el'ə ene: «Juwipi'gi dəi ta nan'ti kadi n'dəjì nu kadi in te ki Pol lo ti'ti, non njegangita'gi'ti lə'de, toki gei kadi n'indəi manji ta li'ə maji maji n'oyi.

21 Nan maji kadi oo ta lə'de el. Tado de'gi ki tei də so kare a toi row'ə kadi uwəi'ə. Uni ndu'de ki ngan ngayn be kadi n'usci nya el num, n'anyi nan mann el num, biti kadi n'toli'ə ə binəm taa. Ki ngosine kin, sii də nja'de'ti, isi nginəi ndu par.»

22 Kibo lə njero'gi, ilə ndu'ne adi ngonn ki basa kakin kadi elta kin kete adi de ki rangi oo el, ə inyə adi aw.

23 Go'ti, kibo lə njero'gi, bar njekundə njero'gi ki bu in joo el'de ene: «Osi nja njero'gi bu joo nan'ti, nje kal sində'gi də siri, ə nje ki nungi'gi bu joo tə. Ningə sii də nja'se'ti kadi ki dəjoo gidə in kare ə, uni tarow ki kaw ki Sejare'ti.

24 Indəi də sində'gi nan'ti uni Pol tə. Ə kadi awi tei si'ə rə nje konbe'ti Pelisi, ki kanji kadi nya madi ra'a.»

25 Kibo lə njero'gi ndangi makitu kin be adi nje konbe ene:

26 «M'in Kilodi Lisiyası ə m'ndangi makitu kin m'ad'i kibo lə'm, nje konbe Pelisi. Nya ki dəkete, m'uwe ji'i!

27 Ningə dingəm kin, Juwipi'gi uwəi'ə kadi re a təli'ə, ə loki m'oo kadi in de ki Rəm'ti, m'aw ki njero'gi m'taa'ə'n ji'de'ti.

28 M'sangi kadi m'gər nya inbe ki ra ə Juwipi'gi

səki'ə'n'ə, adi m'aw si'ə non njegangi ta'gi'ti
lə'de in Juwipi'gi.

²⁹ Lo kin'ti ə, m'oo kadi səki'ə əjidə ndukun'gi
lə'de, nan nya madi kare ki majel ki ra ki ası kadi
de təl'ɔ'n'ə eke uwə'n dangay'ti goto.

³⁰ Eli m'in kadi Juwipi'gi isi sangi row kadi
n'təli'ə, be ə, m'un'ə kalangi m'ulə si'ə m'ad'i.
Ningə m'un ndu'm kadi awi səki'ə rɔ'i'ti nu.»

³¹ Njerɔ'gi rai tokı kibo lə'de ɔji'n'de, adi awi
ki Pol kondə'ti ratata tei si'ə Antipatirisi'ti.

³² Lo ti dɔ'ti, njerɔ'gi ki nje nja təli gogi lo
kisi'de'ti, ə inyəi nje sində'gi adi awi ki Pol.

³³ Loki tei Sejare'ti, nje sində'gi uni makitu lə
nje konbe, ə ɔji'ə Pol tɔ.

³⁴ Nje konbe tudə makitu kakin, ə dəji Pol ke
in de ki dənangı'ti ki ra wa? Ningə oo kadi Pol
in de ki Silisi'ti.

³⁵ Ə el Pol ene: «M'a m'oo ta ki ta'i'ti, ndə ki
nje səki'gi infe a rei.» Ningə adi ndu'ne kadi
ngəmi Pol me kəy ngar'ti lə Erodı.

24

Juwipi'gi indəi taa də Pol'ti

¹ Ndə mi go'ti, kibo lə njekujənyamosi
kadikare'gi ki bari'ə nan Ananiyası re Sejare'ti.
De'gi ki dani'ə rei si'ə in ngatəgi'gi taa njenajı
də de'gi'ti ki bari'ə nan Tertulusi tɔ. Ananiyası
ki de'gi ki go'ə'ti kin awi səki Pol rɔ nje konbe'ti
ki dənangı Sejare'ti*.

² Loki bari Pol ə, Tertulusi ulə ngirə kində ta
də'a'ti non nje konbe'ti ene:

* **24:1 24.1** 23.24

3 «In kibo, Pelisi, ki takul'i, ki takul gosi konbe lə'i, ki takul nya'gi ki tur ginn'de ki tado maji lə de'gi me be ə, j'isi'n ki lapiya. In kin in maji ki ji gər ki lo'gi pəti me nya'gi'ti pəti, ə j'isi rai oyo.

4 Ningə, kadi j'indəi kɔr'ti ngayn el, ji dəjì kadi ur mbi, kigo me maji'ti lə'i kadi oo'n dɔ ta ki j'a j'eli ta'gi kare ke joo.

5 J'oo kadi dingəm kam in nje tuji be. Re ki ganginan dann Juwipi'gi'ti ki lo'gi pəti dənangı'ti ne. In njekundo kuti lə de'gi ki Najareti'ti[†].

6 Aw biti kadi n'təl ki *Kəy lə Luwə lo ki to njen'ti, ə j'uwa. [

7 Ji ndigi kadi ji gangi ta dɔ'a'ti kigo ndukun'ti lə'je, nan njekundo njero'gi ki bari'ə nan Lisiyası, re ində tɔgi ta'ə'n'ə ji'je'ti.

8 Ningə un ndu'ne kadi nje kində ta dɔ'a'ti rei nonyi'ti.] Kin ə el'je ta ə, inbe a oo kadi ta'gi ki j'el dɔ'a'ti kin in ta ki rɔta'ti.»

9 Juwipi'gi indəi rɔ'de nan'ti ki Tertulusi eyina, ta'gi ki el dɔ Pol'ti in ta ki rɔta'ti.

Pol un ta ta'ne'ti non Pelisi'ti ki nje konbe

10 Nje konbe ra nya madi adi'n tarow Pol kadi elta. Be ə, Pol un ta ta'ne'ti ene: «M'gər kadi ası bal ngayn ə isi gangi ta me be'ti lə'je ne. Ningə, in kigo taa ki m'taa me'i ə m'a m'manjı'n ta dɔ'm'ti non'i'ti.

11 Ası kadi inbe in sangi ginn'ə ə a gər maji. Kaw ki m'aw Jerujalem'ti m'ɔsi dɔ'm nanga non Luwə'ti kin, m'aldo ndɔ ki dɔgi gidə in joo el bay.

12 Ningə, lokı m'aw kin, in me Kəy'ti lə Luwə, eke me kəykawnan'ti lə Juwipi'gi, eke lo madi'ti

[†] 24:5 24.5 Mat 2.23

Kulə'gi lə njekawkulə'gi 24:13 xcviii Kulə'gi lə njekawkulə'gi 24:20

kì rangì me bebo'ti non, de kì oo'je, j'isi ji manji
nan ta kì de madi, eke oo'm m'nji m'sulə de'gi
goto.

¹³ Taa de'gi inbe kì rai ne kam, asi kadi ɔji nya
madi kare dō ta'ti kì indəi dō'm'ti kin, kadi in ta
kì rōta'ti, el tō.

¹⁴ Ningə, m'gər non'i'ti ne tokì, m'nji m'ra
kuləbər lə Luwə lə bai'gi. M'ra kulə kin kì gorow
kì ingi kì indəi taa dō'm'ti kin, oyi kadi in gorow
kì low'ə'ti el. M'in m'oo kadi kunme dō nya'gi
pəti kì ndukun lə Moji elta'a, kì nya'gi pəti kì
de'gi kì njekeltakita Luwə'ti elita'a in nya'gi kì
rōta'ti.

¹⁵ M'ində me'm dō nya'ti kin rō Luwə'ti. Ningə
ingi kaa, indəi me'de dō'ti tō. Pəti, j'ində me'je'ti
kadi de'gi ki njera nya ki dana ki njera nya ki
dana el, a indəi taa lo koy'ti.

¹⁶ In tadə kin ə, m'ində təgi dō rō'm'ti kadi
me'm uwə'm ki ta non Luwə'ti el num, non
de'gi'ti el num tō.

¹⁷ Go bal'gi'ti kì banyi banyi kì m'goto, m're
ki nar kadi m'ra'n kì de'gi lə'm, taa kì kadikare
kadi m'adi Luwə tō.

¹⁸ Lo kin'ti, in Juwipi'gi kì Aji'ti, ə ingəi m'in
m'a m'ra kuji nya ra'gi kì tadə kar rō njay me
Kəy'ti lə Luwə. Lo kì ingəi m'in kin, de'gi uwəi
nan gidi'm'ti el num, taa de ra nya kì biriri el
num tō‡.

¹⁹ Nga ningə, in Juwipi'gi kì Aji'ti kakin ə re a
rei non'i'ti ne kadi to indəi taa dō'm'ti, lokì re ai
sə'm ki ta madi.

²⁰ A re in be el tō ningə, nje kində ta dō'm'ti
kì rai nya kakin, elita nya kì m'tol ə oyi ta'a, lokì

‡ 24:18 24.18 17-18, 21.17-28

m'ra'n non nje gangı ta'ti lə Juwipi'gi kakin adi j'oo.

²¹ Ta kare ki m'un ndu'm taa non'de'ti m'ene: "In ki kadi ki m'un me'm kadi njekoy'gi a indəi taa lo koy'ti ə m'ra'n non'se'ti lo gangı ta'ti ne\$", kin inbe ə in ta ki kareba ki kadi rai dɔ'ti inbe taa.»

²² Pelisi ki gər row lə Kirisiti maji*, ɔr ndə kete, ningə el'de ene: «Ndə ki Lisiyası ki njekundo njero'gi re ə to m'ində manji ta lə'se kin bay».

²³ Ningə adi ndu'ne adi kibo lə njero'gi ki bu, kare ki njengəm Pol kadi ngəm'ə dangay'ti. Nan k'in ə kadi inyə Pol adi ilə rə'ne, taa kadi inyə tarow adi de li'ə ki ra ki ge kadi n'ra si'ə kaa, kadi ra si'ə tə.

Pol ra non Pelisi'ti in ki ne Dirusil

²⁴ Ası ndə'gi go'ti, Pelisi təl rei ki ne'ne Dirusil ki in Juwipi. Loki rei, ulə adi rei ki Pol adi el'ə ta ki də kunme'ti, me tə Jeju Kirisiti'ti.

²⁵ Nan loki Pol elta te'n də nyara ki dana'ti, ki kuwə rə ginn təgə'ti, ki ta ki gangı ki a re ningə, bol ra Pelisi adi el Pol ene: «Ası nga, ə aw to ndə ki m'ingə dəkagilo ki rangı ə m'a m'bar'i bay.»

²⁶ Ningə ojı me'ne'ti tokı Pol a adi'ne nar wa be, adi taa taa, bar Pol adi re wal si'ə ta.

²⁷ Bal joo dər də Pol'ti, ningə Pərsiyusi Pəsitusi ɔr tor Pelisi. Pelisi ndigi kadi n'ra nya ki nəl Juwipi'gi adi inyə Pol dangay'ti ba.

25

*Pol ndigi kadi n'aw non nje konbe'ti kibo ki
Rɔm*

¹ Ndɔ mutə go k'un kulə konbe dɔ dɔnangi'ti
ki kadi a onbe dɔ'ti, Pəsitusi in Sejare'ti aw
Jerujalem.

² Lo kin'ti, kibo'gi lə njekujənyamosi
kadikare'gi ki kibo'gi lə Juwipi'gi, rei səki dɔ Pol
rɔ'a'ti.

³ Me səki'ti, dəji Pəsitusi ki non kum'de'ti kadi
ra se'de ə ulə ki Pol Jerujalem. Nan ki rɔta'ti
ə, indəi dɔ ta nan'ti kadi to gangi Pol dɔ row'ti
tɔli'ə.

⁴ Non be, Pəsitusi el'de ene: «Pol in dangay'ti
Sejare, taa m'inbe ki dɔ'm kaa ndɔ ngayn el ə
m'a m'təl kadi m'aw Sejare'ti.

⁵ Nan, re dingəm kin ra nya ki go'ti el non ə,
maji kadi kibo'gi lə'se awi sə'm nan'ti səki'ə.»

⁶ Pəsitusi ra ndɔ ki asi jijoo, a re ngayn ə dɔgi
be par, ə təl aw Sejare'ti gogi. Lokì təl re ə, lo ti
ki rangi go'ti ningə, aw lo gangi ta'ti, un ndu'ne
adi rei ki Pol non'a'ti.

⁷ Lokì Pol re, Juwipi'gi ki in Jerujalem'ti iləi
nan gugi dɔ'a, indəi ta'gi ki ngan ngan ngayn
dɔ'a'ti. Nan asi kadi ojì nya'gi ki rɔta'ti ki ar
njay be dɔ'ti el.

⁸ Be ə, Pol manji ta dɔ'ne'ti ene: «M'ra nya
madì ki majel ki ndukun lə Juwipi'gi el num, ki
Key lə Luwə el num, taa m'ɔsi'n ta Sejar el num
tɔ.»

⁹ Pəsitusi ki ndigi ra nya ki nəl Juwipi'gi, el Pol
ene: «In ndigi kadi aw Jerujalem'ti kadi gangi ta
dɔ'i'ti dɔ ta'ti kin takum'ti wa?»

Kulə'gi lə njekawkulə'gi 25:10 ci Kulə'gi lə njekawkulə'gi 25:18

10 Ə Pol ene: «Jagi, in non lo gangı ta'ti lə nje konbe kì bo Sejar ə m'ra'ti, ə in lo kì a gangi ta dɔ'm'ti səm'ti. Toki inbe gəri'n maji, nya madi kare kì low'ə'ti el kì m'ra kì Juwipi'gi goto.

11 Kin ə re m'ra nya kì dana el eke m'tol nya kì ası koy'm, ə m'a mbəti koy el. Nan re ta'gi kì indəi dɔ'm'ti in ta'gi kì rəta'ti el ə, de kì a ingə tarow kadi ulə'm ji'de'ti goto. M'dəjì kadi m'oo Sejar.»

12 Lo kin'ti, Pəsitusi elinan ta kì njekojì ta'gi lə'ne, ə go'ti el Pol ene: «Dəjì kadi oo Sejar ə, a aw non Sejar'ti».

Pol ra non Agiripa'ti kì Berenisi

13 Ası ndɔ'gi go'ti, ngar Agiripa in kì konann'ne Berenisi rei Sejare'ti tadə kuwə ji Pəsitusi.

14 Rai ndɔ'gi ası ta'ti rɔ'a'ti non, adı Pəsitusi ində taa lə Pol non ngar Agiripa'ti el'e ene: «Pelisi inyə dingəm madi dangay'ti non.

15 Adı loki m'aw Jerujalem'ti, kibo'gi lə njekujənyamosi kadikare'gi, kì ngatəgi'gi lə Juwipi'gi rei səki'ə rɔ'm'ti, ə dəji'm'in kadi m'gangı ta koy dɔ'a'ti.

16 Ə m'el'de toki row ra'a lə de'gi kì Rəm'ti in be el. De kì Rəm'ti a ulə'de ji nje sək'ə'gi'ti kì kanji kadi de'ə ingə tarow manji'n ta dɔ'ne'ti non nje sək'ə'gi'ti el.

17 Be ə, rei ne, ningə, m'ndigi kadi ndɔ'gi dər kare el, adı lo ti kì rangı go'ti par ə m'aw lo gangı ta'ti m'adı rei kì dingəm kakin.

18 M'mər me'm'ti kadi nya madi kì ngan kì ra to non, nan loki nje sək'ə'gi rei ningə, de oo lo nya madi kì ngan kì ra kadi indəi ta dɔ'a'ti be el.

19 In ta kī manjī par ə manjī nan'tī se'de ɔjidɔ row ra Luwə lə'de ingi be num, ɔjī dō de madi kī tō'a nan Jeju kī oy ə Pol ene isī kumngayira.

20 Ta lə'de kin, m'gər lo kujə kī kadi m'ra'tī el, adi m'dəjī Pol inbe m'ene ke ndigi kadi aw Jerujalem'tī kadi in kī gangī ta kin dō'a'tī wa.

21 Nan Pol ndigi kadi nje konbe kibo kī Rōm'tī taa oo ta lə'ne. Be ə, m'un ndu'm kadi ngəmi'ə dangay'tī, biti kadi to m'ulə si'ə madi nje konbe kibo kī Rōm'tī, Sejar.»

22 Agiripa el Pəsitusi ene: «M'ndigi ngayn kadi m'oo ta lə dingəm kin tō.» Ə Pesitusi el'ə ene: «Lo ti ə a oo ta kī ta'a'tī.»

23 Lo ti kī rangi, Agiripa in kī Berenisi rei kī de'gi ngayn go'de'tī, uri lo gangī ta'tī. Kibo lə njerɔ'gi kī kibo'gi kī me bebo'tī in se'de. Nga a, Pəsitusi un ndu'ne adi rei kī Pol.

24 Lokī Pol re, Pəsitusi un ta el ene: «In ngar Agiripa kī de'gi pətī kī sii ne, oyi de kin. In ə bulə Juwipi'gi ngayn rei səki'ə rō'm'tī, ne ge kī Jerujalem'tī ge. Lokī səki'ə, uni ndu'de kī taa eyina in de kī majī kadi aji el.

25 Kī rō'm'tī, m'in m'oo nya madi kī ngan kī ra kī asī koy el. Ningə, toki inbe dəjī kadi n'oo nje konbe kibo kī Rōm'tī, m'un ndu'm kadi m'ad'a aw.

26 M'gər ta inbe kī kadi to m'ndangi me makitu'tī m'adī nje konbe kibo kī Rōm'tī ɔjidɔ ta li'ə kin el. In be ə, m'adī re non'se'tī ne, kibo utə, m'adī re non'i'tī in ngar Agiripa kadi to go ta'tī kī a el'je ə, m'ingə nya kī kadi to m'ndangi.

27 Tadɔ m'oo kadi in nya kī gorow'ə'tī el kadi m'ulə kī dangay Rōm'tī, kanjī kelta kī de'gi indəi

dɔ'a'ti.»

26

Pol ɔjita dɔ rɔ'ne'ti non Agiripa'ti

¹ Agiripa el Pol ene: «Tarow in lə'i kadi manji'n ta dɔ rɔ'i'ti.» Lo kin'ti, Pol un ji'ne ki taa, ningə ta ki el dɔ rɔ'ne'ti ə to kin:

² «Ngar Agiripa, rɔ'm nəl'm ngayn kadi m'ingə tarow bone, m'el'n ta dɔ rɔ'm'ti ɔji'n dɔ ta'gi pəti ki Juwipi'gi indəi dɔ'm'ti.

³ M'el be tado in gər nyajibəlbe'gi lə Juwipi'gi ki ta ki manji'gi lə'de pəti kin maji. Ningə, m'dəj'i kadi ilə me'i nanga pon, kadi oo'n ta ki m'a m'el'i kin maji.

⁴ Juwipi'gi pəti gəri nya ra'm'gi, tumginn'ə basa'm'ti nu. Gəri maji tado m'təgi dann de'gi'ti lə'm, Jerujalem'ti.

⁵ Gəri m'in mayinu. Ningə re ndigi ə, asi kadi a manyinaj'a. Manyinaji tokı m'təl rɔ'm gorow ra'a'ti lə Parisi'gi, ki in kuti ki ngan ngayn dann kuti'gi'ti ki njera ta lə Luwə lə'je*.

⁶ Ningə ki ngosine kin, rei sə'm lo gangi ta'ti, tado m'ində me'm maji dɔ nya'ti ki Luwə un ndu'ne adi kaw'je'gi kadi n'ra n'adi'de.

⁷ Ginn koji lə'je ki dəgi gidə in joo, indəi me'de'ti kadi kunndu kin a təltə'ne. Be ə, rai kulə lə Luwə ki təgi'de kondə'ti ki kada. Ningə in tado kindəmedəti kin ə Juwipi'gi indəi taa dɔ'm'ti, ngar!

* **26:5 26.5** 23.6; Plp 3.5

Kulə'gi lə njekawkulə'gi 26:8 civ Kulə'gi lə njekawkulə'gi 26:15

8 Ra bann be ə in Juwipi'gi oyi kadi in ta ki rɔta'ti el kadi Luwə a tɔsi njekoy'gi ndəl lo koy'ti wa?

9 «M'inbe ki dɔ'm, kete m'oo kadi in go'ti ngayn, kadi m'rɔ ki tɔgi'm, ki row ki dangi dangi kadi de bar to Jeju ki Najareti'ti kin el.

10 Ningə in kin ə in kuləra'm ki m'ra Jerujalem'ti. Be ə, ki tɔgi ki m'ingə ki rɔ kibo'gi lə njekujənyamosi kadikare'gi, m'buki'n njekunme'gi ngayn dangay'ti. Nga ningə loki gangi ta koy dɔ'de'ti ə, m'ndigi dɔ'ti.

11 Taa taa, m'aw ki lo kəykawnan'gi'ti lə Juwipi'gi pəti, m'adi'de kon. Ningə m'ində tɔgi dɔ'de'ti kadi manji ta gər Kirisiti. Me'm tingə'm ngayn dɔ'de'ti, adi m'aw biti go'de'ti, ki dɔ be'gi ki rangi, m'adi'de kont[†].

12 In go'ə'ti kin ə, m'ində'n m'nji m'aw Damasi'ti kadi m'uwa'de. Kibo'gi lə njekujənyamosi kadikare'gi adi'm'in tɔgi'gi, adi'm'in ndu'de'gi, kadi m'ra'n kulə kin.

13 Ngar, loki m'in dɔ row'ti, ki kadi ki jam dɔ be'ti, m'oo kunji madi ki unji utə kadi in dɔran'ti re gugì dɔ'm ki nje ki go'm'ti.

14 Jì te j'osi nanga, ningə, m'oo ndu'de madi el'm ta ki ndonn ta Ebirə ene: "Sol, Sol, tado ri ə isi adi'm kon be wa?" Tado ri ə uwə rɔ'i ngan to mangi ki uwə rɔ'ne ngan ta kində'ti lə be'ne be wa? In nya ki pasira kare!

15 Lo kin'ti m'dej'ə m'ene: "In nan Burəbe?" Ningə, Burəbe el'm ene: "In m'in Jeju ki isi adi'm kon."

[†] 26:11 26.11 9-11, 8.3, 9.1-2, 22.4-5

Kulə'gi lə njekawkulə'gi 26:16 cv Kulə'gi lə njekawkulə'gi 26:24

16 Ningə ində ra taa də nja'i'ti. Nya kī m'te m'ingə'i ə to kin: M'mbəti kadi təl njekuləbər lə'm, ningə kadi mannajī də koo'ti kī oo'm kin ge, də koo'ti kī a oo'm bay kin ge.

17 M'a m'taa'i m'iləi taa ji Juwipi'gi'ti kī ji ndəgi de'gi'ti kī m'a m'ułəi kī rɔ'de'ti.

18 Tadə kadi te kum'de, ɔr'de lo kī ndul'ti, te se'de lo kunji'ti. Kadi ɔr'de konbe'ti lə Satan, re se'de Konbe'ti lə Luwə, kadi Luwə inyə go majel'gi lə'de kɔ, kadi ingəi lo mbunə de'gi'ti kī Luwə ində taa dangi me kunme kadi Jeju'ti.

19 Lo kin'ti, Ngar Agiripa, m'tanrɔ nya k'oo me ndil'ti kī in dəran'ti kin el.

20 M'iləmbər kunme kadi Kirisiti, kī mbər k'inyə go nya ra'gi kī majel kɔ. M'iləmbər kin kī rɔ de'gi'ti kī Daması, kī rɔ de'gi'ti kī Jerujalem, kī rɔ de'gi'ti kī dənangı Jude'ti ba pətì, kī kī rɔ de'gi'ti kī in Juwipi'gi el. Ningə m'dəji'de kadi kulə ra'de tɔjì toki rɔta'ti, inyəi gorow njiyə'de kī majel kɔ ə təli kī rɔ Luwə'ti.

21 In tadə kin ə, Juwipi'gi uwəi m'in natı Kəy'ti lə Luwə kadi n'toli'm'in.

22 Nan Luwə dow bagi'ne dɔ'm'ti biti bone, adi m'ra kī dɔ'm taa, m'nji mannajī kī dɔ'm'ti non de'gi'ti kī boi kī non de'gi'ti kī du. M'iləmbər nya kī rangi el, nan in mbər nya kī de'gi kī njekeltakita Luwə'ti kī Moji ge elita'a.

23 Eli toki Kirisiti kī in De kī Luwə mbət'ə a ingə kon, a in de kī dəkete kī a ində taa dann njekoy'gi'ti tɔ. Ningə a ində taa kadi iləmbər kunji kajī kī rɔ Juwipi'gi'ti kī kī rɔ de'gi'ti kī in Juwipi'gi el.»

24 Pol ra mannajī kī dɔ'ne'ti ba bay ningə,

Pəsitusi un ndu'ne ki taa el'ə ene: «Pol, də'i majel! Nyagər lə'i ki ngayn tuji də'i wa.»

²⁵ Nan Pol təl el'ə ene: «Kibo Pəsitusi, də'm majel el, ta'gi ki m'el, in ta ki rəta'ti, ki kum'ə to.

²⁶ Ngar Agiripa gər ginn nya'gi kin maji, adı ası kadi m'tinyi rə'm katı m'el'ə ta. M'gər kadi nya ki dum'ə goto, tədə in nya'gi ki rai nya lo kiyə'ti el.

²⁷ Ngar Agiripa, un me'i də ta'gi'ti ki de'gi ki njekeltakita Luwə'ti elita'a kin eke un el wa? M'gər kadi m'un me'm m'adı də ta'gi'ti kin.»

²⁸ Ningə Ngar Agiripa el Pol ene: «Nanyi ngayn el par ə a yətə hangal'm kadi m'təl njekun go Kirisiti ə ra am!»

²⁹ Pol ilə'ti ene: «Re in ki ngosine'ti, eke ki biti bay ta kaa, m'dəjə Luwə kadi ra be. Ningə kadi in ki kar'i par el, nan kadi in ki de'gi pəti ki işi oyi ndu'm ne kin, təlitoi to m'in be tə. K'in ə kadi rai me dangay'ti kin el.»

³⁰ Lo kin'ti, Ngar Agiripa ge ki nje konbe ki dənangı'ti ki non kin ge, Berenisı ge, ki ndəgi de'gi pəti ki in se'de, ɔri rə'de gogi.

³¹ Loki işi ɔri rə'de gogi, eli nan dann'de'ti eyina: «Dingəm kin ra nya madı kare ki ası kadi de təl'ə'n'ə eke uwə'n'ə dangay'ti el.»

³² Ə ngar Agiripa el Pəsitusi ene: «Dingəm kin, in dəjə ki dəjə kadi n'aw non Sejar'ti kin el ə ası kadi inyə taa.»

kutı njero'gi ki bu, me kuti'ti lə Ogusiti, ki bari'ə nan Juliyusi kadi ngəm'de.

² J'in me to'ti ki Adirami'ti, ki a un row ki aw ngangi lo ki Aji'ti ki du. Lokı j'oti j'isi j'aw, Arisitarki ki Tesaloniki ki dənangi Maseduwann'ti in se'je nan'ti.

³ Lo ti go'ti, ji re ji te Sidon. Lo kin'ti non, Juliyusi ki ində kum'ne go Pol'ti maji ngayn, inyə tarow ad'a kadi aw rə madi'ne'gi'ti kadi rai si'ə.

⁴ Go'ti, j'in j'ilə də'je, j'un kadi dor ki bari'ə nan Sipir. Ji təl be, tadə nəl əsi'je ki gogi gogi.

⁵ J'awi j'ində babo ndəkba kadi Silisi'ti in ki Pampili gangi. J'awi ji te Mira, dənangi'ti ki Lisi.

⁶ Lo kin'ti, njekundo kutı njero'gi ki bu, ingə tokibo ki Alegijandiri'ti, ki isi aw Itali'ti, ə adi j'in me'ti.

⁷ Ji ra ndə ngayn də ba'ti. Tokibo anyi ngodi nden nden ba be, ningə j'ingə kon ngayn bay taa ji te bebo'ti ki Nidi. Nəl əgi'je kaw ki kete, adi ji te ki row ki ginn dor'ti ki Kireti, kaw ki kadi Salmone'ti.

⁸ Lo kəti kete in lo təl nan. J'oti nden nden j'ində kadi lo biti taa ji re ji te lo'ti madi ki bari'ə nan ta ba ki Maji, ndəkba kadi bebo'ti ki bari'ə nan Lase.

⁹ Kagilo dər ngayn də'je'ti. Dəkagilo kəgi rə nyakusə ki nanyi kul'ti kaa dər tə*, adi kaw ki kete lə tokibo kaa təl re ngan ki ası koy bay tə.

¹⁰ In tadə kin ə, Pol ndəjı'de ene: «Kaman'gi, m'oo kadi kin ə re ji ndigi kadi j'uni ta mbah lə'je ki kete ə, in mbah ki nya'gi a tuji'ti. Ningə in to

* 27:9 27.9 Lebitiki 16.29-34

kì nya'gi kì me'ti par ə a tuji el, darɔ'je'gi inbe ka a tuji tɔ.»

¹¹ Nan kibo lə kuti njerɔ'gi kì bu oo ta lə Pol el, nan oo ta lə njekuwə ngandi to in kì be nje to yo.

¹² Ta ba kin maji kadi de isi səm'ti dəkagilo kul'ti el, adi de'gi ngayn ndigi kadi n'awi to re to bann wa ningə n'tei Penisi, kì ra də dor'ti ki Kireti. Ta ba kin tu rɔ'ne kì lo kurkadı'ti, in holo biti kì manga. In ə kadi n'isi'ti kadi to kagilo kul gangi də'de'ti.

¹³ Lo kin'ti, ngonn nəl madi ulə, in kì holo be re, adi oyi kadi ndigi ra lə'de a tɔlta'ne maji. Be ə, indəi taa tuti tokibo, ə iləi də'de kì kadi dor'ti ki Kireti ndəkba isi awi.

¹⁴ Nan nden ba go'ti par ə, nəl kibo madi kì bari'ə nan Erakilon in kì də dor'ti, re osi də'de'ti.

¹⁵ Nəl un to də'ne'ti. Lo kuwə tokibo nanga ta'a'ti goto, j'inyə rɔ'je kì ji'ə'ti adi aw se'je kì non par.

¹⁶ J'awi ji te holo lə dor'ti, kì bari'ə nan Koda. Lo kakin taa nəl də'je'ti, adi j'ingə tarow j'ində'n ji'je də ngonn tokibo'ti.

¹⁷ Lokì nje ra kulə me tokibo'ti uni'ə indəi'ə me tokibo'ti ə, doloi tokibo kakin kì kulə bindi bindi. Ji bol kadi j'aw j'ɔsi də'je nangira'ti ki Sirti, adi uni gindi ngo kì dəi tokibo'ti iləi'ə də mann'ti, go tokibo'ti. In be ə, nəl aw se'je kì non.

¹⁸ Nəl rɔ se'je kì tɔgi'ne ngayn, adi lo ti də'ti, dum də'de ə, buki nya'gi madi kì me to'ti kɔ.

¹⁹ Ndə kì nja mutə go'ti, ɔyi nya kì rɔ to'ti kì ji'de buki'de kɔ.

²⁰ Ndə ngayn, j'asì kadi j'oo kadi el num, j'asi

kadi j'oo mee'gi el num. Nəl nanyi ki lo kulə'ti ki təgi'ne, adi de ki ində me'ne dō te'ti goto.

21 J'usə nya el kagilo ngayn, ə Pol in ra taa dann de'gi'ti, el'de ene: «Kaman'gi, kin ə re oyi ta lə'm ə j'isi Kireti'ti ba ə, nya'gi a tuji ge, a nanyi kə ge be el.

22 Ningə ki ngosine kin, m'ulə dingəm me'se'ti kadi uwəi təgi'se ba, tado de ki a tuji dann'se'ti goto. Nya ki a tuji, in tokibo ki ginn'je'ti.

23 Luwə lə'm ki m'nji m'ra kulə li'ə kin, malayka li'ə kare te bus ki rə'm'ti kondə'ti ne el'm ene:

24 "Pol, in bol nya madi el. In bol el tado, maji kadi a ra non Sejar'ti. Ningə Luwə a aji de'gi pəti ki in me tokibo'ti adi."

25 In be ə ngannkon'm'gi, m'dəj'i se kadi iləi me'se nanga. M'un me'm m'adi Luwə lə'm kadi a te se'je tokı el'n.

26 Nan j'a ji təli ta'je majel dō dor'ti.»

27 J'in me kondə'ti ki nja dəgi gidə in sə, nəl un'je aw se'je ki də babo'ti ki bari'ə Adiriyatikı. Loki ji te dann lo'ti, nje ra kulə me to'ti oyi kadi j'in ndəkba ki dənangi.

28 Loki iləi nya ki kadi de gər'n kow mann ningə, ədi nangi asi tati ji'de də joo. Loki awi ki kete sanyi nden ningə, iləi bay ə, ədi nangi asi lo tati ji de dəgi gidə in mi.

29 Boli kadi j'aw j'əsi rə'je mbal madi'ti, adi buki gindi ki dəi tokibo sə kə, ə isi nginəi dəle kadi lo ti kalangi.

30 Nje ra kulə me tokibo'gi'ti sangi row k'inyə tokibo kadi nanyinan, adi uni ngonn to indəi də

ba'ti ningə, uni girə eyina n'ra n'awi kadi n'doi go kulə gindi ki doi non to'ti.

³¹ Nan Pol el njekundo kuti njero'gi ki bu num, njero'gi inbe num ene: «Kin ə de'gi kin sii se'je me tokibo'ti ba el ə, de kare kaa a te dann'je'ti el.»

³² Be ə, njero'gi gangi kulə ngonn to'ti kakin ə inyəi'ə adi aw.

³³ Kete bay taa kadi lo ti, Pol ulə dingəm me de'gi'ti pəti ene: «Oyi, ndə dəgi gidə in so bone ki isi ngəmi, ki kanji kadi soi nya.

³⁴ Ningə ki ngosine kin, m'dəj'i'se kadi uni nya soi, tado in kin ə a ra sese kadi to tei kaji'ti. M'el'se toki ngonn bisi dəde kare dann'se'ti a osi kə el.»

³⁵ Lokə Pol el'de ta ba ningə, un mapa ra oyo Luwə də'ti takum de'gi'ti pəti ə so.

³⁶ Lo kin'ti non nga a, de'gi pəti uwəi rə'de ngan soi nya.

³⁷ De'gi pəti in bu joo ki də siri gidə in mehen me tokibo'ti.

³⁸ Lokə soi nya ndanni maji ə, buki ndəgi geme kə kadi to ələ kel.

³⁹ Lokə lo ti, njekuwə ngandi to'gi gəri lo el. Nan nya ki oyin ngangi ba ki aw tolta'ne də nangira'ti par. Ə uni ndu'de kadi n'rai nden nden to re to bann ə n'awi ki to səm'ti.

⁴⁰ Ningə tuti gindi'gi ki doi tokibo'ti, buki ba, ə rai də'ti non tuti kulə ki doi nya ləl tokibo'gi to. Go'ti, ɔyi ku ki nje kuwə nəl taa. ɔyi taa kadi to nəl sur tokibo aw si'ə, ki dəde nangira'ti kakin.

⁴¹ Lokə isi awi ə, ɔsi tokibo adi duw nangira'ti ki təgi mann ki in yo ge ne ge re ɔsi nan adi ra.

Non tokibo duw nangira'ti tōti tōti adi lo kadi oti kete goto. Ningə go'ə ki gogi, mann re ki tɔgi'ne ində tuji'n tō.

42 Njero'gi uni ndu'de asi nan kadi to n'toli dangay'gi nan to ki madi'gi dann'de'ti indəi ur me mann'ti anyinan awi.

43 Nan njekundo kuti njero'gi ki bu ndigi kaji Pol, adi ogi'de dō kadi rai kojitara lə'de. Adi ndu'ne kadi de'gi ki géri kala mann tosi me mann'ti kete, awi ki dō nangira'ti.

44 Ningə kadi ndəgə'gi sii dō kagi'gi'ti, dō nusi tokibo'gi'ti, uni go'de. In be ə, de'gi pətì awi tei dō nangira'ti ki kanji kadi nya madi ra'de.

28

Pol me be'ti ki Malti

1 Go te ki ji te ta koy'ti nga a j'oo kadi tō dor ki j'in'ti kakin nan Malti.

2 De'gi ki sii dō dor'ti kakin uwəi'je ki rō'de'ti ki rənel ki de oo gara nja kare el. Rai por ki bo ngayn adi ji ra ta'ti pətì, tado ndi ədī adi kul on ngayn.

3 Pol sangi ngəngirə kadi n'bukı por'o ə, por ra adi lii pir te'ti dolo ji'ə'ti.

4 Lokı de'gi ki me be'ti oy lii nan ji Pol'ti ningə, eli nan dann'de'ti eyina: «Ki rəta'ti, dingəm kin in nje tōl de'gi. Be ə, te ta mann'ti aji kaa, ta ki gangi lə Luwə ndigi kadi ra ki dō'ne taa el.»

5 Nan Pol siyə lii ilə me por'ti, ə ngonn rō'a ki nden kaa to'ə el.

6 De'gi pətì nginəi kadi rō Pol ti eke osi watı oy wa be. Nan lokı nginəi pi nya madi ra'a el, eli eyina: «De kam in luwə.»

7 Lo lə kibo ki dō dor'ti kakin, ki tō'a nan Pibilusi, to kadi lo'ti non ndəkba. Ə Pibilusi uwə'je ki rō'ne'ti maji ngayn, adi'je kəy ji to'ti ndō mutə.

8 Ningə baw Pibilusi to monyi nanga: rō'a tingə ge, ndəngi mosi ge. Ə Pol ində taa aw ində ji'ne dō'a'ti adi'ingə lapiya.

9 Go'ti, ndəgi njemonyi'gi ki me be'ti rei ingəi Pol adi adi'de lapiya tō.

10 De'gi ɔsi kurə'je non be. Nga ningə, loki kagilo asi kadi j'awi nga a, adi'je nya'gi ki j'aw ndoo'de kadi rai se'je dō row mbah'ti.

Kaw Pol Rōm'ti

11 Ji ra nanyi mutə non be bay taa kadi j'ilə dō'je ki tokibo ki in Alegijandiri'ti ki bari'ə nan Kasitər num, Polusı num. Tokibo kin, kagilo kul dər dō'a'ti me be'ti kin.

12 Loki j'aw ji te Sirakusi, j'isi'ti non ndō mutə.

13 Lo kin'ti non, j'in j'un kadi ba, j'aw ji te Rejiyo. Lo ti go'ti, nəl ki in holo tumginn kulə, ə ji ra ndō joo ə ji te Pujol.

14 Me be'ti kin ə j'ingə ngannkon'je'gi ki dəji'je adi ji ra ndō siri se'de bay taa j'aw. In be ə j'aw'n ki nja'je kadi ji te'n Rōm'ti.

15 Ngannkon'je'gi ki Rōm'ti ki oyi poy'je, rei tiləi kum'je biti lo suki'ti ki Apiyusı ki lo kəy kusə nya'gi ki mutə. Loki Pol oo'de, ra oyo Luwə, ə təl ingə təgi.

16 Go te'je Rōm'ti, adi tarow Pol kadi isi lo lə'ne ki njero kare ki kadi ində kum'ne go'ə'ti.

Pol mannaji lə Jeju Kirisiti Rōm'ti

17 Ndɔ mutə go'ti, Pol bar kibo'gi lə Juwipi'gi kadı rei ingəi'ə. Loki kawinan, Pol el'de ene: «Ngannkon'm'gi, m'ra nya madı m'ɔsi'n ta de'gi lə'je el num, m'ɔsi'n ta nya jibəlbe lə kaw'je'gi el num tə. Nan Juwipi'gi uwəi m'in Jerujalem'ti iləi m'in dangay'ti ji de'gi ki Rom'ti.

18 Go ta'ti ki de'gi ki Rom'ti dəji m'in, ingəi nya madı ki asi kadı de gangi'n ta koy dɔ'm'ti el, adi ndigi kadı inyəi m'in.

19 Nan Juwipi'gi ɔdi el. Lo kin'ti, təgi isi dɔ'm'ti kadı m'dəjì ki ra non Sejar'ti, ki kanji kadı m'ində'n ta dɔ de'gi'ti lə'm*.

20 In tado kin ə, m'dəjì kadı m'ingə'se, m'el'se ta. Tado in nya kindəmedəti lə Isirayel ə m'to'n dangay'ti kin.»

21 Lo kin'ti, Juwipi'gi eli'ə eyina: «J'ingə makitu madı ki in Jude'ti ki elta ki dɔ'i'ti el, taa ngannkon'gi madı ki kadı rei eli'je ta'gi ki dɔ'i'ti eke bari təi majel ka goto tə.

22 Nan ji ndigi kadı el'je ta lə'i ki ɔjidɔ kuti ki in me'ti kin adi j'oo. Tado ji gər kadı ki lo'gi pəti, de'gi ɔdi ta lə kuti kin el.»

23 Be ə, ɔji nan ndɔ ə rei ngayn ingəi Pol lo kis'ə'ti. Pol ilə'de mbər konfə lə Luwə. Ra dɔ ndukun'ti lə Moji ki de'gi ki njekeltakita Luwə'ti, manyinajì lə Jeju. Taa sangi kadı n'buki'de go'ne'ti ɔjidɔ tə Jeju tə. Eli nan ta sin biti lo səl'de.

24 De'gi madı oyi kadı ta ki el'de in ta ki rɔta'ti, nan nje ki nungi mbeti kunme'de tə.

25 Lo ki indəi sananyinan ki ndu kası nan el, Pol el'de ene: «Ta ki Ndil Luwə el baw'se'gi ki ta

* **28:19 28.19 25.11**

njekeltakita Luwə'ti Ejay in ta ki rɔta'ti.

²⁶ Ndil el'ə ene:

"Aw ingə de'gi kam ə el'de ene:

A oyi ta ki mbi'se, nan a in gəri me'ə el;

A gonyi lo ki kum'se, nan a oyi lo el.

²⁷ Tadɔ ngar me'de ngirə ngororo.

Boyi mbi'de'gi, ndəmi kum'de'gi,

Tadɔ kadi kum'de oo lo el num, mbi'de oo ta el
num.

Tadɔ kadi n'gəri nya kare el, nan to n'in n'təli
rɔ'de go'm'ti adi m'aji'de[†]."»

²⁸ Pol təl ilə'ti bay ene: «Kadi in gəri tokı, ta
kajı lə Luwə kin, ulə'n adi de'gi ki in Juwipi'gi
el. Ningə ingi a uri mbi'de kadi oyi.»

²⁹ [Loki Pol elta kin ningə, Juwipi'gi indəi taa,
ai ki ta ki manji nan dann'de'ti.]

³⁰ Pol ra bal joo asi nan me kəy'ti ki uwə
nanyi'ti. Ningə de'gi pətì ki rei rɔ'a'ti, uwə'de
ki rɔ'ne'ti.

³¹ Pol iləmbər Konbe lə Luwə num, ndo de'gi
ta ki dɔ Burəbe Jeju Kirisiti'ti ki me ki kare ki
kanji kadi nya madi ɔg'ɔ dɔ num.

[†] 28:27 28.27 26-27 Ejay 6.9-10

Ta lə Luwə Kunmindi ki Sigi
New Testament in Gor

copyright © 2014 Wycliffe Bible Translators, Inc.

Language: Gor

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 2 May 2025 from source files
dated 3 May 2025

2c67456e-bce1-5ef4-9c95-47d2d9335aa4